

কায়বাল্লা প্রান্তরে

খতিবে পাকিস্তান
আল্লামা মুহাম্মদ শফী উকাড়বী (রহঃ)

মুহাম্মাদী কুতুবখানা
আন্দরকিল্লা, চট্টগ্রাম।

কারবালা প্রান্তরে

মূল : খতীবে পাকিস্তান হযরত মাওলানা
মুহাম্মদ শফী ওকাড়বী (রহঃ)

অনুবাদ : মিসেস হাসিনা রহমান
সিনিয়র শিক্ষিকা
মেমন গ্রামার স্কুল
নন্দনকানন, চট্টগ্রাম।

মুহাম্মদী কুতুবখানা

শাহী জামে মসজিদ শপিং কমপ্লেক্স, (২য় তলা)
আন্দরকিল্লা, চট্টগ্রাম।

ফোন : ৬১৮৮৭৪, ০১৮ ৬২১৫১৪

প্রকাশনায় : নিশান প্রকাশনী
শাহী জামে মসজিদ শপিং কমপ্লেক্স,
আন্দরকিল্লা, চট্টগ্রাম।

প্রকাশকাল : ১৫ নভেম্বর ১৯৯২ ইং
পূর্ণ মুদ্রণ : ১০ জানুয়ারী ১৯৯৪ ইং
২য় সংস্করণ : ১ জানুয়ারী ১৯৯৬ ইং
পূর্ণ মুদ্রণ : ১২ মার্চ ১৯৯৮ ইং
৩য় সংস্করণ : ১ আগস্ট ২০০৩ ইং
পূর্ণ মুদ্রণ : ২০ ডিসেম্বর ২০০৮ ইং
হাদিয়া : ৬০/- টাকা

কম্পিউটার : এনাম প্রিন্টার্স এন্ড কম্পিউটার
৩৯, শাহী জামে মসজিদ শপিং কমপ্লেক্স
আন্দরকিল্লা, চট্টগ্রাম।

মুদ্রণ : আনন প্রেস
আন্দরকিল্লা, চট্টগ্রাম।

কারবালা প্রান্তরে □

অনুবাদিকার কথা

পাকিস্তানের প্রখ্যাত আলেম হযরত মাওলানা মুহাম্মদ শফী উকাড়বী (রহঃ) এর নাম হয়তো আপনারা অনেকে শুনে থাকবেন। তাঁর মনঃমুগ্ধকর ওয়াজ মাহফিলে লাখ লাখ লোকের সমাগম হতো। 'খতীবে পাকিস্তান' হিসেবে তিনি প্রসিদ্ধ ছিলেন। পাকিস্তানের প্রতিটি ঘরে তাঁর ওয়াজের ক্যাসেট অত্যন্ত সমাদৃত। তাঁর উপস্থাপনা, বাচনভঙ্গি, নিখুঁত বর্ণনা, প্রাজ্ঞল ভাষা ও সুললিত কণ্ঠ যে কোন শ্রোতার মন আকৃষ্ট করে। তাঁর ওয়াজের মধ্যে এমন একটি আকর্ষণ আছে যে, না বুঝলেও শুনে ইচ্ছে হয়। বাংলাদেশের অনেকেই পুরোপুরি না বুঝলেও তাঁর ওয়াজের ক্যাসেট নিয়মিত শুনে থাকেন।

আমিও সেরকম তাঁর ক্যাসেটের একজন ভক্ত। উর্দু ভাষার জ্ঞান বলতে আমার কিছুই নেই এবং উর্দুর প্রতি আদৌ কোন দুর্বলতাও ছিল না। কিন্তু তাঁর দু'তিনটি ক্যাসেট, বিশেষ করে ঐতিহাসিক কারবালার ওয়াজ সম্পর্কিত ক্যাসেট শুনে উর্দু ভাষা শিখার প্রতি আমার দারুণ আগ্রহ সৃষ্টি হয়। তাই আপনজনের সহায়তায় কয়েক মাসের প্রচেষ্টায় উর্দু সম্পর্কে মোটামুটি ধারণা লাভ করি এবং উর্দু ক্যাসেটগুলো হৃদয়ঙ্গম করতে সক্ষম হই। সাথে সাথে বাংলা ভাষাভাষীদের জন্য খুবই উপকার হবে মনে করে মাওলানা শফী ওকাড়বী (রহঃ) এর কারবালার বিবরণ সম্বলিত দু'টি ক্যাসেট বাংলায় রূপান্তরিত করার প্রয়াসী হলাম। যেন বাঙালী ভাই বোনেরা কারবালার বাস্তব ঘটনা ও এর শিক্ষা সম্পর্কে মোটামুটি জ্ঞান লাভ করতে পারেন।

বাজারে যদিওবা কারবালার কাহিনী সংক্রান্ত অনেক বই বের হয়েছে, কিন্তু এ ধরণের বাস্তব ও কল্পনামুক্ত বর্ণনা সম্বলিত বই নেই বললেই চলে। মাওলানা মুহাম্মদ শফী উকাড়বী (রহঃ) তাঁর ওয়াজে কারবালার হৃদয়বিদারক ঘটনা বর্ণনার সাথে সাথে এর শিক্ষার কথাও বর্ণনা করেছেন। মোট কথা, তিনি খুবই সংক্ষেপে অথচ অতি চমৎকার ভাবে কারবালা প্রান্তরে সংঘটিত লোমহর্ষক ঘটনার অবিকল বর্ণনা দিয়েছেন। তাঁর প্রাজ্ঞল ভাষা হুবহু ফুটিয়ে তুলতে না পারলেও যথাসাধ্য চেষ্টা করেছি, যেন পাঠক মহল একাগ্রচিত্তে বইটি পড়তে আগ্রহী হন।

-অনুবাদিকা

সূচী

বিষয়	পৃষ্ঠা
প্রারম্ভিক বক্তব্য	৬
শাহাদাতে কারবালা	১০
ইয়াজিদের মসনদ দখল	১১
ইমাম হুসাইন (রাঃ) এর মক্কার উদ্দেশ্যে মদীনা ত্যাগ	১৩
কুফার চিঠি	১৪
হযরত ইমাম মুসলিম (রাঃ) এর কুফা গমন	১৫
হযরত ইমাম মুসলিম (রাঃ) এর প্রতি প্রাণঢালা সংবর্ধনা	১৬
কুফাবাসীর বেঈমানী ও ইমাম মুসলিমের শাহাদাত	১৭
হযরত ইমাম হুসাইন (রাঃ) এর কুফা যাত্রা	২৭
কালবালা প্রান্তরে ইমাম হুসাইন (রাঃ)	২৮
অবরোধ সৃষ্টি ও পানি ব্যবহারে প্রতিবন্ধকতা	৩২
ইমাম হুসাইন (রাঃ) এর আকুল আবেদন	৩৩
ঐতিহাসিক ১০ই মুহররম	৩৫
ইমাম হুসাইন (রাঃ) এর অনুসারীদের শাহাদাত	৩৭
ইমাম হুসাইন (রাঃ) এর মর্মস্পর্শী ভাষণ ও হৃরের দল ত্যাগ	৩৮
চাচাত ভাই ও সৎ ভাই এর শাহাদাত	৩৯
হযরত আবদুল্লাহ বিন হাসান (রাঃ) এর শাহাদাত	৪০
হযরত কাসেম (রাঃ) এর শাহাদাত	৪১
ভাগিনাছয়ের শাহাদাত	৪২
হযরত আব্বাস (রাঃ) এর শাহাদাত	৪৩
হযরত আলী আকবর (রাঃ) এর শাহাদাত	৪৫
হযরত আলী আজগর (রাঃ) এর শাহাদাত	৪৮

বিষয়	পৃষ্ঠা
ইমাম হুসাইন (রাঃ) এর শেষ উপদেশ ও যুদ্ধের ময়দানে গমন	৫০
ইমাম হুসাইন (রাঃ) এর বীর বিক্রমে আক্রমণ	৫২
ইমাম হুসাইন (রাঃ) এর শাহাদাত	৫৪
লাশের পাশে হযরত সৈয়দা জয়নাব ও সখিনা (রাঃ)	৫৬
শহীদ পরিবারকে কূফায় আনয়ন	৬০
ইবনে জিয়াদের নিষ্ঠুর আচরণ	৬১
শহীদ পরিবার ও খন্ডিত মস্তক দামস্কে প্রেরণ	৬৪
ইয়াজিদের দরবারে শহীদ পরিবার ও ইয়াজিদের ভভামী	৬৭
ইয়াজিদই মূলতঃ দায়ী	৬৮
শহীদ পরিবারের মদীনা প্রত্যাবর্তন	৬৯
রওজা পাকে হযরত জয়নাল আবেদীন (রাঃ) এর হাজিরা	৭১
ইয়াজিদের বিরুদ্ধে বিদ্রোহের দাবানল	৭৩
মক্কা-মদীনা আক্রমণ	৭৩
ইয়াজিদের উপর খোদার লানত	৭৫
ইয়াজিদ বাহিনীর যমদূত মুখতার সক্ষীর আবির্ভাব	৭৬
যথার্থ প্রতিশোধ	৭৭
পাপিষ্ট আমর বিন সাদের পরিণতি	৭৭
হাওলা বিন ইয়াজিদের পরিণতি	৭৭
পাষাণ্ড সীমারের পরিণতি	৭৮
কুখ্যাত হাকিম বিন তোফায়েলের পরিণতি	৭৮
নিষ্ঠুর ওমর বিন সবীর পরিণতি	৭৮
নরাধম ইবনে জিয়াদের পরিণতি	৭৯
উপসংহার	৮০

প্রারম্ভিক বক্তব্য

সৈয়্যদুশ শোহ্দা হযরত ইমাম হুসাইন (রাদি আল্লাহু তাআলা আনহু) চতুর্থ হিজরীর শাবান মাসের ৫ তারিখ পবিত্র মদীনা শরীফে জন্ম গ্রহন করেন। জন্মের পর সরকারে মদীনা (সাল্লাল্লাহু তাআলা আলাইহে ওয়া আলিহি ওয়াসাল্লাম) তাঁর কানে আযান দিয়ে দুআ করেছিলেন। সাত দিন পর আক্কীকা করে ‘হুসাইন’ নাম রাখা হয়েছিল। হাদীছ শরীফে বর্ণিত আছে, الْحُسَيْنُ وَالْحُسَيْنُ إِشْمَانٌ مِنْ أَهْلِ الْجَنَّةِ অর্থাৎ হাসান ও হুসাইন জান্নাতী নাম সমূহের মধ্যকার দুটি নাম। এর আগে আরবের জাহিলিয়াত যুগে এ দু’নামের প্রচলন ছিল না।

হযরত হাসান ও হুসাইন (রাদি আল্লাহু তাআলা আনহুমা) হুযুর আকরম (সাল্লাল্লাহু তা’আলা আলাইহে ওয়াআলিহি ওয়াসাল্লাম) এর খুবই প্রিয় পাত্র ছিলেন। তাঁদের ফযীলত সম্পর্কে অনেক হাদীছ বর্ণিত আছে। হুযুর (সাল্লাল্লাহু তা’আলা আলাইহে ওয়াআলিহি ওয়াসাল্লাম) ইরশাদ করেছেন- **إِنَّ الْحُسَيْنَ وَالْحُسَيْنَ** অর্থাৎ নিশ্চয়ই হাসান-হুসাইন দুনিয়াতে আমার দুটি ফুল। আপন সন্তান থেকেও তিনি (সাল্লাল্লাহু তা’আলা আলাইহে ওয়াআলিহি ওয়াসাল্লাম) তাঁদেরকে (রাঃ) অধিক ভালবাসতেন।

হযরত আল্লামা জামী (রহমতুল্লাহে তাআলা আলাইহে) বর্ণনা করেন, একদিন সরকারে দু’আলম (সাল্লাল্লাহু তা’আলা আলাইহে ওয়াআলিহি ওয়াসাল্লাম) হযরত ইমাম হোসাইন (রাদি আল্লাহু তাআলা আনহু) কে ডানে ও স্বীয় সাহেবজাদা হযরত ইব্রাহিম (রাদি আল্লাহু তাআলা আনহু) কে বামে বসিয়েছিলেন। এমতাবস্থায় হযরত জিব্রাইল (আলাইহিস সালাম) উপস্থিত হয়ে আরয করলেন- **ইয়া রাসুলাল্লাহ!** (সাল্লাল্লাহু তা’আলা আলাইহে ওয়াআলিহি ওয়াসাল্লাম) আল্লাহ তাআলা এ দু’জনকে আপনার কাছে এক সঙ্গে রাখতে দেবেন না। ওনাদের মধ্যে একজনকে ফিরিয়ে নিবেন। অতএব আপনি এ দু’জনের মধ্যে যাকে ইচ্ছে পছন্দ করুন। হুযুর (সাল্লাল্লাহু তা’আলা আলাইহে ওয়াআলিহি ওয়াসাল্লাম) ফরমালেন, যদি হুসাইনকে নিয়ে যায়, তাহলে ওর বিরহে ফাতেমা ও আলীর খুবই কষ্ট হবে এবং আমার

মনটাও ক্ষুন্ন হবে আর যদি ইব্রাহিমের ওফাত হয়, তাহলে সবচে বেশী দুঃখ একমাত্র আমিই পাব। এজন্য নিজে দুঃখ পাওয়াটাই আমি পছন্দ করি। এ ঘটনার তিন দিন পর হযরত ইব্রাহিম (রাদি আল্লাহ তাআলা আনহু) ইন্তেকাল করেন।

এরপর থেকে যখনই হযরত ইমাম হুসাইন (রাদি আল্লাহ তাআলা আনহু) হযুর (সাল্লাল্লাহু তা'আলা আলাইহে ওয়াআলিহি ওয়াসাল্লাম) এর সমীপে আসতেন, হযুর ওকে মুবারকবাদ দিতেন, ওর কপালে চুমু দিতেন এবং উপস্থিত লোকদেরকে সম্বোধন করে বলতেন- আমি হুসাইনের জন্য আপন সন্তান ইব্রাহিমকে কুরবানী দিয়েছি। (শওয়াহেদুন নাবুয়াত)

হযরত আবু সাঈদ খুদরী (রাদি আল্লাহ তাআলা আনহু) ইরশাদ ফরমায়েছেন-
 الْحَسَنُ وَالْحُسَيْنُ سَيِّدَا شَبَابِ أَهْلِ الْجَنَّةِ অর্থাৎ হাসান-হুসাইন
 জান্নাতী যুবকদের সরদার।

হযরত আবু হুরাইরা (রাদি আল্লাহ তাআলা আনহু) থেকে বর্ণিত, রসূলে আকরম (সাল্লাল্লাহু তা'আলা আলাইহে ওয়াআলিহি ওয়াসাল্লাম) একদিন এমন অবস্থায় বাহিরে তশরীফ আনলেন যে, তাঁর এক কাঁধের উপর হযরত হাসান এবং অন্য কাঁধের উপর হযরত হুসাইনকে বসিয়ে ছিলেন। এ ভাবেই আমাদের সামনে তশরীফ আনলেন এবং ফরমালেন
 مَنْ أَحَبَّهُمَا فَقَدْ أَحَبَّنِي وَمَنْ أَبْغَضَهُمَا فَقَدْ أَبْغَضَنِي অর্থাৎ যে এ দুজনকে মহব্বত করলো, সে আমাকে মহব্বত করলো আর যে এদের সাথে দূশমনী করলো, সে আমার সাথে দূশমনী করলো।

হযরত ইমাম হুসাইন (রাদি আল্লাহ তাআলা আনহু) এর জন্মের সাথে সাথে হযুর (সাল্লাল্লাহু তা'আলা আলাইহে ওয়াআলিহি ওয়াসাল্লাম) এর বদৌলতে তাঁর শাহাদাতের কথা সবার জানাজানি হয়ে গিয়েছিল। হযরত আলী, হযরত ফাতেমাতুয যোহরা, অন্যান্য সাহাবায়ে কিরাম ও আহলে বায়তের সংশ্লিষ্ট সবাই (রাদি আল্লাহ তাআলা আনহুম) হুসাইন (রাদি আল্লাহ তাআলা আনহু) এর শৈশব অবস্থায় জানতে পেরেছিলেন যে, এ ছেলেকে একান্ত নির্মমভাবে শহীদ করা হবে এবং কারবালা ময়দান তাঁর রক্তে রঞ্জিত হবে। তাঁর (রাঃ) শাহাদাতের ভবিষ্যত বানী সম্বলিত অনেক হাদীছ বর্ণিত আছে।

হযরত উম্মুল ফজল বিনতে হারেছ (রাদি আল্লাহ তাআলা আনহা) (হযরত আব্বাস (রাঃ) এর স্ত্রী) বলেন, আমি একদিন নবী করীম (সাল্লাল্লাহু তা'আলা আলাইহে ওয়াআলিহি ওয়াসাল্লাম) এর খেদমতে উপস্থিত হয়ে ইমাম হুসাইন (রাদি আল্লাহ তাআলা আনহু) কে তাঁর কোলে দিলাম। এরপর আমি দেখলাম, হুযুর (সাল্লাল্লাহু তা'আলা আলাইহে ওয়াআলিহি ওয়াসাল্লাম) এর চোখ মুবারক থেকে টপটপ করে পানি পড়ছে। আমি আরয করলাম, ইয়া রাসুল্লাহ! (সাল্লাল্লাহু তা'আলা আলাইহে ওয়াআলিহি ওয়াসাল্লাম) ব্যাপার কি? তিনি ফরমালেন, আমার কাছে জিব্রাইল (আলাইহিস সালাম) এসে খবর দিয়ে গেল **إِنَّ أُمَّتِي سَتَقْتُلُ**

إِنِّي هَذَا (আমার উম্মত আমার এ শিশুকে শহীদ করবে।) হযরত উম্মুল ফজল বলেন, আমি আশ্চর্য হয়ে আরয করলাম, “ইয়া রাসুল্লাহ, এ শিশুকে শহীদ করবে! হুযুর (সাল্লাল্লাহু তা'আলা আলাইহে ওয়াআলিহি ওয়াসাল্লাম) ফরমালেন, হ্যাঁ! জিব্রাইল (আলাইহিস সালাম) ওর শাহাদত স্থলের লাল মাটিও এনেছেন।

হযরত ইবনে সাদ (রাঃ), হযরত শাবী (রাঃ) থেকে বর্ণনা করেছেন, হযরত আলী (রাদি আল্লাহ তাআলা আনহু) জংগে সফফীনের সময় কারবালার পথ দিয়ে যাওয়ার সময় হঠাৎ দাঁড়িয়ে গেলেন এবং সেই জায়গার নাম জানতে চাইলেন। লোকেরা বললো, এ জায়গার নাম কারবালা। কারবালার নাম শুনেই তিনি এত কান্নাকাটি করলেন যে, মাটি চোখের পানিতে ভিজে গিয়েছিল। অতঃপর ফরমালেন, আমি একদিন হুযুর (সাল্লাল্লাহু তাআলা আলাইহে ওয়া আলিহি ওয়া সাল্লাম) এর খেদমতে হাজির হয়ে দেখতে পেলাম, তিনি (সাল্লাল্লাহু তাআলা আলাইহে ওয়া আলিহি ওয়া সাল্লাম) কাঁদছেন। আমি আরয করলাম, ইয়া রাসুল্লাহ! (সাল্লাল্লাহু তাআলা আলাইহে ওয়া আলিহি ওয়া সাল্লাম) আপনি কেন কাঁদছেন? ফরমালেন, এ মাত্র জিব্রাইল এসে আমাকে খবর দিয়ে গেল—

إِنَّ وُلْدِي الْحُسَيْنِ يُقْتَلُ بِشَاطِئِ الْفِرَاتِ بِمَوْضِعٍ يُقَالُ لَهُ كَرْبَلَا-

(আমার ছেলে (দৌহিত্র) হুসাইনকে ফোঁরাত নদীর তীরে সেই জায়গায় শহীদ করা হবে, যে জায়গার নাম কারবালা (সওয়ায়েকে মুহার্কা)

বিভিন্ন হাদীছ থেকে জানা যায় যে, ইমাম হুসাইন (রাদি আল্লাহ তাআলা আনহু)

এর শাহাদাত সম্পর্কে হুযুর (সাল্লাল্লাহু তাআলা আলাইহে ওয়া আলিহি ওয়া সাল্লাম) অনেকবার ভবিষ্যত বাণী করেছেন। ইমাম হুসাইন (রাদি আল্লাহু তাআলা আনহু) এর শৈশব কালেই এটা সবার জানাজানি হয়ে গিয়েছিল। হুযুর (সাল্লাল্লাহু তাআলা আলাইহে ওয়া আলিহি ওয়া সাল্লাম) খোদাওয়ান্দ তাআলার ইচ্ছায় রেজামন্দি জ্ঞাপন করেন। জলেস্থলে যার হুকুম চলে, পাথর বৃক্ষ পশু-পাখী যাকে সালাম করে, যার ইশারায় চাঁদ দ্বিখন্ডিত হয়ে যায়, যার হুকুমে ডুবন্ত সূর্য ফিরে আসে এবং খোদা প্রদত্ত ক্ষমতা বলে সৃষ্টিকূলের প্রতিটি কণায় কণায় যার রাজত্ব চলে, সেই নবী (সাল্লাল্লাহু তাআলা আলাইহে ওয়া আলিহি ওয়া সাল্লাম) তাঁর প্রাণপ্রিয় দৌহিত্রের শাহাদাত হওয়ার খবর পেয়ে অশ্রু বিসর্জন দিয়েছেন বটে কিন্তু রক্ষা করার জন্য খোদার বারগাহে দুআ করেননি। এমনকি হযরত আলী ও হযরত ফাতিমা (রাদি আল্লাহু তাআলা আনহুমা) এ বলে আরম্ভ করেননি— ‘ইয়া রাসুলাল্লাহ! হুসাইনের শাহাদাতের খবর শুনে আমাদের বুক ফেটে যাচ্ছে। আপনি আল্লাহর দরবারে ওকে এ মসীবত থেকে রক্ষার জন্য দুআ করুন।’

মোট কথা, কেউ ওকে রক্ষার জন্য দুআ করেননি, সবাই চেয়েছেন যে, হযরত হুসাইন (রাঃ) যেন এ মহা পরীক্ষায় কামিয়াব হয়ে আল্লাহ (আযযা ওয়াজাল্লা) এর দরবারে উচ্চস্থান লাভ করেন।

অতি পরিতাপের বিষয়, আমাদের মধ্যে মুসলমান নামধারী কেউ কেউ বলে থাকে যে, নবী করীম (সাল্লাল্লাহু তাআলা আলাইহে ওয়া আলিহি ওয়া সাল্লাম) পরের উপকারতো দূরের কথা, নিজের উপকার করতেও অক্ষম’ (নাউযুবিল্লাহ) তাদের প্রধান দলীল হলো, ‘রসুলুল্লাহ যখন স্বীয় দৌহিত্রকে হত্যা থেকে বাঁচাতে পারেননি, সে ক্ষেত্রে অন্যদেরকে মসীবত থেকে কিভাবে রক্ষা করতে পারবেন’। এর জবাব হচ্ছে, আল্লাহর প্রিয় হাবীব (সাল্লাল্লাহু তাআলা আলাইহে ওয়া আলিহি ওয়া সাল্লাম) হযরত ইমাম হুসাইন (রাদি আল্লাহু তাআলা আনহু) কে শহীদ হওয়া থেকে রক্ষা করার জন্য চেষ্টা করেননি। তিনি (সাল্লাল্লাহু তাআলা আলাইহে ওয়া আলিহি ওয়া সাল্লাম) ইমাম হুসাইন (রাদি আল্লাহু তাআলা আনহু) কে হত্যা থেকে রক্ষার জন্য দুআ করেননি। যখন তিনি (সাল্লাল্লাহু তাআলা আলাইহে ওয়া আলিহি ওয়া সাল্লাম) রক্ষা করার জন্য চেষ্টাই করেন নি, তখন এটাকে অক্ষমতা-বলাটা মারাত্মক ভুল।

মনে করুন, আমাদের কোন লোক নদীতে ডুবে যাচ্ছে। কিন্তু আমাদের কাছে নৌযান ইত্যাদি থাকা সত্ত্বেও ওকে রক্ষা করার জন্য আমরা চেষ্টা করিনি। এক্ষেত্রে আমাদেরকে কি অক্ষম বলা যাবে? অবশ্য আমরা যদি চেষ্টা করে বিফল হতাম তাহলে অক্ষম বলা যেত।

আমাদের সমাজে এখনও অনেক ইয়াজিদের প্রেতাত্মা রয়ে গেছে। ওরা সুযোগ বুঝে আহলে বায়ত ও ইমাম হুসাইন (রাঃ) এর সমালোচনা করতে দ্বিধাবোধ করে না। এদেরকে চিনে রাখা এবং এদের সম্পর্কে সদা সজাগ থাকা দরকার।

শাহাদাতে কারবালা

আল্লাহ তা'আলা ইরশাদ ফরমান—

وَلَا تَقُولُوا لِمَنْ يُقْتَلُ فِي سَبِيلِ اللَّهِ أَمْوَاتٌ

যারা আল্লাহর রাস্তায় কতল বা শহীদ হয়ে যায়, তাদেরকে মৃত বলা না।

বরং তারা জীবিত কিন্তু তোমরা অবহিত নও। হযুর (সাল্লাল্লাহু তাআলা আলাইহে ওয়া আলিহি ওয়া সাল্লাম) এর উম্মতের মধ্যে অনেকেই শাহাদাত বরণ করেছেন। আল্লাহ তা'আলা অনেক লোককে এই নিয়ামত দান করেছেন। যেমন, হযরত আবু বকর সিদ্দীক (রাঃ) এ নিয়ামত লাভ করেছেন। হযরত উমর ফারুক (রাঃ), হযরত ওছমান গণি (রাঃ) ও হযরত আলী মরতুজা (রাঃ)ও এই নিয়ামত লাভে ধন্য হয়েছেন। জংগে উহুদ, বদর, গজওয়ায়ে খায়বরেও অনেক সাহাবায়ে কিরাম এ নিয়ামত লাভ করেছেন। কিন্তু হযরত ইমাম হুসাইন (রাঃ) এর শাহাদাত এমন এক অসাধারণ ও অদ্বিতীয় শাহাদাত এবং এমন এক হৃদয় বিদারক ঘটনা, যার সাথে আগের এবং পরের যুগের কোন ঘটনার তুলনা হয় না।

ইয়াজিদে মসনদ দখল

হযরত আমীরে মুয়াবিয়া (রাঃ) এর ইন্তেকালের পর ইয়াজিদ সিংহাসনে আরোহন করলো এবং সিংহাসনে আরোহন করার সাথে সাথেই তার মনের মধ্যে সীমাহীন অহংকার ও গর্ববোধের সৃষ্টি হলো। যার ফলে সে এমন কাজকর্ম শুরু করলো, যা পবিত্র শরীয়তের সম্পূর্ণ বিপরীত। মানুষ ক্ষমতার মোহে বিভোর হয়ে অনেক সময় ধরাকে সরা জ্ঞান করে। যেমন ফেরাউন প্রথমে গরীব লোক ছিল, কিন্তু ভাগ্যক্রমে বাদশা হয়ে সিংহাসনে আরোহন করার সাথে সাথে এমন অহংকারী হয়ে বসলো যে, শেষ পর্যন্ত নিজেকে খোদা বলে ঘোষণা করলো এবং বলতে লাগলো- **أَنَا رَبُّكُمْ الْأَعْلَى** অর্থাৎ আমি তোমাদের সবচেয়ে বড় খোদা; আমার পূজা, আরাধনা কর; সে-ই রক্ষা পাবে, যে আমার পূজা করবে; আর যে আমার পূজা করতে অস্বীকার করবে, তাকে আমি খতম করবো। একমাত্র এ কারণেই সে অনেক লোকের গর্দান দ্বিখন্ডিত করেছিল। তাদের অপরাধ ছিলো, তারা তার পূজা করতে এবং তাকে মা'বুদ মানতে অস্বীকার করেছিল। ইয়াজিদও যখন সিংহাসনে বসলো, তখন সে বাপের বর্তমানে যে সব গর্হিত কাজ কর্ম গোপনে করতো, সে সব এখন প্রকাশ্যে করতে লাগলো। যেহেতু এখন তাকে নিষেধ করা বা বাঁধা দেয়ার কেউ নেই সেহেতু সে এখন যা খুশী তা করতে লাগলো। মদ্য পান, জেনা এবং অন্যান্য কু-কর্ম তার নিত্য দিনের অভ্যাসে পরিণত হল। সে মনে মনে ভাবলো 'আমার যে চাল-চলন এবং স্বভাব-চরিত্র, তা কেউ সহজে মেনে নিবে না। বিশেষ করে যে সব গণ্যমান্য ব্যক্তির আছেন তাঁরা তার এ রাজত্ব মেনে নিবেন না; তাঁরা তার হাতে বায়াত করবেন না; তাঁদের অস্বীকৃতির কারণে অন্যদের মধ্যেও অস্বীকৃতির প্রভাব বিস্তৃত হবে। এজন্য এটাই সমীচীন হবে যে, আমি তাঁদের বায়াত তলব করবো। যদি তাঁরা অস্বীকার করেন, তখন তাঁদেরকে কতল করবো, যাতে আমার রাস্তার এ সব বড় বড় প্রতিবন্ধকতা অপসারিত হয় এবং আমার খেলাফতের রাস্তা যেন কন্টক মুক্ত হয়ে যায়। তাই সে ক্ষমতায় আরোহণ করার পর পরই হযরত ইমাম হুসাইন (রাঃ), হযরত আবদুল্লাহ বিন জুবাইর (রাঃ) হযরত আবদুল্লাহ বিন উমর (রাঃ) প্রমুখ থেকে বায়াত তলব করলো। এ সব ব্যক্তিগণ বিশেষ সম্মানিত ছিলেন এবং বিশেষ গণ্যমান্যদের

বংশধর ছিলেন। তাই তাঁরা কিভাবে ফাসিক-ফাজির ইয়াজিদের হাতে বায়াত করতে পারেন? সুতরাং তাঁরা অস্বীকার করলেন এবং এটা তাঁদের মর্যাদাগত আচরণই ছিল। অস্বীকার করার পর হযরত আবদুল্লাহ বিন উমর (রাঃ) ও হযরত আবদুল্লাহ বিন জুবাইর (রাঃ) মদীনা শরীফ থেকে মক্কা শরীফ চলে গেলেন।

হযরত হুসাইন (রাঃ) মদীনার গভর্ণর ওয়ালিদের আহ্বানে তার দরবারে তশরীফ নিয়ে গেলেন, তার সঙ্গে আলোচনা করলেন। মদীনার গভর্ণর বললো, ইয়াজিদ আপনার বায়াত তলব করেছেন। তিনি বললেন, ‘আমি ইয়াজিদের হাতে বায়াত করতে পারিনা। ইয়াজিদ হলো ফাসিক-ফাজির। এ ধরণের অনুপযুক্ত লোকের হাতে আমি বায়াত করতে পারিনা। আমি কোন অবস্থাতেই ওর হাতে বায়াত করতে রাজি নই।’ তিনি সুস্পষ্টভাবে অস্বীকার করলেন। এটা ছিল তাঁর মর্যাদাগত আচরণ। দেখুন, তিনি যদি বায়াত করতেন, তাহলে নিজের প্রাণ বাঁচতো, পরিবার-পরিজন বাঁচতো, এমনও হয়তো হত যে, অগাধ সম্পত্তির মালিকও তিনি হয়ে যেতেন। কিন্তু ইসলামের আইন-কানুন ছত্রভঙ্গ হয়ে যেত এবং কিয়ামত পর্যন্ত ফাসিক-ফাজিরের আনুগত্য বৈধ হয়ে যেত এবং তাদের কাছে ইমাম হুসাইন (রাঃ) এর আনুগত্য প্রধান দলিল হিসাবে পরিণত হত। লোকেরা বলতো, ইমাম হুসাইন (রাঃ) যখন ফাসিক-ফাজিরের আনুগত্য স্বীকার করেছেন, তাহলে নিশ্চয় এটা জায়েয। কিন্তু ইমাম হুসাইন (রাঃ) অস্বীকারের মাধ্যমে দুনিয়াবাসীর সামনে প্রমাণ করে দিলেন, হুসাইন (রাঃ) শত দুঃখ-কষ্ট ভোগ করতে পারেন, অনেক বিপদ-আপদের মোকাবেলা করতে পারেন, এমন কি আপন পরিজনের শহীদ হওয়াটা অবলোকন করতে পারেন; নিজেও বর্বরোচিত ভাবে শাহাদাত বরণ করতে পারেন, কিন্তু ইসলামের নেজাম ছত্রভঙ্গ হওয়া কিছুতেই সহ্য করতে পারেন না, নিজের নানাজান (সাল্লাল্লাহু তাআলা আলাইহে ওয়া আলিহি ওয়া সাল্লাম) এর ধর্ম ধ্বংস হওয়াটা কিছুতেই মেনে নিতে পারেন না। ইমাম হুসাইন (রাঃ) নিজের কাজ ও কর্মপন্থা দ্বারা তা প্রমাণিত করেছেন এবং দুনিয়াবাসীকে এটা দেখিয়ে দিয়েছেন, খোদার বান্দার এটাই শান যে, বাতিলের সামনে বুক ফুলিয়ে দাঁড়িয়ে যান এবং তীর তলোয়ারের সামনে বুক পেতে দেন, কিন্তু কখনও বাতিলের সামনে মাথা নত করেন না। ইমাম হুসাইন (রাঃ) নিজের আমল দ্বারা তাঁর উচ্চ মর্যাদার পরিচয় দান করেছেন এবং জনগণের সামনে নিজের পদ মর্যাদা তুলে ধরেছেন।

ইমাম হুসাইন (রাঃ) এর মক্কার উদ্দেশ্যে মদীনা ত্যাগ

ইমাম হুসাইন (রাঃ) এভাবে অস্বীকার করে ওয়ালিদের দরবার থেকে আপন জনদের কাছে ফিরে আসলেন এবং সবাইকে একত্রিত করে বললেন, আমার প্রিয়জনেরা! যদি আমি মদীনা শহরে অবস্থান করি, আমাকে ইয়াজিদের হাতে বায়াত করার জন্য বাধ্য করবে, কিন্তু আমি কখনও বায়াত করতে পারবো না। বাধ্য করলে নিশ্চয় যুদ্ধ হবে, ফ্যাসাদ হবে, কিন্তু আমি চাইনা আমার কারণে মদীনা শরীফে লড়াই বা ফ্যাসাদ হোক। আমার মতে এটাই সমীচীন হবে যে, এখান থেকে হিজরত করে মক্কা শরীফে চলে যাওয়া। নিজের আপনজনেরা বললেন, 'আপনি আমাদের সর্দার, আমাদেরকে যা হুকুম করবেন তা মেনে নেব।' অতঃপর তিনি (রাঃ) মদীনা শরীফ থেকে হিজরত করার সিদ্ধান্ত নিলেন। আহ! অবস্থা কেমন সঙ্গীন হয়ে গিয়েছিল যে, ইমাম হুসাইন (রাঃ) কে সেই মদীনা শরীফ ত্যাগ করতে হচ্ছিল, যে মদীনা শরীফে তাঁর (রাঃ) নানাজান (সাল্লাল্লাহু তাআলা আলাইহে ওয়া আলিহি ওয়া সাল্লাম) এর রওজা মুবারক অবস্থিত। তাঁর (রাঃ) নানাজান (সাল্লাল্লাহু তাআলা আলাইহে ওয়া আলিহি ওয়া সাল্লাম) এর রওজা মুবারক যিয়ারত করার উদ্দেশ্যে হাজার হাজার টাকা-পয়সা ব্যয় করে, আপন জনদের বিরহ-বেদনা সহ্য করে, ব্যবসা-বাণিজ্য বন্ধ করে দূর-দূরান্ত থেকে লোকেরা আসে এই মদীনায়। কিন্তু আফসোস, আজ সেই মদীনা তিনি (রাঃ) ত্যাগ করছেন, যেই মদীনা তাঁরই (রাঃ) ছিল। নবীজী (সাল্লাল্লাহু তাআলা আলাইহে ওয়া আলিহি ওয়া সাল্লাম) এর নয়নের তাঁরা ছিলেন তিনি (রাঃ)। ক্রন্দনরত অবস্থায় তিনি (রাঃ) নানাজান (সাল্লাল্লাহু তাআলা আলাইহে ওয়া আলিহি ওয়া সাল্লাম) এর রওজা পাকে উপস্থিত হয়ে বিদায়ী সালাম পেশ করলেন এবং অশ্রুসজল নয়নে নানাজান (সাল্লাল্লাহু তাআলা আলাইহে ওয়া আলিহি ওয়া সাল্লাম) এর অনুমতি নিয়ে আত্মীয়-পরিজনসহ মদীনা শরীফ থেকে হিজরত করে মক্কায় চলে গেলেন। মক্কা-শরীফ তিনি (রাঃ) কেন গিয়েছিলেন? আল্লাহ তা'আলা ইরশাদ ফরমান— **وَمَنْ دَخَلَهُ** (যে হেরেম শরীফে প্রবেশ করলো, সে নিরাপদ আশ্রয়ে এসে গেল।) কেননা হেরেম শরীফের অভ্যন্তরে ঝগড়া-বিবাদ, খুন-খারাবী না জায়েয, হারাম। এমনকি হেরেম শরীফের সীমানায় উকুন মারা পর্যন্ত নিষেধ। আজকাল সাপ বিছু ইত্যাদি মারা যায়। কিন্তু যে সব পশু-পাখি মানুষের কোন ক্ষতি করে না

ঐগুলো মারা জায়েয নাই। মুমিনদের ইজ্জত-শান আলাদা, তাঁদের মান-সম্মান অনেক উচ্চ হয়ে থাকে। তাই ইমাম হুসাইন (রাঃ) চিন্তা করলেন যে, হেরেম শরীফের সীমানায় অবস্থান করে আল্লাহ তাঁ'আলার ইবাদত বন্দেগীতে বাকী জীবনটা কাটিয়ে দেবে— এ মনোভাব নিয়ে তিনি (রাঃ) মদীনা শরীফ থেকে মক্কা শরীফ চলে আসলেন।

কুফার চিঠি

মক্কা শরীফে আগমনের সাথে সাথে কুফা থেকে লাগাতার চিঠিপত্র এবং সংবাদ-বাহক আসতে শুরু করলো। অল্প সময়ের মধ্যে হুসাইন (রাঃ) এর কাছে দেড়শ' চিঠি এসে পৌঁছল। অপর এক বর্ণনায় বারশ' চিঠি এসেছিল। কোন কোন উলামায়ে কিরাম তাঁদের কিতাবে বারশ' চিঠির কথা উল্লেখ করেছেন। কিন্তু অধিকাংশ কিতাবে দেড়শ' চিঠির কথা উল্লেখিত আছে। দেড়শ' চিঠিই বিশেষ নির্ভরযোগ্য। কারণ সেই যুগে ডাক আদান-প্রদান অত সহজ ছিল না। লোকেরা চিঠি-পত্র, পত্র বাহকের মাধ্যমে প্রেরণ করত এবং পত্র-বাহক পায়ে হেঁটে বা ঘোড়ায় চড়ে গন্তব্যস্থানে চিঠি পৌঁছিয়ে দিত। এমতবস্থায় দেড়শ' চিঠি পৌঁছাটা অত সহজ ব্যাপার নয়। যা হোক, ধরা যাক ইমাম হুসাইন (রাঃ) এর কাছে দেড়শ' চিঠি পৌঁছেছিল। প্রত্যেক চিঠির বিষয়বস্তু ছিল খুবই আকর্ষণীয় এবং গুরুত্বপূর্ণ। প্রত্যেক চিঠির সার সংক্ষেপ হচ্ছে “হে ইমাম হুসাইন (রাঃ)! আমরা আপনার পিতা হযরত আলী (রাঃ) এরই অনুসারী এবং আহলে বায়তের ভক্ত। আমরাতো হযরত মুয়াবিয়া (রাঃ) কে সমর্থন করিনি, আর তাঁর অনুপযুক্ত ছেলে ইয়াজিদকে মানার প্রশ্নই উঠতে পারে না। আমরা আপনার পিতা আমীরুল মুমেনিন হযরত আলী (রাঃ) ও আপনার ভাই হযরত হাসান (রাঃ) এর সমর্থনকারী। আমরা ইয়াজিদদের অনুসারী নই। ইয়াজিদ এখন তখতারোহন করেছে, কিন্তু আমরা ইয়াজিদকে খলিফা বা ইমাম মানতে পারিনা। আপনাকেই বরহক ইমাম, বরহক খলিফা মনে করি। আপনি মেহেরবানী করে কুফায় তশরীফ নিয়ে আসুন। আমরা আপনার হাতে বায়াত করবো এবং আপনাকে খলিফা হিসেবে গ্রহণ করবো। আপনার জন্য আমাদের জানমাল কুরবান করতে প্রস্তুত এবং আপনার হাতে বায়াত করে আপনার অনুসরণে জিন্দেগী অতিবাহিত করতে ইচ্ছুক। তাই আপনি আমাদের কাছে তশরীফ আনুন, আমাদের প্রতি মেহেরবানী করুন এবং

আমাদেরকে আপনার সুহৃৎ রেখে আপনার ফয়েজ-বরকত দ্বারা আমাদেরকে উপকৃত করুন।” সমস্ত কাবিলা- খানদানের থেকে তাঁর (রাঃ) কাছে এই ধরণের চিঠি এসেছিল। অনেকেই এই ধরণের চিঠিও লিখেছিল, ‘হে মহান ইমাম! আপনি যদি আমাদের কাছে না আসেন, আমাদেরকে বাধ্য হয়ে ইয়াজিদের হাতে বায়াত করতে হবে।। কারণ সরকারের মোকাবেলা করা আমাদের পক্ষে সম্ভব নয়। কাল কিয়ামতের মাঠে আল্লাহ তা’আলা যখন জিজ্ঞেস করবেন- কেন আমরা নালায়েক ইয়াজিদের হাতে বায়াত গ্রহণ করলাম, তখন আমরা পরিষ্কার বলব, হে মওলা! আমরা আপনার নবী করিম (সাল্লাল্লাহু তা’আলা আলাইহে ওয়াআলিহি ওয়াসাল্লাম)-এর দৌহিত্রের কাছে চিঠি লিখেছিলাম, সংবাদ পাঠিয়েছিলাম, জান-মাল কুরবানী করার প্রতিশ্রুতিও দিয়েছিলাম, কিন্তু তিনি (রাঃ) যেহেতু তশরীফ আনেননি এবং আমরা সরকারের বিরোধিতা করতে পারিনি, সেহেতু আমরা বাধ্য হয়ে ইয়াজিদের হাতে বায়াত করেছি। তাই হে ইমাম! আপনি স্বরণ রাখবেন, আমাদের এ বায়াতের জন্য আপনিই দায়ী হবেন।’

হযরত ইমাম মুসলিম (রাঃ) এর কুফা গমন

এ ধরণের চিঠি লিখার পরিপ্রেক্ষিতে শরীয়তের বিধান অনুসারে তিনি (রাঃ) বিবেচনা করতে বাধ্য হলেন যে, যাবেন কিনা। তিনি (রাঃ) অনেকের সাথে শলা-পরামর্শ করলেন এবং শেষ পর্যন্ত এই সিদ্ধান্তে উপনীত হলেন যে, প্রথমে একজন নির্ভরযোগ্য ব্যক্তিকে পাঠাবেন, যিনি ঐখানে গিয়ে স্বচক্ষে অবস্থা যাচাই করে দেখবেন, ওরা বাস্তবিকই তাঁকে (রাঃ) চায় কিনা, তাঁর (রাঃ) প্রতি আন্তরিক মহব্বত এবং আক্বীদা আছে কিনা। সঠিক বিবরণ পাওয়ার পর চূড়ান্ত সিদ্ধান্ত নিবেন, যাবেন কি, যাবেন না।

অতঃপর তাঁর (রাঃ) চাচাতো ভাই হযরত মুসলিম বিন আকিল (রাঃ) কে এ কাজের জন্য মনোনীত করলেন এবং ফরমালেন, ‘প্রিয় মুসলিম! কুফা থেকে যে ভাবে চিঠি আসছে, তা তলিয়ে দেখার জন্য তোমাকে আমার প্রতিনিধি করে ঐখানে পাঠানোর মনস্থ করেছি। তুমি সেখানে গিয়ে স্বচক্ষে অবস্থা উপলব্ধি এবং যাচাই করে যদি অবস্থা বাস্তবিকই সন্তোষজনক পাও, তাহলে আমার কাছে চিঠি লিখবে। চিঠি পাওয়ার পর আমি রওয়ানা হবো, অন্যথায় তুমি ফিরে এসে যাবে।’ তাঁর (রাঃ) চাচাতো ভাই হযরত মুসলিম বিন আকিল (রাঃ) যাবার জন্য তৈরী হয়ে

গেলেন। হযরত ইমাম হুসাইন (রাঃ) কুফাবাসীদের কাছে একটি চিঠি লিখলেন— ‘হে কুফাবাসী! পরপর তোমাদের অনেক চিঠি আমার কাছে পৌঁছেছে। তাই আমি আমার চাচাতো ভাই হযরত মুসলিম বিন আকিল (রাঃ) কে আমার প্রতিনিধি করে তোমাদের কাছে পাঠালাম। তোমরা সবাই তার হাতে বায়াত করো এবং তার খেদমত করো। সে তোমাদের মনোভাব যাচাই করে আমার কাছে চিঠি লিখবে। যদি তোমাদের মনোভাব সন্তোষজনক হয়, তাঁর চিঠি আসার পর পরই আমিও তোমাদের উদ্দেশ্যে রওয়ানা হয়ে যাব।’ এ ভাবে চিঠি লিখে সীল মোহর লাগিয়ে হযরত মুসলিম বিন আকিল (রাঃ) কে দিলেন। হযরত মুসলিম বিন আকিল (রাঃ) এর দুই ছেলে হযরত মুহাম্মদ ও হযরত ইব্রাহিম তাঁর সাথে যেতে গৌ ধরলেন। তাঁরা বলতে লাগলেন, আব্বাজান! আমাদেরকে ফেলে যাবেন না, আমাদেরকে সাথে নিয়ে যান। হযরত মুসলিম (রাঃ) ছেলেদের অন্তরে আঘাত দিতে চাইলেন না। তাই ছেলেদ্বয়কেও সাথে নিলেন। তিনি মক্কা শরীফ থেকে মদীনা শরীফ গেলেন এবং আত্মীয় স্বজনের সাথে দেখা করার পর কুফার উদ্দেশ্যে রওয়ানা হলেন।

হযরত ইমাম মুসলিমের প্রতি প্রাণঢালা সংবর্ধনা

কুফায় পৌঁছে মুখতার বিন উবায়দুল্লাহ সাক্ফী, যে আমন্ত্রণকারীদের মধ্যে একজন বিশিষ্ট ব্যক্তি ছিল ও আহলে বায়তের অনুরক্ত ছিল, তার ঘরেই হযরত মুসলিম (রাঃ) তশরীফ রাখলেন। যখন কুফাবাসীরা খবর পেল যে, হযরত মুসলিম, হযরত ইমাম হুসাইন (রাঃ) এর প্রতিনিধি হয়ে এসেছেন, তখন কুফাবাসীরা দলে দলে এসে তাঁর হাতে বায়াত হতে লাগলো। অল্প দিনের মধ্যে চল্লিশ হাজার লোক তাঁর হাতে বায়াত হয়ে গেল এবং এমন ভালবাসা ও মহব্বত দেখালো যে, হযরত মুসলিম (রাঃ) অবিভূত হয়ে গেলেন। তিনি যেখানে যাচ্ছেন, শত শত লোক তাঁর সাথে যাচ্ছে, দিন রাত মেহমানদারী করছে, হাত-পায়ে চুমু খাচ্ছে এবং একান্ত আনুগত্যের পরিচয় দিচ্ছে। এতে হযরত ইমাম মুসলিম (রাঃ) ভীষণভাবে আকৃষ্ট হলেন এবং মনে মনে বললেন, এরাতো সত্যিই ইমাম হুসাইন (রাঃ) এর বড়ই আশেক এবং তাঁর জন্য একেবারে পাগল। তিনি আরও ভাবলেন, আমাকে পেয়ে তাদের যে অবস্থা হয়েছে, জানিনা, হযরত ইমাম হুসাইন (রাঃ) আসলে তারা কী যে করবে। হযরত ইমাম মুসলিম এ ভাবে পরিতৃপ্ত হয়ে সমস্ত

অবস্থার বর্ণনা দিয়ে হযরত ইমাম হুসাইন (রাঃ) এর কাছে চিঠি লিখলেন- “চল্লিশ হাজার লোক বায়াত হয়েছে, সব সময় আমার সাথেই রয়েছে, আমার যথেষ্ট খেদমত করছে এবং তাদের অন্তরে আপনার (রাঃ) প্রতি অসীম মহব্বত রয়েছে। তাই আপনি আমার চিঠি পাওয়া মাত্রই চলে আসুন। এখানকার অবস্থা খুবই সন্তোষজনক।” এ ভাবে হযরত মুসলিম, হযরত ইমাম হুসাইন (রাঃ) এর কাছে চিঠি লিখলেন। এ দিকে পত্র- বাহক পত্র নিয়ে রওয়ানা হয়ে গেল। আর ঐ দিকে দেখুন, অদৃষ্টে যা লিখা ছিল, তা কি ভাবে বাস্তবায়িত হচ্ছে।

কুফাবাসীর বেঈমানী ও হযরত ইমাম মুসলিমের শাহাদাত

ইয়াজিদের অনেক অনুসারীরাও কুফায় অবস্থান করতো। তারা যখন দেখলো, হযরত ইমাম মুসলিমের হাতে চল্লিশ হাজার লোক বায়াত গ্রহণ করেছে, তখন তারা ইয়াজিদকে এ ব্যাপারটা জানিয়ে চিঠি দিল। তারা ইয়াজিদকে লিখলো, ওহে ইয়াজিদ! তুমিতো নাকে তেল দিয়ে ঘুমাচ্ছে, আর এদিকে তোমার বিরুদ্ধে কুফায় বিদ্রোহ দানা বেঁধে উঠছে, যা তোমার পক্ষে প্রতিরোধ করা খুবই কষ্টসাধ্য হবে। তোমারতো খবরই নেই, তোমার বিরুদ্ধে চল্লিশ হাজার লোক বায়াত গ্রহণ করেছে এবং আরও অনেক লোক বায়াত গ্রহণ করেছে। যদি এ ভাবে চলতে থাকে, তাহলে এখান থেকে এমন এক ভয়ানক ঝড়-তুফানের সৃষ্টি হবে, যা তোমাকে খড়-খুটার মত উড়িয়ে নিয়ে যাবে। তাই তুমি যে ভাবে হোক এটাকে প্রতিরোধ করার চেষ্টা কর।’ যখন ইয়াজিদ এ খবর পেল, সে খুবই দুশ্চিন্তাগ্রস্ত হল। সে অজানা নয় যে, রাজ-ক্ষমতা বড় জিনিস। কেউ নিজ ক্ষমতা সহজে ত্যাগ করতে চায়না। আশ্রয় চেষ্টা করে সেই ক্ষমতা, সেই সিংহাসন নিজ হাতে আঁকড়ে রাখতে চায়। তাই ইয়াজিদের কাছেও যখন তার রাজত্ব হুমকির সম্মুখীন মনে হলো, তখন কুফার গভর্ণর ‘নোমান বিন বশীর’ যিনি হযরত ইমাম মুসলিম (রাঃ) এর বিরুদ্ধে কোন প্রতিকার নেননি, তাকে পদচ্যুত করলো এবং তার স্থলে ইবনে জিয়াদ, যার আসল নাম ছিল, ‘উবায়দুল্লাহ’ যে বড় জালিম ও কঠোর ব্যক্তি ছিল এবং যে বসরার গভর্ণর ছিল, ওকে কুফার গভর্ণর নিয়োগ করলো। তার কাছে চিঠি লিখলো- ‘তুমি বসরার গভর্ণরও থাকবে, সাথে সাথে তোমাকে কুফারও গভর্ণর নিয়োগ করা হলো। তুমি

শীঘ্রই কুফা এসে আমার বিরুদ্ধে যে বিদ্রোহের সৃষ্টি হয়েছে, তা যে ভাবে হোক দমিয়ে ফেলো। এ ব্যাপারে যা করতে হয়, তা করার জন্য তোমাকে পূর্ণ ইখতিয়ার দেয়া হলো। যে ভাবেই হোক, যে ধরণের পদক্ষেপই নিতে হোক না কেন, এ বিদ্রোহকে নির্মূল করে দাও'। ইবনে জিয়াদ ইয়াজিদের পক্ষ থেকে পূর্ণ ক্ষমতা নিয়ে কুফায় আসলো। সে কি ভাবে কুফায় আসল, এর একটা দীর্ঘ কাহিনী আছে। সেই বিষয়ে এখানে আলোচনা করছি। সে কুফায় এসে সর্ব প্রথম যে কাজটি করল, তা হচ্ছে, যত বড় বড় সর্দার ছিল এবং যারা হযরত মুসলিম (রাঃ) এর সাথে ছিল ও বায়াত গ্রহণ করেছিল, তাদের সবাইকে বন্দী করে ফেললো এবং বন্দী করার পর কুফার গভর্ণর ভবনে নজরবন্দী করে রাখলো। এ খবর বিদ্যুৎ বেগে সমগ্র কুফায় ছড়িয়ে পড়লো এবং সমস্ত লোক হতভম্ব ও অস্থির হয়ে গেল, সবাই চিন্তিত হয়ে পড়লো, এখন কি করা যায়। সমস্ত বড় বড় সর্দারকে বন্দী করে ফেলছে এবং ইমাম মুসলিমকে বন্দীর কৌশল নিয়ে চিন্তা ভাবনা করছে। ইমাম মুসলিম যখন দেখলেন যে, বড় বড় সর্দারদেরকে বন্দী করা হয়েছে এবং আরও নুতন নুতন লোক বন্দী করার জন্য চেষ্টা করা হচ্ছে, তখন তিনি তাঁর সমস্ত অনুসারী ও বায়াত গ্রহণকারীদের আহ্বান করলেন। তাঁর ডাকের সাথে সাথে সবাই সাড়া দিল। ঐ চল্লিশ হাজার ব্যক্তি, যারা তাঁর হাতে বায়াত করেছিল, তারা সবাই সমবেত হলো। তিনি এ চল্লিশ হাজার লোকদের হুকুম দিলেন- 'গভর্ণর ভবন ঘেরাও কর'। হযরত মুসলিম (রাঃ) এ চল্লিশ হাজার অনুসারীদেরকে নিয়ে গভর্ণর ভবন ঘেরাও করলেন। তখন অবস্থা এমন উত্তপ্ত ছিল যে, তিনি একটু ইশারা করলে এ চল্লিশ হাজার লোক এক মুহূর্তের মধ্যে গভর্ণর ভবন ধূলিস্যাৎ করে ফেলতো এবং ইবনে জিয়াদ এর কোন প্রতিরোধ করতে পারতো না। কারণ, এ চল্লিশ হাজার লোকের মোকাবেলা করার ক্ষমতা তখন তার ছিল না এবং তখন তার কাছে এত সৈন্যও ছিল না। কিন্তু তকদিরে যা ছিল, তা খভানোর কোন উপায় নেই, আল্লাহ তা'আলার যা মঞ্জুর ছিল, তাতো হবেই। চল্লিশ হাজার লোকের ঘেরাও অভিযান দেখে ইবনে জিয়াদ খুবই ভয় পেল। তবে সে বড় চালাকী ও ধোঁকাবাজীর আশ্রয় নিল। যে সব বড় বড় সর্দারদেরকে গভর্ণর ভবনে নজর বন্দী করে রাখা হয়েছিল, তাদের সবাইকে একত্রিত করে বললো, দেখুন, আপনারা যদি আপনাদের পরিবার-পরিজনের মঙ্গল চান, তাহলে আমার পক্ষ অবলম্বন করুন,

আমার সাথে সহযোগিতা করুন। অন্যথায় আমি আপনাদেরকে হত্যা করার নির্দেশ দিব এবং আপনাদের পরিবারের ও আপনাদের সন্তান-সন্ততিদের যে হাশর হবে, তা দুনিয়াবাসী দেখবে। বন্দী সর্দারেরা বললেন, “আপনি কি চান? কি ব্যাপারে আমাদের সহযোগিতা চান?” ইবনে জিয়াদ বলল— যারা এ মুহুর্তে গভর্ণর ভবন ঘেরাও করে রেখেছে, তারা হয়তো আপনাদের ছেলে হবে বা ভাই হবে বা অন্যান্য আত্মীয় স্বজন হবে। আমি এখন আপনাদেরকে গভর্ণর ভবনের ছাদের উপর নিয়ে যাচ্ছি; আপনারা নিজ নিজ আপনজনদেরকে ডেকে বুঝান, যেন তারা ঘেরাও প্রত্যাহার করে নেয় এবং হযরত ইমাম মুসলিম (রাঃ) এর সঙ্গ ত্যাগ করে। যদি আপনারা এই রকম না করেন, তা হলে সবার আগে আপনাদের হত্যা করার নির্দেশ দিব এবং অতি শীঘ্রই আমার যে সৈন্য বাহিনী আসতেছে, তারা কুফা আক্রমণ করবে, আপনাদের ঘর বাড়ী জ্বালিয়ে দিবে, আপনাদের শিশুদেরকে বর্শার অগ্রভাগে উঠাবে এবং ওদের যে পরিণাম বা হাশর হবে, তা দুনিয়াবাসী দেখবে। তাই আমি আপনাদেরকে বলছি— আমার পক্ষ অবলম্বন করুন, যদি নিজের এবং পরিবার পরিজনের মঙ্গল চান। এভাবে যখন সে হুমকি দিল, তখন বড় বড় সর্দারেরা ঘাবড়িয়ে গেল এবং সবাই বলতে লাগল, জনাব! আপনি যা করতে বলেন, আমরা তা করব। ইবনে জিয়াদ বলল, চলুন, ছাদে উঠুন এবং আমি যা বলছি, তা করুন। সর্দারেরা সাথে সাথে ছাদের উপর উঠলো এবং নিজ নিজ আপনজনদেরকে ডাকতে লাগলো। ডেকে চুপি চুপি বুঝাতে লাগলো, দেখ! ক্ষমতা এখন ইয়াজিদের হাতে, সৈন্য-বাহিনী ইয়াজিদের হাতে, অস্ত্র-সস্ত্র, ধন-সম্পদ ইয়াজিদের হাতে। হযরত ইমাম হোসাইন (রাঃ) অবশ্যই রসূল (সাল্লাল্লাহু তা’আলা আলাইহে ওয়াআলিহি ওয়াসাল্লাম) এর বংশধর। কিন্তু তাঁর (রাঃ) কাছে না আছে রাজত্ব, না আছে সম্পদ, না সৈন্য-সামন্ত, না অস্ত্র-শস্ত্র। তিনি (রাঃ) সৈন্য-সামন্ত, অস্ত্র-শস্ত্র ও ধন-সম্পদ ব্যতিরেকে কি ভাবে ইয়াজিদের মোকাবিলা করবেন? মাঝখানে আমরা বিপদগ্রস্ত হব। এটা রাজনৈতিক ব্যাপার। তাই তোমরা এখন এ ঘেরাও উঠিয়ে নাও এবং হযরত ইমাম মুসলিম (রাঃ) এর সঙ্গ ছেড়ে দাও। স্বরণ রাখিও, তোমরা যদি এ রকম না কর, তা হলে না তোমরা আমাদের মুখ দেখবে আর না আমরা তোমাদের মুখ দেখবো। আমাদেরকে এফুনি কতল করে ফেলবে আর তোমাদের পরিণামও খুব ভয়াবহ হবে’। যখন বড় বড় সর্দারেরা নিজ নিজ আপনজনদেরকে এ ভাবে বুঝ

াতে ও পরামর্শ দিতে লাগল, তখন লোকেরা অবরোধ ছেড়ে দিয়ে নীরবে চলে যেতে লাগল। দশ বিশজন করে এদিক ওদিক থেকে লোক চলে যেতে লাগল। হযরত ইমাম মুসলিম (রাঃ) চল্লিশ হাজার লোক নিয়ে গভর্ণর ভবন ঘেরাও করেছিলেন কিন্তু আসরের পর মাগরিবের আগে মাত্র পাঁচশ জন লোক ছাড়া বাকী সব চলে গেল। এতে হযরত ইমাম মুসলিম (রাঃ) খুবই মর্মান্তিক হলেন। তিনি (রাঃ) ভাবলেন, চল্লিশ হাজার লোক থেকে সাড়ে উনচল্লিশ হাজার চলে গেছে। কেবল পাঁচশ জন রয়ে গেল, তাদের উপরও বা কি করে আস্তা রাখা যায়। হযরত ইমাম মুসলিম যখন এ অবস্থা দেখলেন, তখন যে পাঁচশ জন রয়ে গেল, তাদেরকে বললেন, চলুন আমরা জামে মসজিদে গিয়ে মাগরিবের নামায আদায় করি। নামাযের পর পরামর্শ করব, কি করা যায়। সবাই বললেন, ঠিক আছে, চলুন। তিনি পাঁচশ জন লোককে নিয়ে মসজিদে গেলেন। তখন নামাযের সময় হয়ে গিয়েছিল, আযান হয়েছে। তিনি ইমাম হলেন। পাঁচশ জন পিছনে ইক্তেদা করলেন। তিন রাকাত ফরয নামায পড়ার পর যখন সালাম ফিরালেন, তখন দেখলেন, ঐ পাঁচশ জনের মধ্যে কেউ নেই। আহ! সকালে চল্লিশ হাজার লোক সাথে ছিল, এখন একজনও নেই। এরা তারাই, যারা নিজেদেরকে আহলে বায়াতের একান্ত ভক্ত বলে দাবী করতো, যাদের পূর্ব পুরুষেরা আহলে বায়াতের অনুসারী বলে দাবীদার ছিল। এরাই চিঠি লিখেছিল, এরাই হযরত ইমাম হুসাইন (রাঃ) কে কুফায় আসার জন্য আহ্বান জানিয়েছিল, এরাই জান কুরবানের নিশ্চয়তা দিয়েছিল। এরাই হযরত ইমাম মুসলিমের হাতে বায়াত করেছিল এবং বড় বড় শপথ করে ওয়াদা করেছিল যে, 'জান দেবে তবুও তাঁর (রাঃ) সঙ্গ ত্যাগ করবে না।' কিন্তু তাদের জানও দিতে হল না, তীর দ্বারা আহতও হতে হল না, গুলি বিদ্ধ হতে হল না, কেবল ইবনে জিয়াদের ধমকেই তাঁর (রাঃ) সঙ্গ ছেড়ে দিল এবং বিশ্বাসঘাতকতা করল। হযরত মুসলিম নামায শেষে আল্লাহ! আল্লাহ! করছিলেন এবং মনে মনে ভাবছিলেন, এখন কি করা যায়, সব লোকতো আমাকে ছেড়ে চলে গেল। এ দিকে আমি হযরত ইমাম হুসাইন (রাঃ) কে চিঠি লিখে দিয়েছি যে, এখানকার অবস্থা খুবই সন্তোষজনক। এখানকার লোকদের মনে তাঁর (রাঃ) প্রতি আন্তরিক ও অসীম মহব্বত রয়েছে। চিঠি পাওয়ার পর হযরত ইমাম হুসাইন (রাঃ) তো এক মুহূর্তও বিলম্ব করবেন না। তিনি (রাঃ) খুবই জলদি এসে যাবেন। তখন

তাঁর (রাঃ) কি যে প্রতিক্রিয়া হবে, যখন দেখবেন এ সব লোকেরা আমার সাথে বিশ্বাসঘাতকা করেছে। যা হোক তিনি (রাঃ) মসজিদ থেকে বের হয়ে নিজ মুরিদদের কাছে গেলেন। কিন্তু যেই মুরিদের কাছেই গেলেন, দেখলেন যে, ঘরের দরজা ভিতর থেকে বন্ধ। ডাকাডাকি করার পরও ঘরের দরজা খুলে না। হায়রে! যারা বড় বড় ওয়াদা করেছিল এবং আহলে বায়তের ভক্ত বলে দাবী করেছিল, তারা ঘরের দরজা ভিতর থেকে বন্ধ করে রাখল। হযরত ইমাম মুসলিম (রাঃ) কুফার রাস্তায় এমন অসহায় অবস্থায় ঘুরতে লাগলেন, যেমন একজন সহায়-সম্বলহীন মুসাফির ঘুরাফিরা করে। তিনি (রাঃ) বড় পেরেশানির সাথে অলি-গলিতে হাঁটতে লাগলেন। এ ভাবে ঘুরতে ঘুরতে এক জায়গায় গিয়ে এক বৃদ্ধাকে দেখলেন, যিনি ঘরের দরজা খুলে বসেছিলেন। তিনি (রাঃ) তার কাছে গিয়ে পানি চাইলেন। বৃদ্ধা পানি দিলেন এবং জিজ্ঞাসা করলেন- তিনি (রাঃ) কে? কোথা থেকে আসছেন? কার সঙ্গে দেখা করবেন এবং কোথায় যাবেন? যখন বৃদ্ধা তাঁর (রাঃ) অবস্থা জিজ্ঞাসা করলেন, তখন তিনি (রাঃ) অকপটে বললেন, ওহে বোন! আমি মুসলিম বিন আকিল, হযরত হুসাইন বিন আলী (রাঃ) এর প্রতিনিধি হয়ে কুফায় এসেছিলাম। মহিলাটি আশ্চর্য হয়ে বললেন, 'আপনি মুসলিম বিন আকিল! আপনি এ ভাবে অসহায়ভাবে ঘুরাফিরা করছেন! কুফার সবাই জানে যে, আপনার হাতে হাজার হাজার লোক বায়াত হয়েছে এবং সবাই আপনার জন্য জান-মাল কুরবান করতে প্রস্তুত। কিন্তু এখন আমি কি দেখছি! আপনি যে এ ভাবে অসহায়, একাকী ঘুরাফিরা করছেন! হযরত মুসলিম বিন আকিল (রাঃ) বললেন- 'হাঁ বোন। বাস্তবিকই তা ছিল। কিন্তু তারা আমার সাথে বেঈমানী করেছে। তাই আপনি আমাকে এই অবস্থায় দেখছেন। কুফার কোন ঘরের দরজা আজ আমার জন্য খোলা নেই, এমন কোন জায়গা নেই, যেখানে আমি রাত্রি যাপন করতে পারি এবং আশ্রয় নিতে পারি। বৃদ্ধা বললেন, আমার গরীবালয় আপনার জন্য খোলা আছে, আমার জন্য এর থেকে বড় সৌভাগ্য আর কি হতে পারে যে, রসুলুল্লাহ (সাল্লাল্লাহু তা'আলা আলাইহে ওয়াআলিহি ওয়াসাল্লাম) এর একজন আওলাদ আমার ঘরে মেহমান হয়েছেন। সেই বৃদ্ধাটি তাঁকে (রাঃ) ঘরে জায়গা দিলেন। শেষ পর্যন্ত তিনি (রাঃ) বুড়ীর ঘরে আশ্রয় নিলেন। সেখানে তিনি (রাঃ) রাত যাপন করলেন। খোদার কুদরত! ঐ বুড়ীর এক ছেলে ছিল বড় নাফরমান। এটা খোদারই শান,

নেক্কার থেকে বদকার এবং বদকার থেকে নেক্কার পয়দা হয়। يُخْرِجُ الْحَيَّ مِنَ الْحَيِّ مِنْ الْمَيِّتِ وَيُخْرِجُ الْمَيِّتَ مِنَ الْحَيِّ অর্থাৎ তিনি জিন্দা থেকে মুর্দা বাহির করেন এবং মুর্দা থেকে জিন্দা। আল্লাহ তাআলা মুমিনদের ঘরে কাফির সৃষ্টি করেন এবং কাফিরদের ঘরে মুমিন। কাফিরের ঘরে লালিত খলিলুল্লাহ (আঃ) মূর্তি নিধনকারী হয়ে যায়। আবার নূহ (আঃ) এর ঘরে জন্ম ও লালিত পালিত হয়ে তাঁর ছেলে কাফির হয়ে যায়। ফেরাউনের স্ত্রী বেহেস্টের সর্দারনী হয়ে যায় আর হযরত লুত (আঃ) এর স্ত্রী হয়ে যায় কাফির। কোন এক কবি খুব সুন্দর বলেছেন—

که زاده آذر خلیل الله ہو - اور بیٹا نوح کا گمراہ ہو

اهلیہ لوط نبی ہو کافرہ - اور زوجہ فرعون ہوئی طاہرہ

অর্থাৎ ফেরাউনের ঘরে লালিত পালিত হযরত মুসা (আঃ) খলিলুল্লাহ হয়ে যান। আর নূহ (আলাইহিস সালাম) এর পুত্র হয়ে যায় গোমরাহ। লুত (আলাইহিস সালাম) এর স্ত্রী হয়ে যায় ‘কাফেরা’ আর ফেরাউনের স্ত্রী হয়ে যায় ‘তাহেরা’ (পবিত্র)। এটা খোদা তাআলারই শান, খোদার শানের অদ্ভুত প্রকাশ। তিনি মুমিনের ঘরে কাফির এবং কাফিরের ঘরে মুমিন সৃষ্টি করেন। তিনি বদ্বখতের ঘরে নেকবখত এবং নেকবখতের ঘরে বদ্বখত পয়দা করেন। যিনি বেনিয়াজ, তিনি যা ইচ্ছে তা করতে পারেন- يَفْعَلُ اللَّهُ مَا يَشَاءُ শেষ রাতে বুড়ীর ছেলে ঘরে আসল, মাকে পেরেশান দেখে জিজ্ঞাসা করল, মা, তুমি চিন্তিত কেন? মা বললেন, বেটা! মুসলিম বিন আকিল (রাঃ) যিনি আমাদের প্রিয় নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর খানদানের একজন, তিনি (রাঃ) কুফায় এসেছিলেন হযরত ইমাম হুসাইন (রাঃ) এর প্রতিনিধি হয়ে। কুফাবাসী তাঁর (রাঃ) হাতে বায়াত করেছিল, তারা তাঁর (রাঃ) সাথে সাথে থাকত এবং জান মাল কুরবানী করার নিশ্চয়তা দিয়েছিল। কিন্তু বর্তমান গভর্ণরের ধমকীতে সবাই তাঁর (রাঃ) সঙ্গ ত্যাগ করেছে এবং বেঈমানী করে তাঁর (রাঃ) জন্য প্রত্যেকে ঘরের দরজা বন্ধ করে দিয়েছে। তিনি অসহায় অবস্থায় অলি গলিতে ঘুরছিলেন। যাক, খোদা আমাকে সৌভাগ্যবান করেছেন, আজ তিনি আমার ঘরে মেহমান এবং আমার ঘরে অবস্থান করছেন। তিনি আজ আমার গরীবালয়ে কদম রেখেছেন। এর

জন্য আমি আজ গর্ববোধ করছি যে, আমি তাঁর (রাঃ) মেহমানদারীর সুযোগ লাভ করলাম। এই জন্য এক দিকে আজ আমি খুবই আনন্দিত আর অন্যদিকে আমি খুবই দুঃখিত, এই জন্য যে, কুফাবাসীরা একজন সম্মানিত মেহমানের সাথে এ ধরণের বেঈমানী করতে পারল। মা যখন এ সব ঘটনা বলছিল, ছেলে মনে মনে খুবই খুশী হল এবং মনে মনে বলতে লাগল শিকার হাতের মুঠোয়, এটাতো বড় সৌভাগ্যের বিষয়। আমার মা'তো একজন সাদাসিধে মহিলা। তিনি কি জানেন ইবনে জিয়াদের ঘোষণার কথা? ইবনে জিয়াদ তো ঘোষণা করেছে, যে মুসলিম বিন আকিলকে গ্রেফতার করতে পারবে, তাকে এত হাজার দেরহাম পুরস্কার দেয়া হবে। যা হোক, তিনি যখন সৌভাগ্যবশতঃ আমার ঘরে এসে গেলেন, আমি খুবই সকালে গিয়ে খবর দিয়ে উনাকে আমার ঘর থেকে গ্রেফতার করাবো এবং হাজার দেরহাম পুরস্কার লাভ করব। ছেলের এই অসৎ উদ্দেশ্যে ও ইচ্ছা মার কাছে গোপন রাখলো। এ দিকে সে অস্থির হয়ে পড়ল, কখন সকাল হবে, কখন খবর পৌঁছাবে এবং পুরস্কার লাভ করবে। ফজর হওয়া মাত্রই সে তার কয়েক জন বন্ধুদের সাথে নিয়ে ইবনে জিয়াদকে খবর দিল যে, হযরত মুসলিম (রাঃ) ওর ঘরে, সে হল সংবাদদাতা এবং সে পুরস্কারের দাবীদার। ইবনে জিয়াদ বলল, 'তোমার পুরস্কার তুমি নিশ্চয় পাবে, প্রথমে ওনাকে গ্রেফতার করার ব্যবস্থা কর।' সে বলল, ঠিক আছে, আমার সাথে সৈন্য পাঠিয়ে দিন।' তার কথামত তার সাথে সত্তরজন সৈন্য গেল এবং সেই মহিলাটির ঘর চারদিক থেকে ঘেরাও করে ফেলল। হযরত মুসলিম (রাঃ) অবস্থা বেগতিক দেখে তলোয়ার নিয়ে বের হলে সৈন্যরা জঘন্যভাবে বেয়াদবী করল এবং এমন ভাষা উচ্চারণ করল, যা মোটেই সহনীয় নয়। ওরা হযরত ইমাম হুসাইন (রাঃ) এর কঠোর সমালোচনা করলো এবং ইয়াজিদের প্রশংসা করলো। আর তাঁর (রাঃ) বিরুদ্ধে বিদ্রোহের অভিযোগ আনল। হযরত ইমাম মুসলিম (রাঃ) এ সবার যথার্থ উত্তর দিলেন। কিন্তু ইত্যবসরে ওরা তীর নিক্ষেপ করল। হযরত ইমাম মুসলিম (রাঃ) বললেন, যদি আলোচনা করতে চাও তাহলে বুদ্ধিমত্তার সহিত আলোচনা কর। আর যদি তীর নিক্ষেপ করার ইচ্ছা করো, আমিও এর যথোচিত জবাব দেব।' ওরা বলল, ঠিক আছে শক্তি থাকলে জবাব দিন। তাদের কথা শুনে হযরত ইমাম মুসলিম (রাঃ) তাদের সামনা-সামনি এসে গেলেন এবং তলোয়ার চালাতে শুরু করলেন। তিনি

একাই সত্তরজনের সাথে মোকাবিলা করতে লাগলেন আর এ দিকে ওরা তাঁর (রাঃ) বীর বিক্রম আক্রমণে হতভম্ব হয়ে গেল এবং তারা মনে মনে বলল, আমরা ধরাকে সরা জ্ঞান করে ভুল করলাম। তাঁর (রাঃ) সুনিপুণ তলোয়ার চালনার সামনে ওরা টিকতে না পেরে পিছ পা হল। তবুও তিনি কয়েক জনকে হত্যা করতে সক্ষম হলেন এবং অনেককে আহত করলেন। এই অবস্থায় তিনি নিজেও আহত হলেন। একটা তীরের আঘাতে তাঁর (রাঃ) সামনের একটি দাঁত ভেঙ্গে গেল এবং রক্ত বের হচ্ছিল। তিনি বৃদ্ধার কাছে পানি চাইলেন। বৃদ্ধা তাঁকে (রাঃ) পান করার জন্য এক গ্লাস পানি দিলেন। যখন তিনি পানি মুখে নিলেন, তখন সেই পানি মুখের রক্তে লাল হয়ে গেল। শেষ পর্যন্ত তিনি পানি পান করলেন না। গ্লাসটা মাটিতে রেখে তিনি মনে মনে বললেন, হয়তঃ দুনিয়ার পানি আমার কপালে আর নেই। আমি জান্নাতুল ফেরদাউসে গিয়ে তৃষ্ণা নিবারণ করব। অতঃপর হয়রত ইমাম মুসলিম (রাঃ) পুনরায় লড়াইতে শুরু করলেন। এ খবর যখন ইবনে জিয়াদের কাছে পৌঁছল তখন সে মুহাম্মদ বিন আশআসকে পাঠালো এবং তাকে বলল, তুমি গিয়ে কুটনৈতিক ও রাজনৈতিক পন্থায় তাঁকে (রাঃ) বন্দী করে আমার কাছে নিয়ে এসো। ইবনে আশআস হয়রত ইমাম মুসলিম (রাঃ) এর কাছে এসে বলল, ‘ওরা আসলে বোকামী করেছে। ওদেরকে ইবনে জিয়াদ মোকাবিলা বা লড়াই করার জন্যে পাঠায়নি। তাদেরকে পাঠানো হয়েছিল আপনাকে ডেকে নিয়ে যাওয়ার জন্য। আপনি আমার সাথে গভর্ণর ভবনে চলুন। আপনি গভর্ণরের সাথে কথা বলুন, তিনি আপনার সাথে মত বিনিময় করতে চান। কারণ কয়েক দিনের মধ্যে হয়রত ইমাম হুসাইন (রাঃ)ও কুফায় এসে পৌঁছবেন। তাই তিনি চাচ্ছেন, এ সময়ে যেন কোন ফিতনা ফ্যাসাদের সৃষ্টি না হয়। গভর্ণরের কাছে চলুন, কথাবার্তার মাধ্যমে একটা সিদ্ধান্তে উপনীত হোন। মত বিনিময়ের মাধ্যমে হয়রত সন্ধিও হয়ে যেতে পারে।’ হয়রত ইমাম মুসলিম (রাঃ) বললেন, আমিওতো তাই চাচ্ছি। তা না হলে আমি যখন চল্লিশ হাজার সমর্থক নিয়ে গভর্ণর ভবন ঘেরাও করেছিলাম, তখন আমার একটু ইশারায় গভর্ণর ভবন তছনছ হয়ে যেতো এবং ইবনে জিয়াদকে গ্রেফতার করা কোন ব্যাপার ছিল না। কিন্তু আমি এটা নিজে পছন্দ করি না যে, মারামারি বা খুন-খারাবী হোক। মুহাম্মদ বিন ‘আশআস’ বলল, আমার সাথে চলুন, সৈন্যদেরকে ধমকের সুরে বলল, তলোয়ার খোলা রেখেছ কেন? বেকুবের দল কোথাকার,

তলোয়ার খাপের মধ্যে ভরে রেখ। এ ভাবে ওদেরকে ধমক দিল আর উনাকে (রাঃ) নিয়ে গেল। হযরত মুসলিম তার সাথে গেলেন এবং গভর্ণর ভবনে প্রবেশ করার সময় এই দুআটি পড়লেন— رَبَّنَا افْتَحْ بَيْنَنَا وَبَيْنَ قَوْمِنَا— এই দুআটি পড়তে পড়তে তিনি (রাঃ) গভর্ণর ভবনের শাহী দরজায় প্রবেশ করলেন। এ দিকে ইবনে জিয়াদ উনুক্ত তলোয়ারদারী কিছু সিপাহীকে দরজার দু'পাশে নিয়োজিত করে রেখেছিল এবং তাদেরকে নির্দেশ দেয়া হয়েছিল, ইমাম মুসলিম (রাঃ) এ দরজা দিয়ে প্রবেশ করা মাত্রই দু'দিক থেকে আক্রমণ করে যেন হত্যা করা হয়। নির্দেশ মত যখনই তিনি (রাঃ) গভর্ণর ভবনের দরজায় পা রাখলেন, তখনই তাঁর (রাঃ) উপর দু'দিক থেকে তলোয়ার দ্বারা আক্রমণ করা হল এবং সেখানেই তিনি শাহাদাত বরণ করেন। (ইন্না লিল্লাহে ওয়া ইন্না ইলাইহে রাজেউন।)

কতক উলামায়ে কিরাম তাঁদের কিতাবে লিখেছেন যে, তিনি (রাঃ) যথারীতি ইবনে জিয়াদের কাছে পৌঁছেন এবং আলোচনা করেন। ইবনে জিয়াদ হযরত ইমাম মুসলিম (রাঃ) কে বলল, দেখুন, আপনি বড় অপরাধী সাব্যস্ত হয়েছেন। তথাপি একটি শর্তে আমি আপনাকে রেহাই দিতে পারি। শর্তটি হচ্ছে, আপনি ইয়াজিদের বায়াত গ্রহণ করুন এবং প্রতিশ্রুতি দিন যে, যখন হযরত ইমাম হুসাইন (রাঃ) আসবেন, তাঁকেও ইয়াজিদের বায়াত করিয়ে দিবেন। এতে সম্মত হলে আপনাকে আমি মুক্তি দিতে পারি। অন্যথায় আপনার ও হযরত হুসাইন ইবনে আলী (রাঃ) এর কোন নিস্তার নেই। হযরত ইমাম মুসলিম (রাঃ) উত্তরে বললেন, 'প্রস্তাব মন্দ নয়, তবে আমি কিংবা হযরত ইমাম হুসাইন (রাঃ) ইয়াজিদের হাতে বায়াত করতে পারি না। এটা কখনো কল্পনাও করা যায় না যে, আমরা ইয়াজিদের কাছে বায়াত হবো। তাই তোমার যা ইচ্ছা তা করতে পার।' ইবনে জিয়াদ পুনরায় বলল, যদি আপনি বায়াত গ্রহণ না করেন ও ইমাম হুসাইন (রাঃ) কে বায়াত করার ব্যবস্থা না করেন, তাহলে আমি আপনাকে হত্যা করার নির্দেশ দিব। হযরত ইমাম মুসলিম (রাঃ) দৃঢ়কণ্ঠে বললেন— 'তোমার যা ইচ্ছা তা করতে পার।' ইবনে জিয়াদ জল্লাদদেরকে নির্দেশ দিল উনাকে গভর্ণর ভবনের ছাদের উপর নিয়ে গিয়ে কতল করে দাও এবং মাথা কেটে আমার কাছে পাঠিয়ে দাও আর দেহকে রশি বেধে বাজারে হেঁচড়াও যাতে হাড় চুরমার হয়ে যায় এবং লোকেরা যেন এই দৃশ্য

অবলোকন করে।' জল্লাদদেরকে হুকুম করার পর, ওরা যখন তাঁকে (রাঃ) ধরতে আসল, তখন হযরত ইমাম মুসলিম (রাঃ) দেখলেন যে, গভর্ণর ভবনের চারিদিকে লোকে লোকারণ্য। তারা সব এসেছে তামাশা দেখার জন্য। কিন্তু আফসোস! এদের মধ্যে এমন অনেক লোক এসেছে যারা হযরত ইমাম মুসলিম (রাঃ) এর হাতে বায়াত গ্রহন করেছিল, যারা চিঠি লিখে ইমাম হুসাইন (রাঃ) কে কুফা আসার আমন্ত্রন জানিয়েছিল। হযরত ইমাম মুসলিম(রাঃ) ওদেরকে দেখে বললেন, 'ওহে কুফাবাসীরা! তোমরা বেঈমানী করেছ, তা সত্ত্বেও আমি তোমাদেরকে তিনটি কাজের দায়িত্ব দিচ্ছি। যদি পার, এই তিনটি কাজ তোমরা নিশ্চয় করবে। প্রথম কাজ হচ্ছে, আমার কাছে যে হাতিয়ারগুলো আছে, এ গুলো বিক্রি করে টাকা গুলো অমুক অমুককে দিও। কারণ, আমি ওদের কাছে ঋণী। দ্বিতীয় কাজ হচ্ছে, যখন আমার মস্তক বিচ্ছিন্ন করে ইবনে জিয়াদের কাছে পাঠিয়ে দেয়া হবে এবং আমার লাশ বাইরে নিক্ষেপ করবে, তোমরা আমার লাশটি যথাস্থানে দাফন করিও। তৃতীয় কাজ হচ্ছে, যদি তোমাদের কাছে এক তিল পরিমাণও ঈমান থাকে এবং আহলে বায়তের প্রতি এক কণা পরিমাণও মহব্বত থাকে, তাহলে যে কোন উপায়ে তোমরা হযরত ইমাম হুসাইন (রাঃ) এর কাছে এ সংবাদ পৌঁছে দিও, যেন তিনি কুফায় তশরীফ না আনেন।' ইহা শুনে ইবনে জিয়াদ খুবই রাগান্বিত হল এবং চারিদিকে ঘুরে সবাইকে বলল, খবরদার! 'যারা মুসলিমের এ সব কথামত কাজ করবে, আমি তাদেরকে কতল করবো এবং তাদের ছেলে-মেয়েদেরকে বর্শার অগ্রভাগে উঠাবো, যাতে কেউ যেন মুসলিমের কথা অনুসরণ করতে না পারে এবং হযরত ইমাম মুসলিমকে লক্ষ্য করে বলল- আমি আপনার হাতিয়ারগুলো আমাদের মুজাহিদ বাহিনীর মধ্যে বন্টন করব এবং আপনার লাশকে দাফন করতে দেব না। বরং কুফার অলিতে-গলিতে ঘুরাবো এবং জনগণকে দেখাবো। তাই যারা আমার পক্ষ অবলম্বন করবে, তারা যেন মুসলিমের কোন কথা না শুনে। আর হযরত হুসাইন (রাঃ) কে খবর দেওয়া থেকে বাধা দেয়ার কারণ হল, তাঁকে (রাঃ) এখানে আনা চাই এবং তাঁকেও বিদ্রোহীতার স্বাদ উপভোগ করাতে চাই। ইবনে জিয়াদের এ দণ্ডোক্তি শুনে ইমাম মুসলিম (রাঃ) অস্থির হয়ে উঠলেন এবং হযরত ইমাম হুসাইন (রাঃ) এর পরিণতির কথা চিন্তা করে ও কুফাবাসীর বিশ্বাস-ঘাতকতার কথা স্মরণ করে কান্নায় ভেঙ্গে পড়লেন। এমনি সময়ে জল্লাদেরা তাঁকে ধরে ছাদের এক কিনারে নিয়ে গেল। তিনি তাদের কাছে দুই রাকাত নফল নামায পড়ার অবকাশ চাইলেন। কিন্তু তারা সেই সুযোগটাও দিল না। তিনি অশ্রু সজল নয়নে মক্কা-

মদীনার দিকে তাকায়ে বললেন, ওহে আমার মওলা হুসাইন! আমার এই অবস্থার খবর আপনাকে কে পৌঁছাবে, আমার সাথে কী যে নির্মম আচরণ করা হচ্ছে। হায়রে! আমি যদি আপাকে চিঠি না লিখতাম এবং কুফার অবস্থা সন্তোষজনক না জানাতাম, তাহলে আপনি এখানে কখনো আসতেন না। কুফাবাসীরা আজ আমার সাথে যে ভাবে বিশ্বাসঘাতকতা করলো, জানি না আপনার সাথে কি ধরণের আচরণ করবে এবং আপনার কি হাশর হবে। তিনি এ সব চিন্তায় মগ্ন ছিলেন। এদিকে জল্লাদেরা তাঁকে ছাদে শোয়ায়ে শরীর থেকে মস্তক মুবারক বিচ্ছিন্ন করে ফেলল।

হযরত ইমাম হুসাইন (রাঃ) এর কুফা যাত্রা

খোদার কীয়ে লীলা! যে দিন হযরত মুসলিম কুফায় শহীদ হলেন, সে দিন হযরত ইমাম হুসাইন (রাঃ) প্রিয়জন ও আপনজনদের নিয়ে মক্কা শরীফ থেকে যাত্রা করলেন। কারণ, উনার কাছে চিঠি পৌঁছেছিল যে, কুফার অবস্থা খুবই সন্তোষজনক, তিনি যেন বিনা দ্বিধায় অনতিবিলম্বে তশরীফ নিয়ে আসেন। তিনি তাঁর (রাঃ) বিবিগণ, বোন, ছেলেমেয়ে এমনকি দুগ্ধপোষ্য শিশুদেরকেও সঙ্গে নিলেন এবং মক্কা মুকাররমা থেকে বের হলেন। উলামায়ে কিরাম লিখেছেন যে, তাঁর (রাঃ) কাফেলায় তিরিশিজন ছিল, যাদের মধ্যে মহিলা, দুগ্ধপোষ্য শিশুও ছিল। তাঁর (রাঃ) সঙ্গে কয়েকজন যুবক বন্ধু-বান্ধবও ছিল। আল্লাহ! আল্লাহ! এখানে একটি কথা বিশেষভাবে স্মরণীয় যে, হযরত ইমাম হুসাইন (রাঃ) যুদ্ধ করার উদ্দেশ্যে কিংবা মোকাবিলা করার উদ্দেশ্যে বের হন নি। আপনারা নিশ্চয় বুঝতে পারছেন যে যারা যুদ্ধ বা মোকাবিলা করার উদ্দেশ্যে বের হয়, তারা কখনো মেয়েলোক ও দুগ্ধপোষ্য শিশুদের নিয়ে বের হয় না। হযরত ইমাম হুসাইন (রাঃ) এর নিজের বিবি ও দুগ্ধপোষ্য শিশুদের নিয়ে বের হওয়াটা এটাই প্রমাণিত করে যে, তিনি যুদ্ধ কিংবা মোকাবিলার উদ্দেশ্যে বের হননি। তাঁর (রাঃ) কাছে তো চিঠি এসেছে যে, সেখানকার অবস্থা খুবই সন্তোষজনক, চল্লিশ হাজার লোক বায়াত করেছে, কুফাবাসীরা দারুণ মেহমানদারী করছে। তাই তিনি তাঁর আপন জনদের নিয়ে বের হয়েছেন এবং যুদ্ধ করার কোন অস্ত্র শস্ত্র রাখেননি। হযরত ইমাম হুসাইন (রাঃ) মক্কা শরীফ থেকে কুফার উদ্দেশ্যে বের হয়ে কিছু দূর যাবার পর পথে তিনি হযরত ইমাম মুসলিম (রাঃ) এর শাহাদাত বরণের খবর পেলেন। হযরত ইমাম মুসলিম (রাঃ) এর শাহাদাতের খবর শুনে তিনি এবং তাঁর

সফরসঙ্গীগণ একেবারে হতবাক হয়ে গেলেন। কোথা থেকে কি হয়ে গেল। মাত্র কয়েকদিন আগে হযরত ইমাম মুসলিম (রাঃ) এর চিঠি আসল, কুফার অবস্থা খুবই সন্তোষজনক অথচ এখন শুনছি তাঁকে শহীদ করে ফেলেছে। এটা কি ধরণের ঘটনা! যা হোক, তাঁরা পিছপা হলেন না, সম্মুখপানে অগ্রসর হলেন। তাঁদের সিদ্ধান্ত হল, ওখানে যাওয়া যাক এবং কি ভাবে এত তাড়াতাড়ি এ ধরণের ঘটনা ঘটে গেল, তা জানা দরকার। এ মনোভাব নিয়ে তাঁরা কুফার দিকে ধাবিত হলেন।

কারবালা প্রান্তরে ইমাম হুসাইন (রাঃ)

কুফা থেকে দুই মঞ্জিল দূরত্বে কারবালার প্রান্তরে যখন তাঁরা পৌঁছলেন, তখন হুর বিন ইয়াজিদ রিয়াহী এক হাজার সৈন্য নিয়ে হযরত ইমাম হুসাইন (রাঃ) এর সাথে মোলাকাত করলেন এবং বললেন— জনাব ইমামে আ'লা (রাঃ)! আমি আপনাকে খেফতার করার জন্য এসেছি। তিনি (রাঃ) জিজ্ঞাসা করলেন, কেন? সে বললো, তা আমি জানিনা, তবে কুফার গভর্নর ইবনে জিয়াদ নির্দেশ দিয়েছে আপনাকে যেখানে পাওয়া যায়, খেফতার করে তাঁর কাছে যেন পৌঁছে দেয়া হয়। তিনি (রাঃ) ফরমালেন, আমার কি অপরাধ? সে বলল, আপনি ইয়াজিদের বিরুদ্ধে বিদ্রোহ করেছেন, ইয়াজিদের বিরুদ্ধে এখানে জনগনের মধ্যে অসন্তোষ সৃষ্টি করেছেন এবং জনগণের বায়াত গ্রহণ করেছেন। তিনি (রাঃ) বললেন— ‘আমি তো কোন জন অসন্তোষ সৃষ্টি করিনি এবং ক্ষমতা দখলেরও কোন ইচ্ছা আমার নেই। আসল কথা হলো, কুফাবাসী আমার কাছে চিঠি লিখেছে, যার ফলে শরীয়তের দৃষ্টিকোণ থেকে বিচার করে আমি এখানে আসতে বাধ্য হয়েছি। তবে যদি কুফাবাসী বেঈমানী করে এবং অবস্থার যদি পরিবর্তন হয়, তা হলে আমি ফিরে যেতে রাজি আছি। যখন হযরত ইমাম হুসাইন (রাঃ) হুরের সঙ্গে আলোচনা করলেন এবং হুরকে সমস্ত বিষয় অবহিত করালেন, তখন সে খুবই দুঃখিত হল। হুর বলল, এই মূহর্তে যদি আমি আপনাকে চলে যেতে দিই, আমার সঙ্গী সাথীদের মধ্যে কেউ নিশ্চয় ইবনে জিয়াদের কাছে গিয়ে আমার বিরুদ্ধে অভিযোগ করবে এবং ইবনে জিয়াদ আমার উপর জুলুম করবে। সে বলবে ‘তুমি জেনে শুনে দুশমনকে ছেড়ে দিয়েছ, আপোষে যাওয়ার সুযোগ করে দিয়েছ।’ ফলে আমার উপর মুসিবতের পাহাড় নাযিল হবে। তাই আপনি একটা কাজ করতে পারেন— এ ভাবে আমার সঙ্গে সারাদিন কথাবার্তা চালিয়ে যেতে থাকেন, যখন রাত হবে,

আমার সৈন্যরা শুয়ে পড়বে এবং চারিদিকে অন্ধকার নেমে আসবে, তখন আপনি আপনার আপনজনদের নিয়ে এখান থেকে চলে যাবেন। সকালে আমরা আপনাকে খোঁজ করব না, আপনার পিছু নেব না। সোজা ইবনে জিয়াদের কাছে গিয়ে বলব, উনি রাতের অন্ধকারে আমাদের অজান্তে চলে গেছেন এবং উনি কোন্ দিকে গেছেন কোন হৃদিস পাইনি। এরপর যা হওয়ার আছে, তাই হবে। হযরত ইমাম হুসাইন (রাঃ) বললেন, 'ঠিক আছে।' যখন রাত হল, চারিদিকে অন্ধকার ঘনীভূত হয়ে আসল এবং সৈন্যরা ঘুমিয়ে পড়ল, তখন হযরত ইমাম হুসাইন (রাঃ) নিজের সঙ্গী সাথীদেরকে যাত্রা করার নির্দেশ দিলেন। সবাই বের হয়ে গেলেন। সারা রাত হযরত ইমাম হুসাইন (রাঃ) এর কাফেলা পথ চললো, কিন্তু ভোরে তারা তাদেরকে ঐ জায়গাতেই দেখতে পেলেন, যেখান থেকে যাত্রা শুরু করেছিলেন। এই অবস্থা দেখে সবাই আশ্চর্য হয়ে গেল, এটা কেমনে হলো! আমরা সারা রাত পথ চললাম, কিন্তু সকালে আবার একই জায়গায়। এ কেমন কথা! হুর তাঁদেরকে দেখে জিজ্ঞাসা করলো, আপনারা কি যাননি? ইমাম হুসাইন (রাঃ) বললেন, আমরা ঠিকই চলে গিয়েছিলাম, কিন্তু যাওয়ার পরওতো যেতে পারলাম না, দিক হারা হয়ে আবার একই জায়গায় ফিরে আসলাম। হুর বলল, ঠিক আছে, চিন্তার কিছু নেই। আজ আমরা পুনরায় দিন ভর আলোচনা করতে থাকব এবং আমার সৈন্যদেরকে বলব, আমাদের মধ্যে এখনও কোন ফয়সালা হয়নি, আলোচনা অব্যাহত রয়েছে। আজ রাত্রেই আপনি চলে যাবেন। হযরত ইমাম হুসাইন (রাঃ) দ্বিতীয় রাত্রিতেও সঙ্গী সাথীদেরকে নিয়ে বের হলেন। সারা রাত তিনি ও তাঁর সফরসঙ্গীগণ পথ চললেন। ভোর যখন হল, তখন পুনরায় তাঁরা তাদেরকে সেই একই জায়গায় পেলেন, যেখান থেকে তাঁরা বের হয়েছিলেন। উপর্যুপরি তিন রাত এ রকম হল। সারা রাত তাঁরা পথ চলতেন, কিন্তু ভোর হতেই তাঁদেরকে ঐ জায়গায় পেতেন, যেখান থেকে তাঁরা বের হতেন। চতুর্থ দিন জনৈক পথিক তাঁদের পার্শ্ব দিয়ে যাচ্ছিল, তিনি (রাঃ) ওকে ডেকে জিজ্ঞাসা করলেন, ভাই, যে জায়গায় আমরা দাঁড়িয়ে আছি, এই জায়গাটার নাম কি? লোকটি বললো, জনাব! এই জায়গাটার নাম 'কারবালা'। কারবালা শব্দটি শূনার সাথে সাথেই হযরত ইমাম হুসাইন (রাঃ) আঁতকে উঠলেন এবং বললেন, 'আমার নানা জান (সাল্লাল্লাহু আলাইহে ওয়াআলিহি ওয়াসাল্লাম) ঠিকই বলেছেন, 'হুসাইন কারবালার ময়দানে শহীদ হবে।' এটাতো আমার শাহাদাতের স্থান। আমি এখান থেকে কি ভাবে চলে যেতে পারি। উপর্যুপরি তিন রাত্রি প্রস্থান করার পর পুনরায় একই জায়গায় প্রত্যাবর্তন এ কথাই প্রমাণিত করে যে, এটা

আমার শাহাদাতের স্থান। এখান থেকে আমি কিছুতেই বের হতে পারব না। তিনি তাঁর প্রিয়জনদের বললেন, 'সওয়ারী থেকে অবতরণ করে তাঁরু খাটাও। নির্দেশ মত তাঁর (রাঃ) সাথীরা সওয়ারী থেকে অবতরণ করে তাঁরু খাটাতে শুরু করলেন। কিন্তু যেখানেই তাঁরু খুঁটি পুঁততে গেলেন, সেখান থেকে টাটকা রক্ত বের হলো। এই দৃশ্য দেখে সবাই হতভম্ব হয়ে গেল। হযরত সৈয়দা জয়নাব (রাঃ) যখন দেখলেন যে, মাটিতে যেখানেই খুঁটি পুঁততে চাইলেন, সেখান থেকে রক্ত বের হয়ে আসছে, তখন হযরত হুসাইন (রাঃ) কে বললেন, প্রিয় ভাই জান! চল, আমরা এখান থেকে সরে যাই। এই রক্তাক্ত ভূমি দেখে আমার খুব ভয় করছে, আমার খুবই খারাপ লাগছে। এই রক্ত ভূমিতে অবস্থান করোনা। চল, আমরা এখান থেকে অন্যত্র চলে যাই। হযরত ইমাম হুসাইন (রাঃ) বললেন, ওগো আমার প্রাণ প্রিয় বোন! এখান থেকে আমি বের হতে পারব না। এটা আমার 'শাহাদাত গাহ'। এখানেই আমাকে শাহাদাত বরণ করতে হবে। এখানেই আমাদের রক্তের নদী প্রবাহিত হবে। এটা সেই ভূমি, যেটা আহলে মুস্তাফা (সাল্লাল্লাহু আলাইহে ওয়াআলিহি ওয়াসাল্লাম) এর রক্তে রঞ্জিত হবে। এটাই সেই জায়গা, যেখানে ফাতেমাতুয যুহরা (রাঃ) এর বাগানের বেহেস্তী ফুল টুকরো টুকরো হয়ে পতিত হবে এবং তাঁদের রক্তে এই ভূমি লালে লাল হয়ে যাবে। তাই সবাই অবতরণ কর, সবার, ধৈর্য এবং সাহসের সাথে তাঁরুতে অবস্থান কর। আমরা এখান থেকে কখনও যেতে পারব না। এখানেই আমাদেরকে ধৈর্য ও সাহসিকতার পরাকাষ্ঠা দেখাতে হবে এবং এখানেই শাহাদাত বরণ করতে হবে।' মোট কথা হলো, মদীনাবাসী মদীনা থেকে মক্কায় গিয়েছিলেন এবং মক্কা থেকে বের হয়ে কারবালায় এসে গেছেন। তকদির তাঁদেরকে কারবালায় নিয়ে এসেছে। কেননা কিয়ামত পর্যন্ত সবাই যেন তাঁদেরকে কারবালাবাসী বলে অভিহিত করেন। যা হোক, তাঁরু খাটিয়ে তাঁরা কারবালায় অবস্থান নিলেন।

তাঁর (রাঃ) অবস্থান নেওয়ার পর থেকে ইবনে জিয়াদ ও ইয়াজিদের পক্ষ থেকে দলের পর দল সৈন্যবাহিনী আসতে থাকে। যেই দলই আসে, ইয়াজিদের পক্ষ থেকে হযরত ইমাম হুসাইন (রাঃ) এর কাছে এ নির্দেশটাই নিয়ে আসে— 'হযরত হুসাইন (রাঃ) কে গিয়ে বল যেন ইয়াজিদের বায়াত গ্রহণ করেন। যদি তিনি বায়াত গ্রহণ করতে রাজী হন, তখন তাঁকে কিছু বলোনা, তাঁকে ধরে আমার কাছে নিয়ে এস, আর যদি বায়াত করতে অস্বীকার করে, তখন তাঁর সাথে যুদ্ধ কর

এবং তাঁর মস্তক কর্তন করে আমার কাছে পাঠিয়ে দাও।' এ ভাবে সৈন্য বাহিনীর যেই দলটিই আসলো, একই হুকুম নিয়ে আসলো। হযরত ইমাম হুসাইন (রাঃ) বললেন, 'এটাতো হতেই পারে না যে, আমি ইয়াজিদের হাতে বায়াত করি। আফসোসের বিষয়, আমাকে আহ্বান করা হয়েছে, আমার হাতে বায়াত গ্রহণ করার জন্য, আর এখন আমাকে বাধ্য করা হচ্ছে ইয়াজিদের হাতে বায়াত করার জন্য। এই বায়াত না করার জন্যইতো আমি মদীনা ছেড়ে মক্কা চলে গিয়েছিলাম। তাহলে কি আমি এখন মক্কা থেকে এখানে এসেছি ইয়াজিদের হাতে বায়াত হওয়ার জন্য? এটা কিছুতেই হতে পারেনা। আমি ইয়াজিদের হাতে কখনো বায়াত করব না।' ওরা বলল, আপনি যদি ইয়াজিদের হাতে বায়াত করতে রাজী না হন, তা হলে যুদ্ধের জন্য প্রস্তুত হন। তিনি (রাঃ) বললেন, আমিতো যুদ্ধের জন্যও আসিনি। যুদ্ধে র কোন ইচ্ছাও পোষণ করিনা। ওরা বলল, এ রকমতো কিছুতেই হতে পারে না, হয়তো বায়াত করতে হবে, নতুবা যুদ্ধ করতে হবে। হযরত ইমাম হুসাইন (রাঃ) যখন দেখলেন, এদের উদ্দেশ্য খুবই খারাপ, অবস্থা খুবই সঙ্গীন রূপ ধারণ করেছে, তখন তিনি তাদের সামনে তিনটি শর্ত পেশ করলেন। তিনি (রাঃ) বললেন, 'শুন! কুফাবাসীরা আমার কাছে চিঠি লিখেছে এবং চিঠিতে এমন কথা লিখা ছিল, যার জন্য শরীয়ত মতে আমি এখানে আসতে বাধ্য হয়েছি। এখন যখন তারা বেঈমানী করেছে, আমি তোমাদের সামনে তিনটা শর্ত পেশ করছি; তোমাদের যেটা ইচ্ছা সেটা গ্রহণ কর এবং সেই অনুসারে কার্য সম্পাদন কর। শর্তগুলো- (১) হয়তো আমাকে মক্কায় চলে যেতে দাও। সেখানে গিয়ে হেরেম শরীফে অবস্থান করে ইবাদত বন্দেগীতে নিয়োজিত থেকে বাকী জীবনটা অতিবাহিত করব। (২) যদি মক্কায় যেতে না দাও, তা হলে অন্য কোন দেশে যাওয়ার সুযোগ দাও, যেখানে কাফির বা মুশরিকরা বসবাস করে। এখানে আমি আমার সমস্ত জীবন দ্বীনের তবলীগে ব্যয় করব এবং ওদেরকে মুসলমান বানানোর প্রচেষ্টা চালাতে থাকব। আর (৩) যদি অন্য কোন দেশেও যেতে না দাও, তা হলে এমন করতে পার যে আমাকে ইয়াজিদের কাছে নিয়ে চল। আমি তার সাথে বসে আলোচনা করব। হয়তো কোন সন্ধিও হয়ে যেতে পারে, এই নাজুক অবস্থার উন্নতিও হতে পারে এবং রক্তপাতের সম্ভাবনাও দূরীভূত হতে পারে। ইয়াজিদ বাহিনী এ তিনটি শর্ত কুফার গভর্ণর ইবনে জিয়াদের কাছে পাঠিয়ে দিল। সে এ শর্তগুলোর কথা শুনে তেলে বেগুনে জ্বলে উঠল এবং আমার বিন সা'দ, যিনি সেনাপতি ছিল, তাকে লিখল যে, আমি তোমাকে সালিশকার বা বিচারক বানিয়ে পাঠাইনি যে, তুমি আমার

এবং হযরত হুসাইন (রাঃ) এর মধ্যে সন্ধি করার ব্যবস্থা করবে; আমি তোমাকে পাঠিয়েছি হুসাইন (রাঃ) কে বায়াত করতে বলার জন্য অথবা তাঁর সাথে যুদ্ধ করে তাঁর মস্তক আমার কাছে পাঠিয়ে দেয়ার জন্য। অথচ ভূমি সন্ধির চিন্তা ভাবনা করছ এবং এর জন্য বিভিন্ন তদবীর করছ। আমি আবার তোমাকে শেষবারের মত নির্দেশ দিচ্ছি, ইমাম হুসাইন (রাঃ) যদি বায়াত করতে অস্বীকার করেন, তাঁর সঙ্গে যুদ্ধ কর এবং তাঁর মস্তক কেটে আমার কাছে পাঠিয়ে দাও। যখন ইমাম হুসাইন (রাঃ) কে এই নির্দেশের কথা শুনানো হল, তখন তিনি (রাঃ) বললেন, ‘আমার পক্ষ থেকে যা প্রমাণ করার ছিল, তা প্রমাণিত হয়েছে এবং যা বলার ছিল তা বলা হয়েছে। এখন তোমাদের যা মর্জি তা কর। আমি ইয়াজিদের হাতে বায়াত কিছুতেই করব না।’ ওরা বলল, তা হলে যুদ্ধের জন্য প্রস্তুত হোন। তিনি (রাঃ) বললেন, ‘তোমাদের পক্ষ থেকে যা করার তোমরা কর। আমার পক্ষ থেকে যা করার আমি করব।’

অবরোধ সৃষ্টি ও পানি বন্ধ

ওদের চিন্তাধারা এত জঘন্য রূপ ধারণ করল যে, সাতই মুহররম থেকে হযরত ইমাম হুসাইন (রাঃ) ও তাঁর প্রিয় জনদের জন্য ফোরাত নদীর পানি বন্ধ করে দিল। প্রায় চার হাজার সৈন্য ফোরাত নদীর তীরে এই কাজে নিয়োজিত করল। এদের মধ্যে দুই হাজার ছিল ‘স্থল বাহিনী’ আর দুই হাজার ছিল ‘অশ্বারোহী’। তাদেরকে নির্দেশ দেয়া হয়েছিল যে, উনাদেরকে যেন এক ফোঁটা পানিও নিতে দেয়া না হয়। সে মতে পানি বন্ধ করে দিল। ইমাম হুসাইন (রাঃ) এর তিরিশিজন কাফেলার মধ্যে দুগ্ধপোষ্য শিশু ছিল এবং পর্দানশীন মহিলাও ছিলেন। তাঁদের মোকাবিলা করার জন্য বাইশ হাজার সৈন্য এসেছে। কী আশ্চর্য! তিরিশিজনের মোকাবিলায় বাইশ হাজার সৈন্য! আবার এই তিরিশিজনের মধ্যে শিশু ও মহিলা রয়েছে। অথচ এদের মোকাবিলায় যে বাইশ হাজার সৈন্য, তারা সবাই যুবক এবং সকল প্রকারের অস্ত্র সস্ত্রে সজ্জিত। এরপরও তারা পানি বন্ধ করে দিল। কারণ তাদের ধারণা, উনারা যদি পানি পান করে যুদ্ধ করে, তাহলে সম্ভবতঃ আমরা বাইশ হাজার হয়েও মোকাবিলা করে কামিয়াব হতে পারব না। তাই পানি বন্ধ করে দিল। এটা জুলুমের উপর জুলুম ছিল। আফসোস! উনার জন্যই পানি

বন্ধ করে দিল, যিনি সাকিয়ে কাওছার (সাল্লাল্লাহু আলাইহে ওয়াআলিহি ওয়াসাল্লাম) এর দৌহিত্র। কোন এক উর্দু কবি এ প্রসঙ্গে খুবই সুন্দর একটি কবিতা লিখেছেন—

حاکم کا یہ حکم تھا کہ پانی بشر پیئیں

گھوڑے پیئیں اونٹ پیئیں اہل ہنر پیئیں

سب پیئیں چرندے پرندے پیئیں منع تم نہ کیجیو

مگر ایک فاطمہ (رض) کے لال کو پانی نہ دیجیو

অর্থাৎ হাকিমের নির্দেশ ছিল মানুষ, জীব-জন্তু, গরু-ছাগল, পশু-পাখি সবাই এই নদীর পানি পান করবে, তোমরা বাঁধা দিও না। কিন্তু হযরত ফাতেমাতুয যুহরা (রাঃ) এর এই ছেলেকে পানি পান করতে দিও না। যেই ‘ফোরাত নদীর’ পানি সবার পান করার অনুমতি ছিল, জীব-জন্তু, পশু-পাখি কারো জন্য বাঁধা ছিল না, কিন্তু সেই ‘ফোরাত নদীর’ পানি পান করা থেকে বাঁধা দিল সাকিয়ে কাওছার (সাল্লাল্লাহু আলাইহে ওয়াআলিহি ওয়াসাল্লাম) এর দৌহিত্রকে।’

ইমাম হুসাইন (রাঃ) এর আকুল আহ্বান

আল্লাহ! আল্লাহ! যখন হযরত ইমাম হুসাইন (রাঃ) দেখলেন যে, পানিও বন্ধ করে দেওয়া হয়েছে, তখন তিনি ঘোড়ায় সওয়ার হয়ে ইয়াজিদের সৈন্য বাহিনীর নিকট গেলেন এবং তাদের সামনে সংক্ষিপ্ত বক্তব্য রাখলেন। তিনি (রাঃ) তাদেরকে একান্ত যুক্তির মাধ্যমে বুঝালেন, ‘জুলুম অত্যাচার থেকে বিরত থেকো, আমাদের রক্ত দ্বারা তোমাদের হাতকে রঞ্জিত করোনা। জেনে শুনে কোন মুমিনকে হত্যা করা মানে জাহান্নামকে নিজের ঠিকানায় পরিণত করা। আমি হলাম তোমাদের রসুল (সাল্লাল্লাহু আলাইহে ওয়াআলিহি ওয়াসাল্লাম) এর দৌহিত্র, যার কলেমা তোমরা পড়। আর এই মূহর্তে আমি ছাড়া তোমাদের রসুল (সাল্লাল্লাহু আলাইহে ওয়াআলিহি ওয়াসাল্লাম) এর অন্য কোন দৌহিত্র নেই। আর আমার সম্পর্কে তোমরা ভাল মতে জান। আমি ঐ হুসাইন, যার সম্পর্কে নবী করিম (সাল্লাল্লাহু আলাইহে ওয়াআলিহি ওয়াসাল্লাম) এরশাদ করেছেন—

الْحَسَنُ وَالْحُسَيْنُ سَيِّدَا شَبَابِ أَهْلِ الْجَنَّةِ অর্থাৎ হাসান-হুসাইন

বেহেশ্তের নওজোয়ানদের সর্দার। আমি সেই হুসাইন, যখন নিজ মায়ের কোলে
 ক্রন্দন করতাম, তখন আল্লাহর প্রিয় নবী হযরত মুহাম্মদ মুস্তাফা (সাল্লাল্লাহু
 আলাইহে ওয়াআলিহি ওয়াসাল্লাম) বলতেন, ওগো ফাতিমা! ওকে কাঁদাইওনা।
 কারণ ও কাঁদলে আমার খুবই কষ্ট হয়। দেখ, যখন প্রিয় আপন মায়ের কোলে
 আমার কান্নাটা নবীজী (সাল্লাল্লাহু আলাইহে ওয়াআলিহি ওয়াসাল্লাম) এর জন্য
 কষ্টদায়ক ছিল, এখন তোমরা যদি আমাকে ভিন দেশে কষ্ট দাও এবং আমার রক্ত
 দ্বারা তোমাদের হাতকে রঞ্জিত কর, আমার ছেলে মেয়েদেরকে শোকাভিভূত কর,
 তাহলে কল্পনা করে দেখ, নবীজী (সাল্লাল্লাহু আলাইহে ওয়াআলিহি ওয়াসাল্লাম) কী
 রকম কষ্ট পাবেন! আর যে রসূল (সাল্লাল্লাহু আলাইহে ওয়াআলিহি ওয়াসাল্লাম) কে
 কষ্ট দেবে, ওর পরিণাম সম্পর্কে তোমরা পবিত্র কুরআনেই পড়েছ-
 إِنَّ الَّذِينَ يُؤْذُونَ اللَّهَ وَرَسُولَهُ لَعَنَهُمُ اللَّهُ فِي الدُّنْيَا وَالْآخِرَةِ
 নিশ্চয় যে সব ব্যক্তি আল্লাহ এবং আল্লাহর রসূল (সাল্লাল্লাহু আলাইহে ওয়াআলিহি
 ওয়াসাল্লাম) কে কষ্ট দেয়, তাদের প্রতি দুনিয়া ও আখেরাতে খোদার লানত এবং
 আল্লাহ তাদের জন্য খুবই কষ্টদায়ক শাস্তির ব্যবস্থা করে রেখেছেন। তিনি (রাঃ)
 তাঁকে নির্দোষ প্রমাণ করার উদ্দেশ্যে অকাট্য যুক্তির মাধ্যমে বুঝালেন যে, জুলুম
 অত্যাচার থেকে বিরত থেকো এবং আমার রক্ত দ্বারা তোমাদের হাত রঞ্জিত করো
 না। আমি তোমাদের কোন ক্ষতি করিনি, তোমাদের সন্তানাদি হত্যা করিনি,
 তোমাদের প্রতি কোন অত্যাচার করিনি। আমি তো কুফাবাসীর আহবানে এসেছি।
 তারা যখন বিশ্বাস ঘাতকতা করল, আমাকে চলে যেতে দাও। তাঁর এ হৃদয়
 বিদারক বক্তব্য ওদের মনে কোন প্রভাব বিস্তার করলো না। ওদের কপালে জাহান্নাম
 অবধারিত ছিল। তাই ইমাম হুসাইন (রাঃ) এর আকূল আবেদন তাদের মনে কোন
 রেখাপাত করলোনা। বরং তারা হৈ-হুল্লা শুরু করে দিল এবং বলতে লাগল, আমরা
 আপনার বক্তৃতা শুনতে আসিনি। হয় ইয়াজিদের বায়াত গ্রহণ করুন অথবা যুদ্ধের
 জন্য প্রস্তুত হোন। তিনি বললেন, 'আমি আমার পক্ষে যা প্রমাণ করার ছিল, তা
 প্রমাণ করলাম যেন কাল কিয়ামতের মাঠে তোমাদের এ কথাটুকু বলার সুযোগ না
 থাকে- ইয়া আল্লাহ! আমাদের জানা ছিলনা, আমাদেরকে কেউ বুঝায়নি'। এখন
 আর তোমরা খোদার দরবারে এ ধরনের কোন আপত্তি পেশ করতে পারবে না।

এখন সব প্রমাণিত হয়ে গিয়েছে। আল্লাহ তাআলা ইরশাদ ফরমান-
 وَمَا كُنَّا مُعَذِّبِينَ حَتَّىٰ نَبْعَثَ رَسُولًا
 হয়ে গিয়েছে, এখন তোমাদের যা ইচ্ছা তা কর।

মুহররমের নয় তারিখ আসলো এবং ইয়াজিদী বাহিনীর মধ্যে আনন্দ উল্লাস শুরু হয়ে গেল। এটা পূর্ণ যুদ্ধ ঘোষণার পূর্বাভাস ছিল। হযরত ইমাম হুসাইন (রাঃ) তাঁর এক সঙ্গীকে ওদের কাছে পাঠালেন এবং বললেন- ওদেরকে গিয়ে বল, আমাদেরকে যেন এক রাত্রি সময় দেয়। ইয়াজিদী বাহিনী এ কথাটি গ্রহণ করল এবং এক রাত্রির সুযোগ দিল।

ঐতিহাসিক ১০ই মহররম

দশ তারিখের রাত্রি হল, হযরত ইমাম হুসাইন (রাঃ) তাঁর সফর সঙ্গীদের সবাইকে একত্রিত করলেন এবং বললেন- ‘আমার প্রাণ প্রিয় সাথীরা! আমি তোমাদের সকলের প্রতি আন্তরিকভাবে সন্তুষ্ট। আমি সানন্দে তোমাদেরকে অনুমতি দিচ্ছি যে, আজ রাতে তোমরা যে যে দিকে পার চলে যাও। এই সব ইয়াজিদী বাহিনীর লোকেরা আমার রক্ত পিপাসু। এরা একমাত্র আমার রক্তেই পরিতৃপ্ত হবে। তোমরা চলে যাও, তোমাদের জান বেঁচে যাবে’। কিন্তু তাঁর সাথীদের মধ্যে একজনও যেতে রাজী হলেন না। বরং বললেন, এ নাজুক সময়ে আপনাকে শত্রুদের হাতে সোপর্দ করে কিভাবে চলে যেতে পারি! এ রকম পরিস্থিতিতে যদি আপনাকে ফেলে আমরা চলে যাই, কাল কিয়ামতের মাঠে আমরা আল্লাহর রসুল (সাল্লাল্লাহু আলাইহে ওয়াআলিহি ওয়াসাল্লাম) কে কিভাবে মুখ দেখাব? আল্লাহর রসুল (সাল্লাল্লাহু আলাইহে ওয়াআলিহি ওয়াসাল্লাম) বলবেন, তোমরা নিজেদের জানকে আমার প্রিয় দৌহিত্র হুসাইন এর জান থেকে প্রিয় মনে করেছ এবং তোমরা আমার দৌহিত্রকে শত্রুদের অস্ত্রের মুখে সোপর্দ করে চলে গেছ। না! না!! কিছুতেই আমরা আপনাকে ফেলে চলে যেতে পারিনা। আমরা আপনার সাথেই থাকব এবং আমরা আমাদের জানকে পতঙ্গের মত উৎসর্গ করব। যখন কেউ যেতে রাজী হল না, তখন হযরত ইমাম হুসাইন (রাঃ) বললেন, তাহলে শুন! যদি তোমরা হুসাইনের সাথে থাকার জন্য দৃঢ় সংকল্পবদ্ধ হও, তাহলে তোমরা ধৈর্য

এবং আত্মবিশ্বাসে সীসাঢালা প্রাচীরের মত অটল হয়ে যাও। এমন দৃঢ় ও অটল পাহাড়ের মত হয়ে যাও, যেন জুলুম-অত্যাচারের বিভীষিকা তোমাদের পদজ্বলন ঘটাতে না পারে। বাতিলের সাথে মোকাবিলা করার সময়টা হল আমাদের পরীক্ষার সময়। আল্লাহ তাআলা তাঁর বান্দাদের থেকে পরীক্ষা নিয়ে থাকে। এখন আমাদের সামনে মসিবতের পাহাড়। সমস্ত দুঃখ-দুর্দশা আমাদেরকে ধৈর্য সহকারে অতিক্রম করতে হবে, আল্লাহর রাস্তায় অটল থাকতে হবে এবং এ ভাবে অটল থেকে শাহাদাতের শরবত পান করতে হবে এবং ভবিষ্যৎ প্রজন্মের জন্য উদাহরণ রেখে যেতে হবে। হযরত ইমাম হুসাইন (রাঃ) এর কথা তাঁর সাথীদের মধ্যে যথেষ্ট ধৈর্য শক্তি সৃষ্টি করলো, তাঁর (রাঃ) সকল সাথী তাঁর জন্য জান কুরবান করতে প্রস্তুত হয়ে গেলেন। তাঁর (রাঃ) সকল সাথী শাহাদাত বরণের জন্য অনুপ্রাণিত হয়ে গেলেন এবং ধৈর্য ও ত্যাগ স্বীকারের জন্য দৃঢ় পাহাড় হয়ে গেলেন। রাত একটু গভীর হলে হযরত ইমাম হুসাইন (রাঃ) তার সাথীদেরকে বললেন, তোমরা কিছুক্ষণের জন্য বিশ্রাম কর। সকাল বেলা আল্লাহর হুকুমে যা হওয়ার আছে তাই হবে। তাঁর (রাঃ) সাথীরা সবাই নিজ নিজ তাঁবুতে চলে গেলেন এবং তিনি নিজের তাঁবুতে কুরআন তিলাওয়াতে মগ্ন হলেন। কুরআন তিলাওয়াত করতে করতে তাঁর (রাঃ) তন্দ্রাভাব আসায় তিনি কিছুক্ষণের জন্য শুয়ে পড়লেন। তখন তিনি স্বপ্নে দেখলেন, তাঁর (রাঃ) নানাজান (সাল্লাল্লাহু আলাইহে ওয়াআলিহি ওয়াসাল্লাম) তশরীফ এনেছেন এবং তাঁকে কোলে নিয়ে নিলেন এবং তাঁর বুকে হাত রেখে বললেন—

‘اللَّهُمَّ أَطِّهِرِ الْحُسَيْنَ صَبْرًا وَاجْرًا’ ‘হে আল্লাহ! হুসাইনকে ধৈর্য ও পূণ্য দান কর’ এবং হুসাইনকে আরও বললেন, ‘তোমার উপর যা হচ্ছে, তা থেকে আমি বেখবর নই। আমি সব কিছু দেখছি। নানু! তোমার বিরুদ্ধে যারা তলোয়ার, তীর ইত্যাদি নিয়ে এসেছে, সকলেই আমার শাফায়াত থেকে বঞ্চিত’। হযরত (সাল্লাল্লাহু আলাইহে ওয়াআলিহি ওয়াসাল্লাম) এটা বলে ইমাম হুসাইন (রাঃ) এর অন্তরকে ধৈর্য এবং স্থিরতার খনি বানিয়ে চলে গেলেন। হযরত ইমাম হুসাইন (রাঃ) ঘুম থেকে উঠে তাঁর সাথীগণ এবং পরিবার পরিজনকে স্বপ্নের কথা শুনালেন। ফজরের নামাযের পর তিনি আল্লাহর কাছে প্রার্থনা করলেন— ‘ইয়া আল্লাহ! আপনার রাস্তায় আমাকে অটল রাখ, মওলা! ধৈর্য এবং সহনশীলতা দান করুন। হে মওলা! জুলুম অত্যাচারের ঝড় তুফান আমার উপর দিয়ে প্রবাহিত হতে

পারে, আপনি আমাকে অটল থাকার তৌফিক দান করুন, যেন, জুলুম অত্যাচার আমাকে পদচ্যুত করতে না পারে।' এ ভাবে তিনি মুনাযাত করছিলেন, আর তাঁর (রাঃ) সাথীরা আমীন, আমীন বলছিলেন।

এদিকে পিপাসাকাতর আল্লাহর নেক বান্দাগণ ধৈর্য এবং সহনশীলতার জন্য আল্লাহর কাছে প্রার্থনা করছেন, অন্যদিকে ইয়াজিদের সৈন্যরা যুদ্ধের জন্য মহড়া দিচ্ছে। দূর্যোগের কালো মেঘে আকাশ ছেয়ে গেল, ইয়াজিদের সৈন্যরা লক্ষ লক্ষ দিতে লাগল, তাদের মধ্যে কতক জাহান্নামী ঘোড়ায় সওয়ার হয়ে হযরত ইমাম হুসাইন (রাঃ) এর তাঁবুর আশে পাশে চক্র দিতে লাগল এবং গর্ব ও অহংকারভরে হুংকার দিয়ে বলতে লাগল, কোন বীর বাহাদুর থাকলে আমাদের মোকাবিলায় আস। এ ভাবে তারা মোকাবিলার জন্য আহ্বান জানাতে লাগলো। ইত্যবসরে জালিমদের মধ্যে কেউ হযরত ইমাম হুসাইন (রাঃ) এর তাঁবুর দিকে তীর নিক্ষেপ করলো।

হযরত ইমাম হুসাইন (রাঃ) এর অনুসারীদের শাহাদাত

হযরত ইমাম হুসাইন (রাঃ) এর সাথীরা, যারা শাহাদাত বরণ করার জন্য উদগ্রীব ছিলেন, তারা মোকাবিলার জন্য প্রস্তুত হয়ে গেলেন এবং ইমাম হুসাইন (রাঃ) এর অনুমতি প্রার্থনা করলেন। ইমাম হুসাইন (রাঃ) তাদেরকে অনুমতি দিলেন। অনুমতি পেয়ে তাঁরা বীর বিক্রমে যুদ্ধ ময়দানে ঝাপিয়ে পড়লেন। তিন দিনের পিপাসা কাতর এবং ভুখা সঙ্গীরা সবার এবং ধৈর্যের পরাকাষ্ঠা দেখালেন। ভুখা ও পিপাসার্ত হলে কি হবে, তাঁরা ঈমানী বলে বলীয়ান ছিলেন। এদের একজন ওদের দশজনের থেকেও অধিক শক্তিশালী ছিলেন। প্রচণ্ড যুদ্ধ করে অনেক ইয়াজি দী বাহিনীকে জাহান্নামে পাঠিয়ে শেষ পর্যন্ত নিজেরা এক এক করে শাহাদাত বরণ করেন। হযরত ইমাম হুসাইন (রাঃ) নিজের চক্ষুর সামনে তাঁর এই পঞ্চাশজন সাথীর শাহাদাত বরণ দেখলেন। এত কিছু দেখার পরও তিনি ধৈর্যচ্যুত হলেন না, তাঁর (রাঃ) সাথীদের বুকে তীর নিক্ষেপ অবলোকন করছেন আর বলছেন,

رَضِيْتُ بِقَضَائِكُمْ اর্থاً মওলা! আমি আপনার ইচ্ছে এবং আপনার সিদ্ধান্তের উপর রাজী। পঞ্চাশজন সাথীর শহীদ হওয়ার পর তাঁর (রাঃ) সাথে মুঠিমেয় কয়েকজন আপনজন ছাড়া আর কেউ রইলো না।

হযরত ইমাম হুসাইন (রাঃ) এর মর্মস্পর্শী ভাষণ এবং হুরের সপক্ষ ত্যাগ

আপনজনের মধ্যে ভাই ছিল, ভ্রাতুষপুত্র ছিল, ভাগিনা ছিল এবং ছেলে ছিল। তিনি কাউকে কিছু না বলে ঘোড়ায় সওয়ার হয়ে ইয়াজিদের সৈন্যদের সামনে গেলেন এবং বললেন- 'তোমাদের মধ্যে আহলে রসুল (সাল্লাল্লাহু আলাইহে ওয়াআলিহি ওয়াসাল্লাম) এর সাহায্যকারী কেউ আছে কি? এ সংকটময় মূহুর্তে আওলাদে রসুল (সাল্লাল্লাহু আলাইহে ওয়াআলিহি ওয়াসাল্লাম) এর সাহায্যকারী কেউ আছে কি? আহলে রসুল (সাল্লাল্লাহু আলাইহে ওয়াআলিহি ওয়াসাল্লাম) এর সাহায্য করে বেহেস্তে গমনের ইচ্ছুক কেউ আছে কি? তাঁর (রাঃ) এ আহবানে ইয়াজিদী বাহিনীর হুর বিন ইয়াজিদ বিয়াহীর অন্তরে বিপ্লব শুরু হয়ে গেল। সে ঘোড়ার উপর অস্বস্থিবোধ এবং ছটফট করতে লাগল। তার এই অবস্থা দেখে তার এক সঙ্গী জিজ্ঞাসা করল- হুর! কি হল? তোমার এই অবস্থা কেন? তোমাকে বড়ই ব্যতিব্যস্ত দেখাচ্ছে কেন? আমি তোমাকে অনেক বড় বড় যুদ্ধ ময়দানে দেখেছি। কিন্তু কোন সময় তোমাকে আমি এ রকম অস্বাভাবিক অবস্থায় দেখিনি। কিন্তু এখন তোমার এই অবস্থা কেন? হুর বললো- কি বলব, আমি আমার এক দিকে দেখছি বেহেস্ত আর অন্য দিকে দেখছি দোযখ। মাঝখানে অস্বস্থিকর অবস্থায় পড়েছি এবং কি করব চিন্তা করছি। এক দিক আমাকে দোযখের দিকে টানছে আর এক দিক বেহেস্তের দিকে আহবান করছে। এটা বলার পর পরই তিনি ঘোড়াকে চাবুক মেরে এক নিমিষে ইয়াজিদী বাহিনী থেকে এ বলে বের হয়ে গেল- 'যেতে হলে বেহেস্তেই যাব।'

یه نعره حرکاتھا جس وقت فوج شام سے نکالا

کہ دیکھو یوں نکلتے ہیں جہنم سے خدا والے

অর্থাৎ শত্রু বাহিনী থেকে বের হয়ে হুর জোর গলায় বললো, দেখ জাহান্নাম থেকে আল্লাহুওয়াল্লা বের হচ্ছে। একজন বের হয়ে আসার দ্বারা হযরত ইমাম হুসাইন (রাঃ) এর বাহিনীর মধ্যে উল্লেখযোগ্য কোন পরিবর্তন হল না, আর ইয়াজিদী বাহিনীরও হাজারের মধ্যে একজন চলে যাওয়ায় তেমন কোন ক্ষতি হলো না। কিন্তু আসল কথা হলো, হুর ছিল বেহেস্তী, অবস্থান করেছিলেন দোযখীদের

সাথে। হযরত ইমাম হুসাইন (রাঃ) তাঁর আধ্যাত্মিক দূরদৃষ্টি দ্বারা অবলোকন করলেন যে, জান্নাতী দোষখীদের মধ্যে অবস্থান করছে। তাই হযরত ইমাম হুসাইন (রাঃ) ডাক দিলেন, তাঁর (রাঃ) ডাকটা ছিল হুরের ইয়াজিদী বাহিনী থেকে বের হয়ে আসার একটা উপলক্ষ মাত্র। হযরত ইমাম হুসাইন (রাঃ) এর দ্বারা তার বেহেশ্তের রাস্তা পরিষ্কার হয়ে গেল। হুর বের হয়ে সোজা হযরত ইমাম হুসাইন (রাঃ) এর সামনে আসল এবং বলতে লাগল, ওপো রসূল (সাল্লাল্লাহু আলাইহে ওয়াআলিহি ওয়াসাল্লাম) এর আওলাদ! আপনি যে ডাক দিয়েছেন, 'এ নাজুক সময়ে আওলাদে রসূল (সাল্লাল্লাহু আলাইহে ওয়াআলিহি ওয়াসাল্লাম) এর সাহায্য করে বেহেশ্তে যাওয়ার মত কেউ আছে কিনা', আমি সেই ডাকে সাড়া দিয়ে ইয়াজিদ বাহিনী থেকে বের হয়ে এসেছি। তাই আমি যদি আজ আপনার সাহায্যার্থে জান কুরবান করি, তাহলে সত্যিই কি আপনার নানাজান (সাল্লাল্লাহু আলাইহে ওয়াআলিহি ওয়াসাল্লাম) এর শাফায়াত নসীব হবে? তিনি (রাঃ) বললেন, ইনশাআল্লাহ। হুর বললেন, আপনি আমার জন্যে দুআ করুন, আল্লাহ তাআলা যেন আমার বিগত দিনের পাপ মাফ করে দেন এবং আমার গরিমসিকে ক্ষমা করে দেন। আমি আপনার পক্ষে জান কুরবানী করার জন্যে যাচ্ছি। এ বলে হুর কোমর থেকে তলোয়ার বের করে ইয়াজিদী বাহিনীর সামনে গেলেন। হুরকে দেখে ইয়াজিদী বাহিনীর সেনাপতি আমর বিন সা'দ সৈন্যদেরকে বলল, দেখ, হুর ছিল আমাদের বাহিনীর সেনা প্রধান। সে এখন আমাদের শত্রুদের সাথে হাত মিলিয়েছে। সে আমাদের সাথে বিশ্বাসঘাতকতা করেছে। তোমরা তাকে এমন শিক্ষা দাও, যেন ভবিষ্যৎ প্রজন্মের জন্যে শিক্ষণীয় হয়ে থাকে। এর পর ইয়াজিদী বাহিনী চারিদিক থেকে আক্রমণ শুরু করল। হযরত হুরও এমন জোরে আক্রমণ শুরু করে দিলেন যে, ইয়াজিদী বাহিনীর জন্যে যেন খোদার গজব নাযিল হল। শেষ পর্যন্ত তিনি ক্ষত বিক্ষত হয়ে শাহাদাত বরণ করেন।

চাচাত ভাই ও সৎভাই এর শাহাদাত

হযরত হুরের শাহাদাতের পর হযরত ইমাম হুসাইন (রাঃ) এর সামনে হযরত আকিলের বংশধর, হযরত মুসলিমের ভাই আবদুল্লাহ বিন আকিল (রাঃ) এসে দাড়াইলেন এবং অনুমতি প্রার্থনা করলেন। হযরত ইমাম হুসাইন (রাঃ) তাঁকে বুকে জড়িয়ে ধরলেন এবং কপালে চুমু দিয়ে অনুমতি দিলেন। তিনি যুদ্ধ ময়দানে গিয়ে

নিজের শৌর্য বীর্য প্রদর্শন করে অনেক ইয়াজিদী সৈন্যকে হত্যা করে পরিশেষে শাহাদাত বরণ করেন। এবার হযরত ইমাম হুসাইন (রাঃ) এর ভাই হযরত আবু বকর (রাঃ) অনুমতি নিয়ে যুদ্ধ ক্ষেত্রের দিকে অগ্রসর হলেন। শেরে খোদার আওলাদ যুদ্ধক্ষেত্রে প্রমাণ করলেন যে, তাঁদের বাহুতে শেরে খোদার শক্তি রয়েছে। যুদ্ধের মাঠে তাঁরা যে বীর বিক্রমের পরিচয় দিয়েছেন, তা কারবালার মাটিতে চিরস্মরণীয় হয়ে রয়েছে। তিনিও অনেক ইয়াজিদী বাহিনীকে খতম করে শেষ পর্যন্ত নিজে শাহাদাত বরণ করেন।

হযরত আবদুল্লাহ বিন হাসান (রাঃ) এর শাহাদাত

হযরত ইমাম হুসাইন (রাঃ) এর সামনে তাঁর আপন ভতিজা, ইমাম হাসান (রাঃ) এর নয়নের মনি এবং মা ফাতেমুতুয যুহরা (রাঃ) ও হযরত আলী (রাঃ) এর দৌহিত্র উপস্থিত হলেন। তিনি যুদ্ধে গমনের জন্য অনুমতি প্রার্থনা করলেন। তিনি (রাঃ) তাঁর ভতিজার প্রতি অশ্রুসজল নয়নে তাকালেন এবং বললেন, 'তোমরা আমার সাথে এসেছিলে এ উদ্দেশ্যে যে, চাচার সঙ্গে বিভিন্ন জায়গায় তাঁর ভক্ত ও মুরিদানদের বাড়ীতে যাবে এবং কয়েকদিন আনন্দ আহলাদ করবে। আমিও তোমাদেরকে তলোয়ার ও তীরের আঘাত খাওয়ার জন্য সঙ্গে আনিনি। শোন! ওরা আমার রক্তের পিপাসু, তোমাদের রক্তের জন্য লালায়িত নয়। তোমাকে আমি অনুমতি দিতে পারিনা। তুমি আশ্রয় শিবিরে ফিরে যাও এবং তোমার মা বোনদের সাথে মদীনা মনোয়ারায় চলে যেও। কিন্তু ভতিজা বার বার বলতে লাগল, চাচাজান! আমাকে আপন হাতে বিদায় দিন এবং আপনার বর্তমানেই জিহাদের ময়দানে যাওয়ার অনুমতি দিন। আমি জান্নাতুল ফেরদাউসে পৌঁছার জন্য অস্থির। চাচাজান! দীর্ঘ তিন দিনের পিপাসায় খুবই কষ্ট পাচ্ছি। এখন মন চাইছে যে, যত তাড়াতাড়ি পারি জান্নাতুল ফেরদাউসে পৌঁছে আপন পিতা ও দাদা জানের হাতে হাউজে কাওছারের পানি পান করে তৃষ্ণা নিবারণ করি। ভতিজার জান কুরবানীর জন্য একরকম দৃঢ় সংকল্পবোধ দেখে তাকে নিজের বুকে জড়িয়ে ধরলেন। অতঃপর অশ্রুসজল নয়নে অনুমতি দিলেন।

হযরত আলী (রাঃ) এর দৌহিত্র, ইমাম হাসানের নয়নমনি হযরত আবদুল্লাহ বিন হাসান (রাঃ) কারবালার মাঠে উজ্জ্বল নক্ষত্রের মত চমকতে লাগলেন এবং ইয়াজিদী বাহিনীর সাথে মোকাবিলা করে অনেক ইয়াজিদী সৈন্যকে জাহান্নামে নিক্ষেপ করে নিজে আঘাতে আঘাতে জর্জরিত হয়ে শেষ পর্যন্ত শাহাদাত বরণ করেন।

হযরত ইমাম কাসেম (রাঃ) এর শাহাদাত

আল্লাহ! আল্লাহ! এবার হযরত ইমাম হুসাইন (রাঃ) এর সামনে যিনি এসে উপস্থিত, তিনি হলেন তাঁর (রাঃ) প্রিয় ভাতিজা হযরত কাসেম (রাঃ), যার সাথে তাঁর মেয়ে সখিনার বিবাহের আগাম ওয়াদা ছিল। হযরত কাসেম ছিলেন উনিশ বছরের নওজোয়ান। যখন তিনি (রাঃ) তাঁর নওজোয়ান ভাতিজা তথা সখিনার হবু জামাতাকে সামনে দেখলেন, তখন তিনি কেঁদে দিলেন এবং বললেন, বাবা! আমি তোমাকে কিভাবে বিদায় দিতে পারি? তোমাকে কিভাবে আমি তীর খাওয়ার অনুমতি দিতে পারি? তোমাকে কি আমি তলোয়ারের আঘাত খাওয়ার অনুমতি দিতে পারি? প্রিয় ভাতিজা! দেখ, আমার ভাইয়ের এটা একান্ত আশা ছিল যে, সখিনার বিবাহ যেন তোমার সাথে হয়। ওগো আমার প্রিয় ভাতিজা! তুমি মদীনায ফিরে গিয়ে আমার মেয়ে সখিনার সাথে বিবাহ বন্ধনে আবদ্ধ হয়ে আমার ভাইয়ের আশা পূর্ণ কর। কিন্তু হযরত কাসেম (রাঃ) বললেন, চাচাজান! আমার আব্বাজানের আরও একটি আশা ছিল, সেটা হল, আমার আব্বাজান আমার গলার একটা তাবিজ দিয়েছিলেন এবং ওসীয়াত করে গিয়েছেন যে, 'বাবা, এ তাবিজটা তখনই খুলে দেখিও, যখন কোন বড় মুসিবতের সম্মুখীন হও এবং সেই মতে আমল করিও।' আমি এ মুহুর্তে তাবিজটা খুলে দেখলাম, কারণ এর থেকে বড় মুসিবত আর কি হতে পারে। তাবিজ খুলে যা লিখা দেখলাম, তা হলো- 'ওগো আমার প্রিয় বৎস কাসেম! এমন এক সময় আসবে, যখন আমার ভাই কারবালার মাঠে শত্রু পরিবেষ্টিত হবে, শত্রুরা তাঁর জানের পিপাসু হবে। বেটা! তুমি যদি সত্যিকার আমার ছেলে হও, তখন নিজ জানের কোন পরোয়া করনা। বরং নিজের জান চাচার জন্য উৎসর্গ করে দিও। কারণ, সেই সময় হুসাইনের জন্য যে জান কুরবানী দেবে, আল্লাহর দরবারে সে খুবই উচ্চ মর্যাদা পাবে।' তাই চাচাজান! আমাকেও আপনার হাতে বিদায় দিন। আমি আপনার পরে জীবিত থাকতে চাইনা। আমাকে বিদায় দিন, আমি যাতে সহসা জান্নাতুল ফেরদাউসে পৌঁছে তৃষ্ণা নিবারণ করতে পারি এবং আব্বাজানকে গিয়ে বলতে পারি, আব্বাজানা! আমি আপনার আশা পূর্ণ করে এসেছি।'

হযরত ইমাম হুসাইন (রাঃ) শেষ পর্যন্ত তাঁকেও বুকে জড়িয়ে ধরে যুদ্ধ ক্ষেত্রের দিকে বিদায় দিলেন। হযরত ইমাম কাসেম (রাঃ) ইয়াজিদী বাহিনীর বড় বড় যোদ্ধাকে টুকরো টুকরো করে ফেললেন। ক্ষুধার্ত ও তৃষ্ণার্ত হওয়া সত্ত্বেও তিনি

যুদ্ধক্ষেত্রে যে বাহাদুরী দেখিয়েছেন, তা দেখে ইয়াজীদী বাহিনীর জাদরেল সৈন্যরাও হতভম্ব হয়ে গিয়েছিল। শেষ পর্যন্ত এ বাহাদুরও আঘাতের পর আঘাতে ক্ষত বিক্ষত হয়ে ঘোড়া থেকে পড়ে গেলেন এবং জান্নাতুল ফেরদাউসে পৌঁছে গেলেন। এ ভাবে হযরত ইমাম হুসাইন (রাঃ) এর চারজন ভাতিজা শহীদ হয়ে গেলেন।

ভাগিনাধয়ের শাহাদাত

চার ভাতিজার শাহাদাতের পর তাঁর (রাঃ) আপন বোন হযরত জয়নাব (রাঃ) তাঁর অবুঝ সন্তান হযরত মুহাম্মদ ও হযরত আউনকে নিয়ে তাঁর (রাঃ) সামনে উপস্থিত হয়ে বললেন- ভাইজান, তোমার এ ভাগিনাধয়ও তোমার জন্য জান কুরবান করতে প্রস্তুত। হযরত ইমাম হুসাইন (রাঃ) বললেন, 'বোন! এদেরকে তীরের আঘাত খাওয়ার জন্য সাথে আনা হয়নি। আমার সামনে তাদেরকে বর্ষার অগ্রভাগে ঝুলানো হবে, তা আমার সহ্য হবে না। তুমি তাদেরকে নিয়ে যাও এবং আশ্রয় শিবিরে গিয়ে অবস্থান কর।' বোন বললেন, ভাইজান কক্ষনো তা হতে পারে না, আমি চাই আমার সন্তানদ্বয় তোমার জন্য কুরবান হোক। আমি যেন জান্নাতুল ফেরদাউসে গিয়ে আমার আব্বাজানকে বলতে পারি, আমার দুটি ছেলেও আপনার সন্তানের জন্য কুরবানী দিয়েছি। তাই তুমি এদেরকে বুকে জড়িয়ে ধরুন এবং বিদায় দিন।

বোনের বার বার আকুতি-মিনতির কারণে তিনি (রাঃ) তাদেরকেও যুদ্ধক্ষেত্রে পাঠালেন। হযরত জয়নাব (রাঃ) তাঁর নয়নমনি ও জানের জান সন্তানদের প্রতি নিজের অগাধ মায়া মমতাকে ধামা চাপা দিয়ে সন্তানদ্বয়কে বিদায় দিলেন। এ কঁচি ছেলেদ্বয় বেশী দূর অগ্রসর হতে পারল না, ইয়াজীদী বাহিনীর জালিমেরা এসে তাদেরকে বর্ষার অগ্রভাগে উঠিয়ে নিল। হযরত ইমাম হুসাইন (রাঃ) এ দৃশ্য দেখে দৌড়ে গেলেন এবং তাঁর ভাগিনাধয়ের লাশ কাঁধে নিয়ে আশ্রয় শিবিরের কাছে এনে রাখলেন এবং বোনকে ডাক দিয়ে বললেন, ওহ্ জয়নাব! তোমার আরজু পূরণ হলো, তোমার সন্তানদ্বয় জান্নাতুল ফেরদাউসে পৌঁছে তাদের তৃষ্ণা নিবারণ করছে। মা ছেলেদের লাশের পাশে এসে নীরবে অশ্রু বিসর্জন করলেন এবং ছেলেদের মাথার চুলে আঙ্গুলি বুলিয়ে বুলিয়ে বলতে লাগলেন- বাবারা! তোমাদের প্রতি তোমার মা খুবই সন্তুষ্ট। তোমরা তোমার মামার জন্য জান কুরবান করেছ এবং জান্নাতুল ফেরদাউসে পৌঁছে গেছ।

হযরত আব্বাস (রাঃ) এর শাহাদাত

হযরত ইমাম হুসাইন (রাঃ) বোনের হাত ধরে এক প্রকার জোর করে বোনকে নিয়ে তাঁবুতে প্রবেশ করলেন। তথায় গিয়ে আর এক দৃশ্য দেখলেন, তাঁর (রাঃ) ছয় মাসের দুগ্ধ পোষ্য সন্তান হযরত আলী আসগর তৃষ্ণায় ছটপট করছিল এবং তাঁর জিহ্বা বের হয়ে গিয়েছিল। ছেলের মা বললেন, বাচ্চার এই অবস্থা আমি আর সহ্য করতে পারছি না। মুখ দিয়ে ওর কোন আওয়াজ বের হচ্ছে না। যে কোন প্রকারে ওর জন্য একটু পানি সংগ্রহ করুন। হযরত আব্বাস (রাঃ) পাশে দাঁড়িয়ে ছিলেন। তিনি এ কথা শুনে একেবারে ব্যাকুল হয়ে পড়লেন এবং বললেন, ভাইজান! আমাকে অনুমতি দাও, আমি এ মূহুর্তে গিয়ে 'ফোরাত নদী থেকে পানি নিয়ে আসি এবং সেই পানি পান করিয়ে এ বাচ্চার তৃষ্ণা নিবারণ করি। হযরত ইমাম হুসাইন (রাঃ) বললেন, ভাই একটু সবর কর, এর তৃষ্ণা জান্নাতুল ফেরদাউসে গিয়ে নিবারণ করবে। কিন্তু আব্বাস (রাঃ) বললেন, ভাই! বড় পরিতাপের বিষয়! আমাদের বর্তমানে একটি মাসুম শিশু এ ভাবে তৃষ্ণায় মারা যাবে, তা কখনো হতে পারে না। আমরা কি সেই শেরে খোদার আওলাদ নই? যিনি খায়বরের বৃহৎ দরজা হাতের উপর তুলে নিয়েছিলেন। আমি কোন বাধা মানতে রাজী নই, এ মূহুর্তে পানি নিয়ে এসে এ মাসুম বাচ্চার তৃষ্ণা মিটাব।

অতঃপর মশক নিয়ে ঘোড়ায় চড়ে তিনি 'ফোরাত নদী'র দিকে ধাবিত হলেন এবং 'ফোরাত নদীর' কাছে গিয়ে অতি দ্রুততার সাথে ঘোড়া থেকে অবতরণ করে মশক ভরে পানি নিলেন ও মুখ বন্ধ করে কাঁধের উপর উঠালেন এবং নিজ হাতে এক অঞ্জলি পানি মুখের কাছে নিলেন কিন্তু সেই মূহুর্তে তৃষ্ণার্ত ভাতিজার কথা মনে উদিত হলো। ভাতিজা যেন বলছে, 'চাচাজান! আপনার উচিত নয় যে, আমার আগে পানি পান করা। আপনি আলী আসগরের তৃষ্ণা নিবারণের জন্য পানি নিতে এসেছেন, নিজের জন্য নয়। প্রথমে আপনার মাসুম ভাতিজার তৃষ্ণা নিবারণ করান। এর পরেই আপনি পান করুন।' শেষ পর্যন্ত হাতে নেয়া পানি ফেলে দিলেন এবং ঘোড়াকে নদীর কিনারা থেকে যখন উপরে উঠালেন, তখন ইয়াজিদের জালিম বাহিনীরা তাঁকে ঘিরে ফেলল। তিনি এ অবরোধ ভেদ করে অগ্রসর হলেন। ওরা পুনরায় অবরোধ করলো। তিনি এটাও প্রতিহত করলেন। এভাবে অবরোধ প্রতিহত করে ইয়াজিদী বাহিনীর অনেককেই জাহান্নামে পাঠিয়ে তিনি অগ্রসর হচ্ছিলেন।

কিন্তু তিনি ছিলেন একা আর এরা ছিল চার হাজারেরও অধিক। ওরা পুনরায় চারিদিক থেকে ঘিরে বৃষ্টির মত তীর নিক্ষেপ করতে লাগল এবং তাঁর শরীর তীরের আঘাতে ঝাঁঝরা হয়ে গেল। এ ভাবে যখন তাঁর শরীর থেকে অনেক রক্ত বের হয়ে গেল, কাপুরুষ ইয়াজিদ বাহিনী বুঝতে পারল যে তিনি অনেক কাবু হয়ে গিয়েছেন। তাই নিকটবর্তী হয়ে পিছন দিক থেকে একজন তরবারীর আঘাতে তাঁর বাম হাত কেটে ফেলল। বাম হাত কেটে ফেলার ফলে মশক পড়ে যাচ্ছিল, শেরে খোদার আওলাদ তখনও সাহস হারাননি। তিনি মশক ডান কাঁধে নিয়ে নিলেন। সেই জালিমরা ডান হাতটাও কেটে ফেলল। মশক তখন পড়ে যাচ্ছিল, কিন্তু শেরে খোদার আওলাদের হিম্মত দেখুন, তিনি দুই বাজু দিয়ে মশক আঁকড়িয়ে ধরলেন। এবার বাজুদ্বয়ও কেটে ফেলল। এখন এমন কোন কিছু নেই যে, যেটা দিয়ে ঘোড়ার লাগাম ধরবেন, এমন কোন হাত নেই যে, যেটা দিয়ে তলোয়ার চালনা করবেন, এমন কিছু নেই যে, যেটা দিয়ে মশক আঁকড়িয়ে ধরবেন।

শেষ পর্যন্ত তিনি দাঁত দিয়ে মশকের মুখ কামড়িয়ে ধরলেন। জালিমরা তীর নিক্ষেপ করে মশক ফুটা করে দিল এবং সব পানি পড়ে গেল। এই অবস্থা দেখে তিনি দাঁতের কামড় থেকে মশক ছেড়ে দিলেন এবং বলতে লাগলেন, ‘হে আলী আসগর! এ অবস্থায় আমি কিভাবে তোমার তৃষ্ণা নিবারণ করি? আমি তো তোমার তৃষ্ণা নিবারণে কামিয়াব হতে পারলাম না। তিনি ঘোড়ার উপর বসা অবস্থায় ছিলেন। ইয়াজিদী বাহিনীর সৈন্যরা তীরের আঘাতে তাঁকে ঘোড়া থেকে মাটিতে ফেলে দিল এবং চারিদিক থেকে তলোয়ার দ্বারা আঘাত করতে লাগল। হযরত হুসাইন (রাঃ) দূর থেকে দেখলেন হযরত আব্বাস (রাঃ) ঘোড়া থেকে মাটিতে পড়ে গেছেন। তখন তিনি গুমরিয়ে কেঁদে উঠলেন এবং বললেন, ‘আমার কোমর ভেঙ্গে গেল।’ তিনি একেবারে ধৈর্য হারা হয়ে পড়লেন। তাঁর সকল সঙ্গীরা চলে গেলেন এবং তাঁর ডান হাত হযরত আব্বাসও চলে গেলেন। এখন হযরত হুসাইন (রাঃ) একেবারে একা হয়ে গেলেন। তিনি (রাঃ) আত্মহারা হয়ে তাঁর ভাইয়ের লাশের কাছে ছুটে গেলেন। হযরত আব্বাস (রাঃ) এর দুই বাহু কাটা ছিল, শরীর ঠাণ্ডা হয়ে গিয়েছিল এবং সেই জালিমরা তাঁর মাথা কেটে নিয়ে গিয়েছিল। লাশের কাছে পৌঁছে তিনি ফুঁপিয়ে ফুঁপিয়ে কাঁদতে লাগলেন এবং বলতে লাগলেন, ‘ভাই! তুমি তো আমাকে ছেড়ে চলে গেলে, তোমার সাথে অনেক কথা বলার ছিল। কিন্তু কিছুই বলতে পারলাম না।’ অতঃপর ভাইয়ের রক্ত রঞ্জিত লাশ সেখানে ফেলে কেঁদে কেঁদে ফিরে আসলেন।

হযরত আলী আকবর (রাঃ) এর শাহাদাত

ফিরে এসে দেখলেন, তাঁর (রাঃ) আঠার বছরের ছেলে হযরত আলী আকবর (রাঃ) যিনি আপাদমস্তক প্রিয় নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর প্রতিচ্ছবি ছিলেন, তিনি যুদ্ধে যাওয়ার জন্য প্রস্তুত হয়ে রইলেন এবং হযরত হুসাইন (রাঃ) কে বললেন, আব্বাজান! আমাকেও বিদায় দিন। আমি চাইনা, আপনার পরে জীবিত থাকতে। হযরত ইমাম হুসাইন (রাঃ) বললেন, বেটা শোন! তুমিতো মুস্তাফা (সাল্লাল্লাহু তাআলা আলাইহে ওয়াআলিহি ওয়াসাল্লাম) এরই প্রতিচ্ছবি। তোমাকে যখন কেউ দেখে, তখন তার দিলের তৃষ্ণা মিটে যায়। তুমিতো আমার নানাজান (সাল্লাল্লাহু তাআলা আলাইহে ওয়াআলিহি ওয়াসাল্লাম) এরই প্রতিচ্ছবি। তোমাকে দেখলেই আমার নানাজান (সাল্লাল্লাহু তাআলা আলাইহে ওয়াআলিহি ওয়াসাল্লাম) এর আকৃতি সামনে এসে যায়। তোমাকে যদি আজ বিদায় দিই, আমাদের ঘর থেকে আমার নানাজান (সাল্লাল্লাহু তাআলা আলাইহে ওয়াআলিহি ওয়াসাল্লাম) এর প্রতিচ্ছবি চলে যাবে। বাবা! তুমি যেও না। ওরা আমারই রক্তের পিপাসু। আমার রক্তের দ্বারাই ওদের পিপাসা নিবারণ হবে। কিন্তু হযরত আলী আকবর বললেন, আব্বাজান! আমিও ওখানে যেতে চাই যেখানে আমার ভাই কাসেম গিয়েছে, যেখানে আমার চাচাজান গিয়েছেন। আমি কাপুরুষের মত পিছনে পড়ে থাকতে চাই না। আমিও জান্নাতুল ফেরদাউসে গিয়ে নিজের তৃষ্ণা নিবারণের জন্য ব্যাকুল। আমাকেও আপনার হাতে বিদায় দিন। আব্বাজান! আমাকে আপনার হাতে বিদায় দিয়ে জান্নাতুল ফেরদাউসে পৌঁছিয়ে দিন। আমাকে জালিমদের হাতে সোপর্দ করে যাবেন না। হযরত ইমাম হুসাইন (রাঃ) শেষ পর্যন্ত বাধ্য হয়ে তাঁর আঠার বছরের ছেলেকে বুকে জড়িয়ে ধরলেন এবং বিদায় দিলেন। হযরত আলী আকবর (রাঃ) রওয়ানা হলেন। আল্লাহ! আল্লাহ! ইনি কে যাচ্ছেন? মুস্তাফা (সাল্লাল্লাহু তাআলা আলাইহে ওয়াআলিহি ওয়াসাল্লাম) এর প্রতিচ্ছবি যাচ্ছেন। হযরত হুসাইন (রাঃ) এর জানের জান যাচ্ছেন। ইনি আলী আকবর নয়, সরকারে দো'আলম হযরত মুস্তাফা (সাল্লাল্লাহু তাআলা আলাইহে ওয়াআলিহি ওয়াসাল্লাম) এর নয়নমনি যাচ্ছেন। ইনি হযরত ফাতেমাতুয যুহরা (রাঃ) এর বাগানের ফুল যাচ্ছেন। ইনি হুযুর (সাল্লাল্লাহু তাআলা আলাইহে

ওয়াআলিহি ওয়াসাল্লাম) এর বাগানের ফুলের কলি যাচ্ছেন। আল্লাহ! আল্লাহ! হযরত আলী আকবর যেতে যেতে এটা পড়তে ছিলেন—

أَنَا عَلِيُّ بْنُ الْحُسَيْنِ بْنِ عَلِيٍّ - نَحْنُ أَهْلُ الْبَيْتِ أَوْلَىٰ بِالنَّبِيِّ

আমি আলী আকবর, হুসাইন (রাঃ) এর বেটা, যে হুসাইন (রাঃ) হযরত আলী মর্তুজা (রাঃ) এর বংশধর। আমরাই হলাম আহলে বায়ত, রসূলে খোদা (সাল্লাল্লাহু তাআলা আলাইহে ওয়াআলিহি ওয়াসাল্লাম) এর সবচেয়ে প্রিয় বংশধর। এ 'শের' পড়তে পড়তে ইমাম আলী আকবর সামনে অগ্রসর হলেন এবং ইয়াজিদী বাহিনীর সামনে গিয়ে বললেন, আমার দিকে লক্ষ্য কর, আমি হুসাইন (রাঃ) এর সন্তান। আলী আকবর আমার নাম। হে নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর ঘরকে উজারকারী! হযরত ফাতেমা (রাঃ) এর বাগানের ফুল ও কলি সমূহকে কারবালার উত্তপ্ত বালিতে ছিন্ন-ভিন্ন করী! আমার রক্ত দ্বারা তোমাদের হাতকে রঞ্জিত কর, আমার প্রতিও তীর নিষ্ক্ষেপ কর।' হযরত ইমাম আলী আকবর (রাঃ) আরও বললেন, জালিমদের সাহস নেই, এ নওজোয়ানের প্রতি তীর নিষ্ক্ষেপ করার বা অসি চালানোর। আমার বিন সা'আদ নিজ সৈন্যদেরকে বলল- হে কাপুরুষ! তোমাদের কি হলো? সত্বর একেও বর্শায় উঠিয়ে নাও। আমি প্রতিশ্রুতি দিচ্ছি, যে সকলের আগে এ নওজোয়ানকে হত্যা করতে পারবে, আমি ওকে 'মোছলের'র রাজত্ব প্রদান করব। এমন কোন ব্যক্তি আছে কি? যে 'মোছলের'র শাসক হতে চায়? 'মোছলে'র রাজত্ব পেতে চায়? তারেক বিন শিশ্ নামক এক বাহাদুর পালোয়ান ব্যক্তি ছিল। ওর মনে আমার কথায় প্রভাব সৃষ্টি করল এবং সে আগে বাড়ল এবং মনে মনে বললো, দেখি ভাগ্যে মোছলের গভর্ণরগিরী আছে কিনা। সে তীর হাতে নিয়ে হযরত আলী আকবর (রাঃ) কে লক্ষ্য করে এগিয়ে গেল। আহ! হযরত ইমাম আলী আকবর (রাঃ) দৃঢ় স্তম্ভের মত দাঁড়িয়ে রইলেন। যখনই সে কাছে আসল, হযরত ইমাম আলী আকবর ঘোড়াকে ফিরায়ে ওর পিছনে এসে গেলেন এবং এমন জোরে আঘাত হানলেন যে এক পলকে ওর মাথাকে শরীর থেকে বিচ্ছিন্ন করে দিলেন।

এই দৃশ্য দেখে ওর ছেলে 'উমর বিন তারেক' রাগে প্রজ্জ্বলিত হয়ে তলোয়ার

উঁচু করে এগিয়ে আসল। যখন উভয়ের তলোয়ার একটার সাথে আর একটা আঘাতে ঝনঝনিয়ে উঠল, তখন যারা উপস্থিত ছিল তারা দেখলো, ওর লাশ মাটিতে পরে ছটফট করছে। দ্বিতীয় পুত্র তল্হা বিন তারেক, সেও বাপ ভাইয়ের খুনের বদলা নেয়ার জন্য অগ্নিশর্মা হয়ে হযরত আলী আকবর (রাঃ) এর উপর ঝাঁপিয়ে পড়ল। হযরত আলী আকবর (রাঃ) একেও উৎখাত করলেন। এ তিনজনকে হত্যা করার পর হযরত ইমাম আলী আকবর (রাঃ) ঘোড়া ফিরিয়ে তাবুর দিকে গেলেন! হযরত ইমাম হুসাইন (রাঃ) যখন দেখলেন তাঁর কলিজার টুকরা যুদ্ধের ময়দান থেকে ফিরে আসছে, তিনি (রাঃ) এগিয়ে গিয়ে জিজ্ঞেস করলেন, বাবা কি খবর? হযরত ইমাম আলী আকবর ঘোড়া থেকে অবতরণ করে আব্বাজানের কাছে আরজি পেশ করলেন, আব্বাজান! তৃষ্ণা খুবই কষ্ট দিচ্ছে, খুবই তৃষ্ণা অনুভব করছি। যদি এক গ্লাস পানি পাওয়া যায়, তাহলে এদের সবাইকে জাহান্নামে পাঠিয়ে দিতে পারব ইনশাআল্লাহ। আব্বাজান! আমি ওদের তিন বাহাদুরকে হত্যা করে এসেছি, কিন্তু আমার মুখ শুকিয়ে গিয়েছে, আমার গলাও শুকিয়ে গিয়েছে, আমার নিশ্বাসটাও সহজভাবে আসছে না। আমি খুবই কাহিল হয়ে গিয়েছি। ইমাম হুসাইন (রাঃ) বললেন, প্রিয় বৎস, ধৈর্য ধারণ কর। কিছুক্ষণের মধ্যেই তুমি জান্নাতুল ফেরদাউসে পৌঁছে যাবে এবং হাউজে কাউছারের পানি দ্বারা তোমার তৃষ্ণা মিঠাবে। কিন্তু বেটা! তুমি যখন আমার কাছে এসেছ, এসো-এ বলে হযরত ইমাম হুসাইন (রাঃ) তাঁর ছেলেকে বুকে জড়িয়ে ধরলেন এবং বললেন, মুখ খোল! হযরত আলী আকবর (রাঃ) মুখ খুললেন এবং হযরত ইমাম হুসাইন (রাঃ) তাঁর শুষ্ক জিহ্বা ওর মুখের ভিতর প্রবেশ করিয়ে দিলেন এবং বললেন, 'আমার জিহ্বাটা চুষে নাও, হয়তো কিছুটা আরামবোধ করবে। হযরত আলী আকবর (রাঃ) তাঁর আব্বার জিব চুষলেন। জিব চুষে কিছুটা আরাম বোধ করলেন।

এরপর হযরত ইমাম আলী আকবর (রাঃ) পুনরায় যুদ্ধের ময়দানের দিকে এগিয়ে গেলেন। হযরত ইমাম আলী আকবর যুদ্ধের ময়দানে প্রমাণ করে দিয়েছেন, তিনি শেরে খোদার দৌহিত্র। তাঁর শিরা-উপশিরায় হযরত আলী মর্তূজা (রাঃ) এর রক্ত রয়েছে এবং তাঁর চোখে হযরত আলী মর্তূজা (রাঃ) এর শক্তি কাজ করছে। তিনি আশিজন ইয়াজিদী বাহিনীকে হত্যা করে নিজে আঘাতে জর্জরিত হয়ে ঘোড়া থেকে পড়ে যাওয়ার কালে শাহাদাত বরণ করার আগে ডাক দিয়ে

বললেন, يَا أَبَتَاهُ أَدْرِكْنِي ওহে আব্বাজান! আমাকে ধরুন, আমাকে নিয়ে যান, আপনার আলী আকবর পড়ে যাচ্ছে। এ আহবান শুনে হযরত ইমাম হুসাইন (রাঃ) দৌড়ে গেলেন। তিনি (রাঃ) ছেলের কাছে পৌঁছার আগেই জালিমরা হযরত আলী আকবর (রাঃ) এর মাথা শরীর থেকে বিচ্ছিন্ন করে ফেললো। জওয়ান ছেলের লাশের পাশে দাঁড়িয়ে তিনি (রাঃ) চোখের পানি ফেলছিলেন এবং অশ্রু সজল নয়নে তাঁর (রাঃ) জওয়ান ছেলের লাশকে কাঁধে উঠিয়ে তাঁবুর পার্শ্বে নিয়ে আসলেন। হযরত আলী আকবর (রাঃ) এর এ শাহাদাতে প্রত্যেকেই দারুণভাবে আঘাত পেলেন। হযরত সৈয়দা জয়নাব (রাঃ) তাঁবু থেকে ঝের হয়ে এসে হযরত আলী আকবর (রাঃ) এর লাশ দেখে চিৎকার করে বলে উঠলেন, আহা! জালিমরা প্রিয় নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর প্রতিচ্ছবিকেও শেষ করে দিল। এ জালিমরা নবী করীম (সাল্লাল্লাহু তাআলা আলাইহে ওয়া সাল্লাম) এর চিহ্নকেও নিঃচিহ্ন করে দিল। নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর প্রতিচ্ছবিকে মাটির সাথে মিশিয়ে দিল।

হযরত আলী আসগর (রাঃ) এর শাহাদাত

হযরত সৈয়দা জয়নাব (রাঃ) ভাতিজার লাশের পাশে দাঁড়িয়ে এ ভাবে আহাজারি করতে ছিলেন। হযরত ইমাম হুসাইন (রাঃ) বোনের হাত ধরে তাঁবুর অভ্যন্তরে নিয়ে গেলেন এবং বললেন- বোন! সবর কর, আল্লাহ তাআলা সবরকারীদের সাথে আছেন। সবর এবং ধৈর্যের আঁচল হাত- ছাড়া করনা। যা কিছু হচ্ছে, আল্লাহর পক্ষ থেকে হচ্ছে, আমাদের সবর ও ধৈর্যের মাধ্যমে কামিয়াবী হাসিল করতে হবে। এটা আল্লাহর পক্ষ থেকে মহাপরীক্ষা। لَنْ يُصِيبَنَا إِلَّا مَا كُتِبَ لِلَّهِ لَنَا শহর বানু হযরত ইমাম হুসাইন (রাঃ) এর সামনে এসে বললেন, আপনার ছেলে আলী আসগর পানির তৃষ্ণায় কেমন করছে, গিয়ে দেখুন। পানির তৃষ্ণায় ওর অবস্থা খুবই সঙ্গীন হয়ে গিয়েছে। ধরফর করছে কিন্তু নড়াচড়া করতে পারছে না। কাঁদছে কিন্তু চোখের পানি আসছে না। মুখ হা করে আছে, কিন্তু কোন আওয়াজ বের হচ্ছে

না। এ অবস্থা দেখে আমাদের প্রাণ ওষ্ঠাগত হয়ে গিয়েছে। শুনুন, জালিমেরা হয়তো জানেনা যে, আমাদের সাথে ছোট ছোট শিশুরাও রয়েছে। আমার মনে হয়, এ ছোট শিশুকে কোলে করে আপনি ওদের সামনে নিয়ে গেলে নিশ্চয় ওদের রহম হতে পারে। কারণ এরকম শিশু ওদের ঘরেও রয়েছে। তাই আপনি এ শিশুকে কোলে করে ওদের সামনে নিয়ে যান এবং বলুন, 'আমাকে পানি দিওনা, তোমাদের হাতে কয়েক ফোঁটা পানি এ শিশুর মুখে দাও'। তাহলে তারা নিশ্চয় দিবে। হযরত ইমাম হুসাইন (রাঃ) বললেন, শহর বানু! তোমার যদি এটা আরজু এবং ইচ্ছা হয়ে থাকে, তা হলে তোমার এ ইচ্ছা পূর্ণ করতে আমি রাজি আছি। কিন্তু এ বদবখতদের প্রতি আমার আদৌ আস্থা নেই।

যাহোক, হযরত ইমাম হুসাইন (রাঃ) ছয় মাসের দুগ্ধপোষ্য শিশুকে কোলে নিয়ে ইয়াজিদ বাহিনীর সামনে গিয়ে বললেন, দেখ! এটা ছয় মাসের দুগ্ধপোষ্য শিশু। এটা আমার ছেলে আলী আসগর। এটা তোমাদের সেই নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর বংশধর, তোমরা যার কলেমা পাঠ কর। শোন! আমি তোমাদের কোন ক্ষতি করে থাকতে পারি, আমার থেকে তোমরা এর বদলা নেবে। কিন্তু এ মাসুম শিশুতো তোমাদের কোন ক্ষতি করেনি। এ শিশু পানির তৃষ্ণার ধরফর করছে। শোন! আমার হাতে কোন পানির গ্লাস দিওনা, তোমাদের হাতে এ শিশুর মুখে কয়েক ফোঁটা পানি দাও। আর এ শিশু পানি পান করার পর তলোয়ার হাতে নিয়ে তোমাদের বিরুদ্ধে লড়বেনা। তাই এর তৃষ্ণাটা নিবারণ কর। দেখ, তৃষ্ণায় এর কি অবস্থা হয়েছে। তাঁবুর পর্দানশীন মহিলাদের কাকুতি-মিনতিতে টিকতে না পেরে একে নিয়ে এসেছি। তিনি (রাঃ) এ করুণ বর্ণনা দিচ্ছিলেন, আর এ দিকে আলী আসগর (রাঃ) কে লক্ষ্য করে 'হরমেলা বিন কাহেল' নামক এক বদবখত জালিম তীর নিক্ষেপ করল এবং সেই তীর এসে আলী আসগর (রাঃ) এর গলায় বিধল। হযরত ইমাম হুসাইন (রাঃ) দেখলেন, শিশুটি একটু গা নাড়া দিয়ে চির দিনের জন্য নিশ্চুপ হয়ে গেল।

হযরত ইমাম হুসাইন (রাঃ) হুঁ হুঁ করে কেঁদে দিলেন এবং বললেন, 'ওহে জালিমেরা! তোমরাতো তোমাদের নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর প্রতিও কোন সমীহ করলে না। তোমাদের মনতো কাফিরদের থেকেও কঠোর। শিশুদের প্রতি কাফিরেরাও সহানুভূতি দেখায়।

তোমরাতো নিজেদেরকে মুসলমান বলে দাবী কর'। তিনি (রাঃ) ছেলের গলা থেকে তীর বের করলেন এবং মাটিতে ফেলে দিয়ে বললেন, **اللَّهُمَّ إِنِّي** থেকে তীর বের করলেন এবং মাটিতে ফেলে দিয়ে বললেন, **اللَّهُمَّ إِنِّي** মওলা! এ লোকেরা যা কিছু করছে, এর জন্য আমি তোমাকে সাক্ষ্য করছি। অতঃপর লাশ কাঁধে নিয়ে তাঁবুর কাছে নিয়ে এসে হযরত আলী আকবর (রাঃ) এর পাশে রেখে ডাক দিয়ে বললেন, 'ওহে শহরবানু! ওহে জয়নাব! আলী আসগর আর ধরফর ধরফর করবে না এবং তৃষ্ণার কারণে হাত পা নড়াচড়া করবে না। এর তৃষ্ণার্ত অবস্থা দেখে তোমাদের অস্থিরতা আর বৃদ্ধি পাবে না। সে জান্নাতুল ফেরদাউসে গিয়ে দাদীজান (রাঃ) এর কোলে বসে হাউজে কাউছারের পানি পান করছে।

زمین کر بلا پر فاطمہ کی پھول بکھرے ہیں

شہیدوں کی یہ خوشبو ہر جگہ مہکتے ہیں

আহ! কারবালার মাঠে হযরত ফাতেমাতুয যুহরা (রাঃ) এর বাগানের ফুল ছিন্ন ভিন্ন হয়ে পড়ে রয়েছে। কোন জায়গায় আব্বাস (রাঃ) পড়ে রয়েছে, কোন জায়গায় কাসেম (রাঃ) পড়ে রয়েছে, কোন জায়গায় আলী আকবর (রাঃ) পড়ে রয়েছে, কোন জায়গায় আলী আসগর পড়ে রয়েছে।

হযরত ইমাম হুসাইন (রাঃ) এর শেষ উপদেশ ও যুদ্ধের ময়দানে গমন

হযরত ইমাম হুসাইন (রাঃ) তাঁবুর অভ্যন্তরে প্রবেশ করলেন। তখন তাঁর (রাঃ) বাইশ বছর বয়স্ক রুগ্ন ছেলে হযরত ইমাম জয়নুল আবেদীন (রাঃ), যিনি মারাত্মক রোগ ও জ্বরে ভুগছিলেন, হেলিয়ে দুলিয়ে কোন মতে আব্বাজানের সামনে এসে আরজ করলেন- আব্বাজান! আমাকেও বিদায় দিন, আমিও শাহাদাত বরণ করতে চাই। তিনি (রাঃ) নিজের রুগ্ন ছেলেকে সান্ত্বনা দিলেন এবং বুকে জড়িয়ে ধরে বললেন, জয়নুল আবেদীন! তোমাকেও যদি বিদায় দিই, তাহলে ইমাম হুসাইন (রাঃ) এর 'সিলসিলা' কার থেকে জারী হবে? বেটা! তোমার থেকেই আমার বংশধরের 'সিলসিলা' জারী হবে। আমি দুআ করি, আল্লাহ তোমাকে জীবিত রাখুক এবং তোমার থেকে আমার বংশধরের 'সিলসিলা' জারী হোক। তিনি (রাঃ)

তাঁকে বাতেনী খেলাফত ও ইমামত প্রদান করলেন। তাঁকে বুকের সঙ্গে জড়িয়ে বাতেনী নেয়ামত প্রদান করলেন এবং কিছু ওসীয়ত করার পর ফরমালেন, বেটা! আমি চলে যাওয়ার পর মদীনায় পৌঁছার যদি সৌভাগ্য হয়, তাহলে সবার আগে নানাজান (সাল্লাল্লাহু তাআলা আলাইহে ওয়াআলিহি ওয়াসাল্লাম) এর রওজায় গিয়ে সর্ব প্রথম আমার সালাম বলিও এবং কারবালায় তোমার দেখা সমস্ত ঘটনা নানাজান (সাল্লাল্লাহু তাআলা আলাইহে ওয়াআলিহি ওয়াসাল্লাম) কে শুনিও।

ছেলেকে ওসীয়ত করার পর হযরত ইমাম হুসাইন (রাঃ) তাঁর প্রস্তুতি শুরু করলেন, নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর পাগড়ী মুবারক মাথার উপর রাখলেন, সৈয়দুশ শুহাদা হযরত হামযা (রাঃ) এর ঢাল পিঠের উপর রাখলেন। বড় ভাই হযরত ইমাম হাসান (রাঃ) এর কোমর বন্ধনী নিজ কোমরে বাঁধলেন এবং আব্বাজান শেরে খোদা হযরত আলী মূর্তুজা (রাঃ) এর তলোয়ার 'জুলফিকার' হাতে নিলেন। অতঃপর কারবালার দুলহা, কারবালার সুলতান' শাহীন শাহে কারবালা হযরত ইমাম হুসাইন (রাঃ) ময়দানের দিকে যাত্রা দিলেন। হযরত ইমাম হুসাইন (রাঃ) তলোয়ার হাতে নিয়ে বের হওয়ার মুহূর্তে সেই পর্দানশীন মজলুম মহিলাদের দিকে এক নজর তাকালেন, তখন সবাই তাঁকে (রাঃ) সবার ও ধৈর্যে অটল দেখালেন, কারো চোখে পানি নেই, সবাই অধিক শোকে পাথর হয়ে রইলেন। কিন্তু উনাদের অন্তর হু হু করে কাঁদছিল। যাদের ভরা ঘর আজ খালি হয়ে গিয়েছে। সর্বশেষ যে আশ্রয়টা ছিল, তিনি (রাঃ)ও এখন তাঁদেরকে বিদায়ী সালাম দিয়ে রওয়ানা হচ্ছেন।

হযরত ইমাম হুসাইন (রাঃ) এক এক জনকে সম্বোধন করে বললেন, 'শহরবানু!' আমার আখেরী সালাম গ্রহণ করো, 'রোবাব! হুসাইন (রাঃ) এর চেহারা দেখে নাও, সম্ভবতঃ এ চেহারা দেখার তোমার নসীব আর নাও হতে পারে। জয়নাব! তোমার ভাই যাচ্ছে, জয়নাব! তুমি খায়বর যুদ্ধ বিজয়ীর কন্যা, তুমি ধৈর্যশীলা ফাতিমাতুয যুহরা (রাঃ) এর কন্যা, তুমি সর্বশ্রেষ্ঠ সবারকারী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর আওলাদ। সবার ও ধৈর্যের আঁচল হাতছাড়া করনা। দেখ, এমন কোন কাজ করিও না, যাদ্বারা আল্লাহ ও তাঁর রসূল নারাজ হয়। যে কোন অবস্থায় ধৈর্যহারা হইওনা। জয়নাব! আর একটি কথা শোন, আমার প্রিয় কন্যা সখিনাকে কাঁদতে দিওনা। সে আমার সব চেয়ে আদরের মেয়ে। ওকে আদর করিও এবং সদা বুকে জড়িয়ে রাখিও। আমি যাচ্ছি, তোমাদেরকে

আল্লাহর কাছে সোপর্দ করলাম। তিনি (রাঃ) এ কথাগুলো বলছিলেন, আর এদিকে তাঁর মাসুম কন্যা এসে জড়িয়ে ধরলো। হযরত রোবাব (রাঃ) এসে হযরত হুসাইন (রাঃ) এর কাঁধে মুখ রেখে ফুঁফিয়ে ফুঁফিয়ে কাঁদতে লাগলেন এবং বলতে লাগলেন, আমাদেরকে ফেলে আপনি কোথায় যাচ্ছেন, এ দুর্দিনে আমাদেরকে এ অবস্থায় ফেলে কোথায় যাচ্ছেন? জালিমদের হাতে আমাদের সোপর্দ করে কোথায় যাচ্ছেন? আমাদের পরিণাম কি হবে! এ পুত্রা আমাদের সাথে কী যে আচরণ করবে! তিনি (রাঃ) বললেন, আল্লাহ তাআলা তোমাদের সাথে আছেন। তোমরা আল্লাহর নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর আওলাদ, আহলে বায়তের অন্তর্ভুক্ত। আল্লাহ তাআলা তোমাদের ইজ্জত সম্মানের হেফাজতকারী। হযরত ইমাম হুসাইন (রাঃ) সবাইকে ধৈর্য ধারণের জন্য তাগিদ দিলেন। কিন্তু নিজে অধৈর্যের চূড়ান্ত পর্যায়ে পৌঁছে গিয়েছিলেন। তবুও একান্ত কষ্টে আত্ম সংবরণ করে হযরত ইমাম হুসাইন (রাঃ) ঘর থেকে বের হয়ে নিজের ঘোড়ার কাছে আসলেন এবং যে মাত্র ঘোড়ায় আরোহন করতে যাচ্ছিলেন, সে মুহূর্তে হযরত সৈয়দা জয়নাব (রাঃ) মাথায় পর্দা দিয়ে বের হয়ে আসলেন এবং বললেন, ভাইজান! যে মায়ের তুমি দুধ পান করেছ, আমিও সে মায়ের দুধ পান করেছি, আমিও হযরত আলী মর্তুজা (রাঃ) এর কন্যা। ভাইজান! তুমি সবাইকে ঘোড়ায় আরোহণ করিয়ে ময়দানে পাঠিয়েছ, কিন্তু তোমাকে আরোহণ করার মত এখন আর কেউ নেই। তাই এ মজলুম বোন তোমাকে ঘোড়ায় আরোহণ করাবে। আমি তোমার ঘোড়ার লাগাম ধরলাম, তুমি আরোহণ কর। হযরত হুসাইন (রাঃ) ঘোড়ায় আরোহণ করে ময়দানের দিকে যাত্রা শুরু করলেন। হযরত ফাতেমাতুয যুহরা (রাঃ) এর নয়নমনি ইয়াজিদী বাহিনীর সাম্না সামনি হতে চলছেন। নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর দৌহিত্র পরিবারের সবার শাহাদাত বরণ করার পর নিজে শাহাদাত বরণ করতে চলছেন।

হযরত ইমাম হুসাইন (রাঃ) এর বীর বিক্রম আক্রমণ

আল্লাহ! আল্লাহ! হযরত হুসাইন (রাঃ) ইয়াজিদী বাহিনীর সামনে গিয়ে
লেন, দেখ, আমি কে? আমি জান্নাতের যুবকদের সর্দার। আমি ঐ হুসাইন
(রাঃ), যাকে রসুলুল্লাহ (সাল্লাল্লাহু তাআলা আলাইহে ওয়াআলিহি ওয়াসাল্লাম) চুমু
কেন এবং ফরমাতেন, এটা আমার ফুল। আমি ঐ হুসাইন (রাঃ) যার মা হযরত

ফাতেমাতুয যুহরা (রাঃ), আমি ঐ হুসাইন (রাঃ), যার পিতা হযরত আলী মর্তুজা (রাঃ) খায়বর বিজয়ী, আমি ঐ হুসাইন (রাঃ), যার নানা আল্লাহর নবী খাতেমুল আশিয়া হযরত মুহাম্মদ মুস্তাফা (সাল্লাল্লাহু তাআলা আলাইহে ওয়াআলিহি ওয়াসাল্লাম), আমি ঐ হুসাইন (রাঃ), যখন আল্লাহর নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) সিজদারত অবস্থায় থাকতেন, আমি পিঠের উপর সওয়ার হয়ে যেতাম। তখন তিনি (সাল্লাল্লাহু তাআলা আলাইহে ওয়াআলিহি ওয়াসাল্লাম) সিজদাকে দীর্ঘায়িত করতেন। ওহে নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর ঘর উচ্ছেদকারীরা! ফাতেমাতুয যুহরা (রাঃ) এর বাগানের ফুলকে ছিড়ে ছিন্ন ভিন্ন করে কারবালার উত্তপ্ত বালিতে নিক্ষেপকারীরা! এসো, আমার রক্তের দ্বারাও তোমাদের হাতকে রঞ্জিত কর। কি দেখছ? আমার পিছনে আর কেউ নেই। একমাত্র আমিই রয়েছি। এগিয়ে এসো! তখন ওরা তলোয়ার খাপ থেকে বের করে তীর উত্তোলন করে এগিয়ে আসল। কিন্তু হযরত ইমাম হুসাইন (রাঃ) যখন খাপ থেকে তলোয়ার বের করে ওদের উপর আক্রমণ করলেন, তখন ওরা মেঘের পালের মত পালাতে লাগল। হযরত ইমাম হুসাইন (রাঃ) এমন বিদ্যুৎ বেগে ওদের উপর তলোয়ার চালাতে লাগলেন যে ওদের শরীর থেকে মাথা বিচ্ছিন্ন হয়ে এমনভাবে পতিত হতে লাগল যেমন শীতকালে বৃষ্টির পাতা ঝরে পড়ে। হযরত ইমাম হুসাইন (রাঃ) অল্প সময়ের মধ্যে লাশের স্তুপ করে ফেললেন। তিনি (রাঃ) নিজে তীরের আঘাতে জর্জরিত এবং তিন দিনের তৃষ্ণায় কাতর হওয়া সত্ত্বেও তাঁর (রাঃ) তলোয়ার 'জুলফিকার' তখনও সেই নৈপুণ্য দেখিয়ে যাচ্ছিল, যে ভাবে বদরের যুদ্ধে দেখিয়েছিল। বদরের যুদ্ধে এ তলোয়ার যখন হযরত আলী (রাঃ) এর হাতে ছিল এবং চালানো হচ্ছিল, তখন অদৃশ্য থেকে আওয়াজ আসছিল **لَأَفْتَى الْأَعْلَى لَأَسْتَيْفُ الْأَزْوَاقَ الْفَقَارَ** অর্থাৎ আলী (রাঃ) এর মত যেমন কোন জওয়ান নেই, তেমন 'জুলফিকারের' মত কোন তলোয়ার নেই। এখনও সেই তলোয়ার সেই নৈপুণ্য দেখাচ্ছিল। মোট কথা, হযরত ইমাম হুসাইন (রাঃ) লাশের স্তুপ করে ফেলেছেন। ইয়াজিদী বাহিনীকে কেটে কেটে মাটি রঞ্জিত করে ফেললেন। একদিকে তিনি (রাঃ) যেমন অনেক ইয়াজিদী সৈন্যকে কচুকাটা করলেন, অন্য দিকে ওরাও তাঁকে (রাঃ) আঘাতে জর্জরিত করে ফেললো।

হযরত ইমাম হুসাইন (রাঃ) এর শাহাদাত

নিজেদের মারাত্মক পরিণতির কথা উপলব্ধি করে 'আমর বিন সা'আদ' নির্দেশ দিল, সবাই মিলে চারিদিক থেকে ওনাকে (রাঃ) লক্ষ্য করে তীর নিক্ষেপ কর। নির্দেশমত ইয়াজিদী বাহিনী নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর দৌহিত্রকে চারিদিক থেকে ঘিরে বৃষ্টির মত তীর নিক্ষেপ করতে লাগল। ফলে চারি দিক থেকে তীর এসে হযরত ইমাম হুসাইন (রাঃ) কে আঘাত হানতে লাগল। কোনটা ঘোড়ার গায়ে লাগছিল, কোনটা তাঁর (রাঃ) নিজের গায়ে পড়ছিল। এ ভাবে যখন তীরের আঘাতে তাঁর (রাঃ) পবিত্র শরীর ঝাঁঝরা হয়ে ফিনকি দিয়ে সারা শরীর থেকে রক্ত বের হতে লাগলো, তখন তিনি (রাঃ) বার বার মুখে হাত দিয়ে বললেন, বদবখত! তোমরাতো তোমাদের নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর লেহাজও করলেনা। তোমরা নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর বংশধরকে হত্যা করেছ। এ ভাবে যখন তিনি (রাঃ) আর একবার মুখের উপর হাত দিলেন, তাঁর (রাঃ) চোখের সামনে আর একটা দৃশ্য ভেসে উঠল, তিনি (রাঃ) দেখতে পেলেন, নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) হাতে একটি বোতল নিয়ে দাঁড়িয়ে আছেন। হযরত আলী মর্তুজা (রাঃ) ও হযরত ফাতেমা যুহরা (রাঃ)ও পার্শ্বে আছেন, আর বলছেন, 'হুসাইন! আমাদের দিকে তাকাও, আমরা তোমাকে নিতে এসেছি।'

হযরত ইমাম হুসাইন (রাঃ) এর কাপড় রক্তে ভিজে যাচ্ছিল আর হযরত (সাল্লাল্লাহু তাআলা আলাইহে ওয়াআলিহি ওয়াসাল্লাম) সেই রক্ত বোতলে ভরে নিচ্ছেন এবং বলছিলেন, **اللَّهُمَّ اَعْطِنِي الْحُسَيْنَ صَبْرًا وَاَجْرًا** (হে আল্লাহ! হুসাইনকে পরম ধৈর্য ধারণের ক্ষমতা দান কর।) আল্লাহ! আল্লাহ! নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর দৌহিত্র নিজের রক্তে রঞ্জিত হয়ে গেলেন। শরীর থেকে রক্ত বের হয়ে গিয়ে একেবারে রক্তশূণ্য হয়ে গেলেন এবং আঘাতে আঘাতে জর্জরিত হয়ে ঘোড়া থেকে পড়ে গেলেন। যে মুহর্তে হযরত ইমাম হুসাইন (রাঃ) ঘোড়া থেকে পড়ে গেলেন, আল্লাহর আরশ দুলিয়ে উঠলো, ফাতেমাতুয যুহরা (রাঃ) এর আত্মা ছটফট করতে লাগল, হযরত আলী (রাঃ) এর

রুহ মুবারক থেকে 'আহ' শব্দ বের হল। সেই হুসাইন (রাঃ) পতিত হলেন, যাকে প্রিয় নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) নিজের কাঁধে নিতেন। ঘোড়া থেকে পতিত হওয়ার পর কমবখত সীমার, হাওলা বিন ইয়াজিদ, সেনান বিন আনস প্রমুখ বড় বড় জালিম এগিয়ে আসলো এবং হযরত ইমাম হুসাইন (রাঃ) এর শরীরের উপর চেপে বসল। সীমার বুকের উপর বসল। হযরত ইমাম হুসাইন (রাঃ) বুকের উপর সীমারকে দেখে বললেন, আমার নানাজান (সাল্লাল্লাহু তাআলা আলাইহে ওয়াআলিহি ওয়াসাল্লাম) ঠিকই বলেছেন "এক হিংস্র কুকুর' আমার আহলে বায়তের রক্তের উপর মুখ দিচ্ছে", আমার নানাজান (সাল্লাল্লাহু তাআলা আলাইহে ওয়াআলিহি ওয়াসাল্লাম) এর কথা ষোল আনা সত্য, তুমিই আমার হত্যাকারী। আজ জুমার দিন, এ সময় লোকেরা আল্লাহর দরবারে সিজদারত। আমার মস্তকটা তখনই আমার শরীর থেকে বিচ্ছিন্ন কর, যখন আমিও সিজদারত থাকি।' আহ! দেখুন, হযরত ইমাম হুসাইন (রাঃ) জীবন সায়াহের সেই মুহুর্তেও পানি পান করার ইচ্ছা প্রকাশ করেননি, নিজের ছেলে মেয়েকে দেখার জন্য আরজু করেননি, সেই সময়ও কোন আকাঙ্খা বা আরজু থাকলে এটাই ছিল যে, আমার মাথা নত হলে যেন আল্লাহর সমীপেই নত হয়। সে সময়ও তিনি (রাঃ) বাতিলের সামনে মাথা নত করেন নি। সেই সময়ও তিনি (রাঃ) সিজদা করে বিশ্ববাসীকে দেখিয়েছেন, নামায পড়ে দেখিয়েছেন, দুনিয়াবাসীকে জানিয়ে দিয়েছেন যে, হুসাইন (রাঃ) আঘাতে আঘাতে জর্জরিত হয়ে মৃত্যুর দুয়ারে দাঁড়িয়েও নামায ত্যাগ করেননি। তিনি (রাঃ) দুনিয়াবাসীকে এটাই যেন বলতে চেয়েছিলেন, আমাকে যদি ভালবাসেন, আমার জিন্দেগী থেকে শিক্ষা গ্রহণ করুন।

হযরত ইমাম হুসাইন (রাঃ) সিজদায় মাথা রাখলেন এবং **سُبْحَانَ رَبِّيَ** **الْأَعْلَى** তসবীহ পাঠ করে বললেন- মওলা! যদি হুসাইন (রাঃ) এর কুরবানী তোমার দরবারে গৃহীত হয়, তাহলে এর ছোয়াব নানাজান (সাল্লাল্লাহু তাআলা আলাইহে ওয়াআলিহি ওয়াসাল্লাম) এর উম্মতের উপর বখশিশ করে দাও। হযরত ইমাম হুসাইন (রাঃ) এর মস্তক মুবারক যখন শরীর থেকে বিচ্ছিন্ন করে ফেলল তখন তাঁর (রাঃ) ঘোড়া স্বীয় কপালকে তাঁর (রাঃ) রক্তে রঞ্জিত করল এবং দৌড়ে

چلے جیتے لآگے، تখন سیمار لاکدےرکے بےل، ڈوڈاٹیکے ڈر، کیتو یزجن لاک ڈوڈاٹیکے ڈر تے اگیے گےل، سے سبائیکے آکرمےن کرےل اےب ڈاڈ آر پا دیے جخم کرے وڈےرکے شےب کرے دل۔ سڈےر جن لاککے ا ڈاےبے ختےم کرےل۔ شےب پرفنڈ سیمار بےل، ڈےڈے داو، دےخی کیکے کرے۔ ڈوڈا ڈوڈے گیکے ڈاڈر کاڈے گےل اےب کانا و ڈیکار کر تے لآگے۔

لآشےر پارڈے ہڈر ت سےیدا جڈنا ب (را:) و ہڈر ت سڈینا (را:)

ہڈر ت سےیدا جڈنا ب (را:) یخن ڈوڈار کانا و ڈیکار شنلےن، تখন ہڈر ت سےیدا سڈینا (را:) کے ڈےکے بےلےن، بےٹیکے! اےکڈ ڈاڈا و، آامیکے بےر ہڈے دےخے آاسیکے، سببب ت: ڈوڈار آا ببا اےسےڈےن۔ مڈلوم بوان بےر ہڈے دےخےلےن، ڈوڈار ڈین خالی اےب ڈوڈار کپال رنڈ رنڈیت۔ ڈا دےخے ہڈر ت سےیدا جڈنا ب (را:) بوبڈ تے پارلےن، ہڈر ت ڈسائین (را:) شآادآت برون کرےڈےن اےب ڈینیکے ڈیکار دیے بےلے ڈڈلےن، واہ حسینا واہ غریبا، ڈاڈر (را:) اے آا وڈا ج ڈنار ساڈے ساڈے ڈاڈر اڈبڈرے ڈنڈنےر رول پڈے گےل۔ ہڈر ت سےیدا جڈنا ب (را:) ڈاک دیے بےلےن، شھر بانو! سڈیناکے ڈامیکے رےخ، آامیکے ڈاڈےر خببر نیتے یآڈھیکے۔ ہڈر ت ڈاڈےمآڈوڈ یڈرآا (را:) اےر کنڈا ہڈر ت سےیدا جڈنا ب، ڈار مآڈار وڈنا و کون اڈرکیت بڈککے کখনو دےخےنیکے، ڈینیکے ڈرےر ڈوڈھڈیکے ڈےکے کখনو بےر ہڈنیکے، آا ج پردےشے اڈسہاڈ اڈبڈاڈ ڈوڈےر ڈپر پڈا ڈےلے ڈاڈےر لآشکے دےخار جنڈ کاربالار مڈدانےر دیکے ڈوڈے چلےلےن۔

القصه گرتی پڑتی گئیں فوج کے قریں

آیا نظر نہ فاطمہ (رض) زہرا کا مہ جبیں

گھیرے ہوئے تھی چار طرف سے سپاہ کیں

چلائیں راہ دو مجھے اے دشمنان دین

یہ ابن فاطمہ ہے میں زہرا کی جائی ہوں

دیدار آخری کی تمنا میں آئی ہوں

وہہ جالمگنہ“ پھ ھےڈے داو، آمار بائکے دےختے داو، آمار بائکے آامی دےختے چائ۔ ورا بلل، تومی وکے کی دےخبے، ورا ماخا شریر ھےکے ببھینن کرے فےلا ھےےے۔

قاتل تو اس طرف کو سر پاک لے چلا

تڑ پا زمین پہ یار بدن شاہ کربلا

طبل ظفر بجانے لگے دشمن خدا

غل پڑگیا شہید ہوا ابن مرتضیٰ

کھیتی علی کی کٹ گئی بستی اجر گئی

پردیس میں حسین سے زینب بچھڑ گئی

ھیرت سےیدا جیناب (را:) گے دےخلن-

ناگاہ بہن کو آیا نظر لاشئہ امام

بفلوں میں ہاتھ ڈال کے لپٹی وہ تشنہ کام

رکھ کر کٹے گلے پہ گلا یہ کیا کلام

اپنی کہی نہ میری سئی ہو گئے تمام

ہائے ہائے یہ میرے اتے ہی بے داد ہو گی

تم ہو گئے شہید میں برباد ہو گئی

ھیرت سےیدا جیناب (را:) بائےیر لاشکے جڈے دے کاندتے لآگلن، آار بلتے لآگلن، بائیا! تومیٹو آامادےرکے جالمدےر ھاوولا کرے چلے گے۔ آاللاھ! آاللاھ! ھیرت ایمام ھسائین (را:) آر نئپراں دےھ پڈے

রইল। যে সব লোকেরা হযরত ইমাম হুসাইন (রাঃ) এর লাশ দাফন করেছিলেন, তারা বলেছেন যে, হযরত ইমাম হুসাইন (রাঃ) এর শরীরে চৌত্রিশটি বর্শার ছিদ্র ছিল, চল্লিশটা তলোয়ারের আঘাত ছিল এবং একশত একুশটি তীরের জখম ছিল।

হযরত সৈয়দা জয়নাব (রাঃ) নিজের ভাইয়ের লাশ মুবারকের পাশে বিভোর হয়ে পড়ে রইলেন। এ দিকে হযরত সৈয়দা সখিনা হযরত সৈয়দা শহরবানু (রাঃ) থেকে নিজেকে মুক্ত করে কারবালার ময়দানের দিকে অঝোর ক্রন্দনরত অবস্থায় ছুটে গেল এবং চিৎকার করে বলতে লাগলো- ফুফু, তুমি কোথায়? আব্বু আমার কোথায়? আওয়াজ শুনে ফুফু ডাক দিলেন- বেটী, এ দিকে এসো, তোমার মজলুম ফুফু, তোমার আব্বুর পাশে বসে আছে। হযরত সৈয়দা সখিনা যখন নিজের আব্বাজানকে দেখলো, চিনতে পারলোনা। কারণ, তাঁর (রাঃ) সমস্ত শরীর রক্ত রঞ্জিত ছিল এবং মস্তক মুবারক শরীর থেকে বিচ্ছিন্ন ছিল। মাসুম সখিনা আব্বাজানের লাশের উপর ঝাঁপিয়ে পড়ে বেহুস হয়ে গেল। হযরত সৈয়দা জয়নাব (রাঃ) সখিনার হাত ধরে টেনে বলল- মা সখিনা! উঠ, আমি তোমাকে তাঁবুতে দিয়ে আসি। আমার ভাইয়া আমাকে বলেগেছেন যে, তোমাকে সান্ত্বনা দেয়ার জন্য। জোর করে সখিনাকে হযরত ইমাম হুসাইন (রাঃ) এর বুক থেকে ছাড়িয়ে তাঁবুতে নিয়ে গেলেন।

আল্লাহ! আল্লাহ! হযরত ইমাম হুসাইন (রাঃ) ও তাঁর অন্যান্য সঙ্গী সাথীদের লাশ কারবালার ময়দানে পড়ে রইলো। ইয়াজিদী বাহিনী তাদের লোকদের লাশ গুলো খুঁজে খুঁজে দাফন করলো। কিন্তু হযরত ইমাম হুসাইন (রাঃ) ও আহলে বায়তের লাশ যে ভাবে ছিল, সে ভাবে পড়ে রইল। আল্লাহ! আল্লাহ! এরা এক রাত সেখানে অবস্থান করলো। পরের দিন তাদের চলে যাওয়ার কথা। যখন রাত হল, ইয়াজিদী বাহিনীরা, যারা ভ্রান্ত ধারণার বশবর্তী হয়ে মনে করেছিল তারা বিজয়ী হয়েছে, বাস্তবে তাদের এমন পরাজয়ই হলো, যা আর কারো কখনো হয়নি। যাক, যখন তারা শুয়ে পড়ল, হযরত সৈয়দা জয়নাব (রাঃ) মুখে পর্দা ফেলে তাঁবু থেকে পুনরায় বের হলেন। দেখলেন, হযরত ফাতেমাতুয যুহরা (রাঃ) এর বাগানের জান্নাতি ফুল কারবালার প্রান্তরে পড়ে রয়েছে। নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর নয়নের মনি চকমক করছে। সৈয়দা জয়নাব (রাঃ) এক পলক সকল প্রিয়জনকে দেখলেন। সবর ও ধৈর্যে অটল থাকা সত্ত্বেও

অঝোরে কাঁদতে লাগলেন। কাঁদতে কাঁদতে এক এক জনকে দেখে দেখে শেষে ভাইয়ের লাশের পাশে আসলেন এবং বললেন,

سر میرے کوئی دوس نہ دیویں بہن تیری مجبور اے

کتھوں لیا واں کفن میں تیرا ایتھوں شہر مدینہ دور اے

ওগো আমার ভাইয়া! আমি অসহায়, অপারগ, ভিন দেশের মুসাফির, মদীনা মনোয়ারা অনেক দূর। আমি কি ভাবে ওখানে তোমার খবর পৌঁছাবো? আমি কি ভাবে তোমার দাফন করব? আহ! হযরত ফাতেমাতুয যুহরা (রাঃ) এর কলিজার টুকরা, নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর আদরের দৌহিত্র কারবালার প্রান্তরে বেওয়ারীশের মত পড়ে রইল।

হযরত সৈয়দা জয়নাব (রাঃ) মদীনার দিকে মুখ করে ক্রন্দনরত অবস্থায় হাত তুলে বলতে লাগলেন—

يَا رَسُولَ اللَّهِ! يَا مُحَمَّدَ صَلَّى عَلَيْكَ اللَّهُ وَمَلِكُ السَّمَاءِ-

هَذَا حُسَيْنٌ بِالْعَرَاهِ مُذْمِلٌ بِالدِّمَاهِ- مَقْطَعُ الْأَعْضَايَا-

ইয়া রাসুল্লাহ! (সাল্লাল্লাহু তাআলা আলাইহে ওয়াআলিহি ওয়াসাল্লাম) আপনার দৌহিত্র হযরত ইমাম হুসাইন (রাঃ) কাফন ও দাফনহীন রক্ত রঞ্জিত অবস্থায় পড়ে রয়েছেন। আর এদিকে রুগ্ন হযরত জয়নুল আবেদীন (রাঃ) হাত তুলে বলছেন,

يَا رَحْمَتَ الْعَالَمِينَ اذْرِكْنِي زَيْنَ الْعَابِدِينَ-

হে সমগ্রজগতের রহমত! জয়নাল আবেদীনকে প্রবোধ দান করুন।

আল্লাহ! আল্লাহ! এ ভাবে রাত্রি অতিবাহিত করলেন। উলামায়ে কিরাম লিখেছেন যে, হযরত ইমাম হুসাইন (রাঃ) এর শাহাদাতের সময় সূর্য গ্রহণ হয়েছিল, আসমান ঘোর অন্ধকার হয়ে গিয়েছিল, ফলে দিনে তারকারাজি দৃষ্টিগোচর হয়েছিল। কিছুক্ষণ পর দিগন্ত লালিমাতে পরিণত হয়েছিল এবং আসমান থেকে রক্ত বর্ষিত হয়েছিল। সাত দিন পর্যন্ত এ রক্ত বর্ষন অব্যাহত ছিল। সমস্ত ঘর বাড়ীর দেয়াল রক্তে লাল হয়ে গিয়েছিল এবং যে সব কাপড়ের উপর রক্ত পতিত হয়েছিল,

সেগুলো ছিঁড়ে টুকরো টুকরো হওয়ার পরও সেই লালিমা যায়নি। জমিনও কান্নাকাটি করেছিল। পানি ভর্তি কলসী রক্তে লাল হয়ে গিয়েছিল। ইয়াজিদী বাহিনীরা যখন উট যবেহ করেছিল তখন এর ভিতর থেকে রক্তের পরিবর্তে আগুনের লেলিহান শিখা বের হয়েছিল। জ্বীনদের মধ্যেও শোকের মাতম ছড়িয়ে পড়েছিল। এক অদ্ভুত ও বিস্ময়কর অবস্থার সৃষ্টি হয়েছিল। অনেক দুর্লভ, লোমহর্ষক ঘটনার কথা আমরা শুনেছি। কিন্তু হযরত ইমাম হুসাইন (রাঃ) এর শাহাদাতের ঘটনা অতুলনীয়। এর নক্সা চোখের সামনে ভেসে উঠলে মন প্রাণ শিহরিয়ে উঠে।

শহীদ পরিবারকে কুফায় আনয়ন

ইমাম হুসাইন (রাঃ) এর শাহাদাতের পর ইয়াজিদী বাহিনী একরাত কারবালার প্রান্তরে অবস্থান করেছিল। পর দিন সকালে তারা তাদের মৃতদেরকে দাফন করলো। কিন্তু শহীদদের লাশ দাফন ও কাফন বিহীন অবস্থায় যেমনি ছিল, তেমনি অবস্থায় ফেলে রেখে হযরত ইমাম হুসাইন (রাঃ) এর পরিবারের অবশিষ্ট মহিলা ও শিশুদেরকে বন্দী করে উটের উপর উঠিয়ে কুফার দিকে যাত্রা দিল। চলতে চলতে তারা রাত্রি বেলা কুফার কাছে পৌঁছল। ঐখান থেকে মাত্র দুই মঞ্জিল দূরত্বে ছিল কুফার রাজধানী। হযরত ইমাম হুসাইন (রাঃ) এর মস্তক মুবারক নিয়ে 'হাওলা বিন ইয়াজিদ' যখন রাত্রে কুফার রাজধানীতে এসে পৌঁছেছিল, তখন গভর্নর ভবনের শাহী দরজা বন্ধ হয়ে গিয়েছিল। মস্তকের জিন্মাদারী যেহেতু ওর হাতে, সেহেতু অন্য কাউকে হস্তান্তর না করে মস্তক মুবারক নিজের ঘরে নিয়ে গেল। ঘরে নিয়ে গিয়ে একটি মাটির বাসনের নীচে মস্তক মুবারক রেখে দিল। ওর স্ত্রী জিজ্ঞাসা করল, তুমি কি এনেছ? সে উত্তরে হযরত হুসাইন বিন আলী (রাঃ) এর মস্তক মুবারকের কথা বললো। এটা শুনে সে শিহরিয়ে উঠলো এবং বললো- কী জঘন্য ব্যাপার! তোমার ঘর ধ্বংস হয়ে যাবে। হযরত হুসাইন বিন আলী (রাঃ) এর মস্তক মুবারক! নবী মুস্তাফা (সাল্লাল্লাহু তাআলা আলাইহে ওয়াআলিহি ওয়াসাল্লাম) এর দৌহিত্রের মস্তক মুবারক তুমি মাটির থালার নীচে রাখতে পেরেছ? আফসোস! মানুষ ঘরে সোনা-চান্দি আনে, আর তুমি এনেছ নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর দৌহিত্রের ছিন্ন মস্তক মুবারক। আর এ ভাবে বেয়াদবী এবং অবজ্ঞাভরে রেখে দিয়েছ! আমি তোমার মত বদবখত

লোকের সাথে থাকতে চাইনা' এ বলে সে মস্তক মুবারকের কাছে এসে সম্মান সহকারে মস্তকটিকে মাটি থেকে উঠিয়ে উচ্চস্থানে রাখলো এবং পাশে বসে ভীত সন্ত্রস্ত অবস্থায় চিন্তা করতে লাগল, কী জানি আমাদের ঘরে আল্লাহর কোন্ গজব নাযিল হয়। এমন সময় সে কী দেখতে পেল, তা ওর ভাষায় ঞুন, 'আমি দেখলাম, আসমান থেকে ছোট ছোট সাদা পাখির আগমন হল এবং এগুলো উনার মস্তক মুবারকের এদিক সেদিক উড়ছিল এবং ঘুরাঘুরি করছিল। একবার চলে যেত, আবার আসত। সারারাত এ অবস্থায় ছিল এবং মাঝে মধ্যে মস্তক মুবারক থেকে এমন উজ্জ্বল আলো বিচ্ছুরিত হতে দেখলাম, যা আসমান পর্যন্ত আলোকিত করে ফেলতো।

ইবনে জিয়াদের নিষ্ঠুর আচরণ

রাত অতিবাহিত হওয়ার পর ভোর হল। ইবনে জিয়াদ দরবারে আগমন করল এবং তাকে কারবালার তথাকথিত বিজয় সম্পর্কে অভিহিত করা হল। হাওলা বিন ইয়াজিদ হযরত হুসাইন (রাঃ) এর মস্তক মুবারক দরবারে নিয়ে পেশ করল এবং একটা পাত্রের উপর রেখে তা ইবনে জিয়াদের সামনে রাখল। ইবনে জিয়াদের হাতে একটি ছড়ি ছিল। সে ছড়ির মাথা হযরত ইমাম হুসাইন (রাঃ) এর ঠোঁটের উপর লাগাল এবং দাঁতের সাথে ঘষতে লাগল। সেই সময় তার দরবারে নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর এক বৃদ্ধ সাহাবী হযরত জায়েদ বিন হাসান উপস্থিত ছিলেন। তিনি এ বেয়াদবী দেখে কেঁদে দিলেন এবং বলে উঠলেন, 'হে ইবনে জিয়াদ! যে ঠোঁট এবং দাঁতের উপর তুমি আঘাত হানছ, খোদার কসম করে বলছি, আমি স্বয়ং দেখেছি, সে দাঁত ও ঠোঁটের উপর নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) চুমু দিতেন। আর আজ তুমি সে ঠোঁট এবং দাঁতের সাথে বেয়াদবী করছ।' ভরপুর দরবারে একথাগুলো বলার কারণে ইবনে জিয়াদ খুবই রাগান্বিত হল এবং বলল, 'এ বৃদ্ধকে দরবার থেকে বের করে দাও। বৃদ্ধ না হলে আমি এ মূহর্তে ওর গর্দান দ্বিখন্ডিত করে ফেলতাম'। হযরত জায়েদ বললেন, তোমার জন্য আফসোস! তুমি আমাকে বৃদ্ধ হিসাবে সহানুভূতি দেখালে কিন্তু রসুল্লাহ (সাল্লাল্লাহু তাআলা আলাইহে ওয়াআলিহি ওয়াসাল্লাম) এর শরাফতের প্রতি ক্রক্ষেপ করলে না। আমি বৃদ্ধ বলে তুমি আমাকে রেহাই দিলে, কিন্তু হযরত ইমাম হুসাইন (রাঃ) নবী করিম

(সাল্লাল্লাহু তাআলা আলাইহে ওয়াআলিহি ওয়াসাল্লাম) এর কলিজার টুকরা ও দৌহিত্র হওয়া সত্ত্বেও কোন সমীহ করলেনা। তাঁর কথার প্রতি আদৌ কর্ণপাত না করে ইবনে জিয়াদের অনুচরেরা তাঁকে বেত্রাঘাত করে দরবার থেকে বের করে দিল।

ইবনে জিয়াদ দরবারে দাঁড়িয়ে কয়েকটি দাষ্টিকতাপূর্ণ কথা বলল। যেমন, 'সব প্রশংসা সেই আল্লাহর জন্যে, যিনি দুশমনকে নাজেহাল করল, যিনি দুশমনদেরকে পরাজিত করল এবং যিনি ইবনে জিয়াদকে বিজয় দান করল। সেই সময় খায়বর বিজয়ী বীরের অগ্নিকন্যা হযরত সৈয়দা জয়নাব (রাঃ) সেখানে কয়েদী হিসাবে উপস্থিত ছিলেন। তিনি বলে উঠলেন-

الْحَمْدُ لِلَّهِ الَّذِي أَكْرَمَنَا بِمُحَمَّدٍ (صَلَّى اللَّهُ عَلَيْهِ وَسَلَّمَ)
وَطَهَّرَنَا تَطْهِيرًا

অর্থাৎ সব প্রশংসা আল্লাহর জন্য, যিনি হযরত মুহাম্মদ মুস্তাফা (সাল্লাল্লাহু তাআলা আলাইহে ওয়াআলিহি ওয়াসাল্লাম) এর বংশধর হওয়ার কারণে আমাদেরকে সম্মানিত করেছেন আর যিনি আমাদের সম্পর্কে পবিত্র আয়াত নাযিল করেছেন এবং আমাদের পুঁত পবিত্রতার কথা ঘোষণা করেছেন। ইবনে জিয়াদ বলে উঠলো, তুমি কি এখনও সেই কথা বলছ? তুমি কি দেখনি তোমার ভাইয়ের কি পরিণতি হয়েছে? হযরত জয়নাব (রাঃ) কেঁদে দিলেন এবং কেঁদে কেঁদে বললেন, হে ইবনে জিয়াদ! সেই সময় বেশী দূর নয়, যখন হাশরের ময়দানে একদিকে নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) থাকবেন, আর একদিকে হযরত ইমাম হুসাইন (রাঃ) থাকবেন, তখন তুমি দেখবে জালিমদের কী পরিণতি হয়। আমাদের আরজি আল্লাহর দরবারে পেশ করেছি' এ কথাগুলো বলে তিনি (রাঃ) নিশ্চুপ হয়ে গেলেন।

ইত্যবসরে হযরত ইমাম জয়নুল আবেদীন (রাঃ) এর প্রতি ইবনে জিয়াদের চোখ পড়ল। সে জিজ্ঞাসা করল, এ কে? ইয়াজিদরা বলল, এ হল হযরত ইমাম হুসাইন (রাঃ) এর ছেলে। ইবনে জিয়াদ বলল, তোমরা একে কেন রেখে দিয়েছ? একে কেন হত্যা করনি? ওরা বলল, 'এ অসুস্থ ছিল এবং আমাদের সাথে

মোকাবেলা করতে আসেনি। এ জন্য আমরা একে হত্যা করিনি। ইবনে জিয়াদ বলল, একেও হত্যা করে দাও। আমি চাইনা যে, এদের একজনও বাকী থাকুক। এ পাপিষ্ঠ এ কথাগুলো বলার সাথে সাথে জল্লাদ তলোয়ার নিয়ে এগিয়ে আসলো। হযরত সৈয়দা জয়নাব (রাঃ) হযরত জয়নুল আবেদীন (রাঃ) কে নিজের কাছে টেনে নিলেন এবং বললেন, জালিমরা! আমাদের সাথে কোন মোহরেম (আপনজন) নেই। এ একমাত্র আমাদের মোহরেম (আপনজন)। যদি তোমরা একেও হত্যা কর, আমাদের সাথে কোন মোহরেম থাকবে না। তাই তুমি এটা জেনে রেখ, আমাকে হত্যা করার আগে তুমি এর কাছেও পৌঁছতে পারবে না। যদি একে হত্যা করতে চাও তা হলে প্রথমে আমাকে হত্যা কর। জালিমরা! একে বাঁচতে দাও, যদি তোমরা একেও হত্যা করে ফেল, তা হলে আওলাদে রসুল (সাল্লাল্লাহু তাআলা আলাইহে ওয়াআলিহি ওয়াসাল্লাম) এর 'সিলসিলা' কি ভাবে জারী থাকবে? এ কথাগুলো বলার পর আল্লাহ তাআলা ইবনে জিয়াদের মনে এমন এক ভীতি সৃষ্টি করে দিল, শেষ পর্যন্ত সে তার এ ঘৃণিত সিদ্ধান্ত থেকে বিরত রইল।

এরপর ইবনে জিয়াদ কুফা শহরে সাধারণ সমাবেশের আয়োজন করল এবং সমবেত লোকদের ধমকি ও হুমকি দিয়ে বলল, দেখ! যারা ইয়াজিদের বিরোধীতা করেছে, তাদের কী পরিণতি হয়েছে। তোমরাও যদি ইয়াজিদের বিরুদ্ধে কোন কথা বল, তাহলে তোমাদেরও একই পরিণতি হবে। সে নির্দেশ দিল, শহীদদের মস্তক সমূহ বর্শার অগ্রভাগে নিয়ে এবং আহলে বায়তের অবশিষ্ট সদস্যদেরকে উটের পিঠে উঠিয়ে কুফার অলিতে গলিতে যেন ঘুরানো হয়, যাতে লোকেরা দেখে শিক্ষা গ্রহণ করে এবং আগামীতে ইয়াজিদের বিরুদ্ধে কোন বিদ্রোহ করার সাহস না পায়। নির্দেশ মোতাবেক মস্তক সমূহ বর্শার অগ্রভাগে উঠিয়ে কুফার অলিতে গলিতে ঘুরানো হলো এবং সাথে আহলে বায়তের সেই পর্দানশীন সম্মানিতা মহিলাগণও ছিলেন, যাদের দোপাটা পর্যন্ত লোকেরা আগে কখনও দেখার সুযোগ পায়নি। আফসোস! আজ তাঁদেরকে বেপর্দাভাবে কুফার অলিতে গলিতে ঘুরানো হচ্ছে। যখন তাঁদেরকে ঘুরানো হচ্ছিল তখন বে'ওফা কুফাবাসী, যারা চিঠি লিখে হযরত ইমাম হুসাইন (রাঃ) কে দাওয়াত দিয়েছিল, যারা হযরত ইমাম মুসলিম (রাঃ) এর হাতে বায়াত করেছিল এবং যারা বড় বড় শপথ করে বলেছিল, 'জান-মাল উৎসর্গ করে দিব তবুও আপনার সঙ্গ ত্যাগ করব না' যারা আহলে বায়তের মহক্বতের বড় দাবীদার ছিল, যারা নিজেদেরকে আহলে বায়তের প্রেমিক বলত,

সেই কুফাবাসীরা, মস্তক সমূহ বর্শার অগ্রভাগে নিয়ে এবং আহলে বায়তের অবশিষ্ট সদস্যগণকে একান্ত অমানবিকভাবে কুফার অলিতে গলিতে যখন ঘুরাতে দেখল, তখন তারা নিজেদের ঘরের ছাদের উপর দাঁড়িয়ে, কেউ ঘরের জানালার পার্শ্বে দাঁড়িয়ে চিৎকার করে কাঁদছিল।

যখন হযরত সৈয়দা জয়নাব (রাঃ) তাদের এ কান্না ও চিৎকার করতে দেখলেন, তখন তিনি উটকে থামাতে বললেন এবং ওদেরকে লক্ষ্য করে বললেন, 'ওহে কুফাবাসী! আজ তোমরা কেন মাতম করছ? হযরত ইমাম হুসাইন (রাঃ) এর কাছে চিঠি প্রেরণকারী ছিল কারা? আসার জন্য দাওয়াত দানকারী ছিল কারা? হযরত ইমাম মুসলিমকে যখন প্রতিনিধি করে পাঠানো হয়েছিল, তখন তাঁর হাতে বায়াত করেছিল কারা? এবং বড় বড় শপথ করে জানমাল কুরবানী করার নিশ্চয়তাদানকারী ছিল কারা? জালিমরা! তোমরাইতো চিঠি লিখেছিলে, তোমরাইতো নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর দৌহিত্রকে দাওয়াত করে এনেছিলে। এরপর তোমরাইতো বিশ্বাসঘাতকতা করেছ এবং উনাদেরকে জালিমদের হাতে সোপর্দ করেছ। ফলে নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) এর দৌহিত্রকে একান্ত অমানুষিকভাবে শহীদ হতে হলো। আর এখন তোমরা অশ্রুপাত করছ। বিশ্বাস ঘাতকদের দল! তোমরা কি মনে করেছ, তোমাদের এ অশ্রুপাতের ফলে তোমাদের কপাল থেকে আহলে বায়তের রক্তের দাগ মুছে যাবে? না! না! কক্ষনো তা হবে না, কিয়ামত পর্যন্ত তোমরা কাঁদতে থাকলেও তোমাদের ললাট থেকে এ রক্তের দাগ মুছবে না। আমি অভিশাপ দিচ্ছি, তোমরা কিয়ামত পর্যন্ত এ ভাবে কাঁদতে ও চিৎকার করতে থাক।' হযরত সৈয়দা জয়নাব (রাঃ) কথাগুলো বলে সামনের দিকে এগিয়ে গেলেন।

শহীদ পরিবার ও খন্ডিত মস্তক দামেস্কে প্রেরণ

এ ভাবে তিন দিন পর্যন্ত মস্তক সমূহ ও শহীদ পরিবারের অবশিষ্ট সদস্যদেরকে ঘুরানোর পর ইবনে জিয়াদ নির্দেশ দিল, 'এ বার এ মস্তক সমূহ ও শহীদ পরিবারের অবশিষ্ট সদস্যদেরকে দামেস্কে ইয়াজিদের কাছে নিয়ে যাও। ইবনে জিয়াদ আরও বলল যে, পথের মধ্যে কোন গ্রাম, বাজার, কোন লোক বসতি সামনে পড়লে যেন তকবীর ইত্যাদি বলে শোর গোল করে যাওয়া হয়, যাতে লোকেরা ভয় পায় এবং ইয়াজিদের বিরুদ্ধে কোন প্রতিবাদ করার সাহস না পায়। অতঃপর ইয়াজিদী বাহিনী

মস্তক সমূহ বর্শায় বিদ্ধ করে এবং শহীদ পরিবারের অবশিষ্ট সদস্যদেরকে উটের উপর উঠিয়ে কুফা থেকে দামেস্কের উদ্দেশ্যে যাত্রা দিল। চলতে চলতে রাত্রি বেলা তারা এক গীর্জার সন্নিহিত উপনীত হল। যখন এ কাফেলা গীর্জার কাছে পৌঁছল, তখন গীর্জা থেকে এর প্রধান পাদ্রী বের হয়ে ওদের সামনে এসে জিজ্ঞাসা করল, তোমরা কে? কোথা থেকে আসছ? এ মস্তকগুলো কারদের? এ মহিলাগণ কারা? তোমরা যাচ্ছ কোথায়? ঘটনা কি? তারা সম্পূর্ণ ঘটনা বর্ণনা করল। পাদ্রী সম্পূর্ণ ঘটনা শুন্য পর বলল, তোমরা চলতে চলতে ক্লান্ত হয়ে পড়েছ, রাতটা এখানেই কাটাও এবং এক রাতের জন্য হযরত ইমাম হুসাইন (রাঃ) এর এ মস্তক মুবারকটি আমার কাছে আমানত রাখ এবং এ সব পুঁত পবিত্র মহিলাগণের খেদমত করার সুযোগ দাও। ওরা বলল, তা কিছুতেই হতে পারে না। সরকারের গুরুদায়িত্ব আমাদের কাঁধে অর্পণ করা হয়েছে, এ মস্তক আমরা কারো হাতে দিতে পারি না। মস্তক ও এদেরকে ইয়াজিদের কাছে পৌঁছাতে হবে। পাদ্রী বলল, ঠিক আছে পৌঁছাবে, কিন্তু এ রাতেতো আর পৌঁছাতে পারবে না। ওরা বলল, আমরা এখানে রাত অতিবাহিত করতে রাজী আছি। কিন্তু মস্তক দিতে রাজী নই। পাদ্রী বলল, আমার থেকে টাকা নিয়ে হলেও এক রাত্রে জন্যে মস্তকটি আমার হেফাজতে দাও এবং আমি ওয়াদা করছি, তোমাদের মস্তক ফিরিয়ে দেব। ওরা বলল, আমাদেরকে কত টাকা দিবেন? পাদ্রী বলল, আমার কাছে আমার সারা জীবনের উপার্জিত আশি হাজার দেরহাম জমা রয়েছে। আমি সব তোমাদেরকে দিয়ে দিব। তোমরা শুধু এক রাত্রে জন্যে মস্তকটি দাও। ওরা চিন্তা করল, ইয়াজিদ থেকে তো বখশিশ পাবই, আর এদিকে মফত আশি হাজার দিরহাম হাতছাড়া করব কেন? শেষ পর্যন্ত তারা রাজী হয়ে গেল এবং এক রাত্রে জন্যে মস্তক দিয়ে দিল।

পাদ্রী গীর্জার এক পরিষ্কার-পরিচ্ছন্ন কামরা ভদ্র মহিলাদের বিশ্রামের জন্যে দিয়ে দিল এবং ওনাদের খেদমত করার জন্যে কয়েকজন খাদেম নিয়োজিত করল। আর ওদেরকে বলে দিল যেন ওনাদের কোন কষ্ট না হয়। আহলে বায়তের মহিলাগণ পাদ্রীকে জিজ্ঞাসা করলেন, পাদ্রী সাহেব! আমাদের আগমণের খবর আপনি কেমন করে জানতে পারলেন? পাদ্রী বলল, আমি ভিতরে বসা ছিলাম, তখন আপনাদের কাফেলা বেশ কিছু দূরে ছিল, আমি হঠাৎ শুনলাম, আমার গীর্জার বড় দেয়ালটা কাঁদছে। আমি আমার জীবনে এ রকম কান্না আরও কয়েকবার শুনেছি। কান্না শুন্য

পর আমি বুঝতে পারলাম, কোন একটা অঘটন ঘটেছে। তখন আমি বের হলাম, কি ঘটনা ঘটল তা দেখার জন্য। আপনাদের কাফেলা দেখে এবং সমস্ত ঘটনা শুনে বুঝতে পারলাম, আপনাদের প্রতি অমানুষিক জুলুম করা হয়েছে। নবী মুস্তাফা (সাল্লাল্লাহু তাআলা আলাইহে ওয়াআলিহি ওয়াসাল্লাম) এর দৌহিত্রকে নিদারুণ অত্যাচারের সাথে শহীদ করা হয়েছে। এ জন্যই বড় দেয়ালটা কাঁদছিল।

অতঃপর পাদ্রী তাঁদেরকে ধৈর্য ধারণের পরামর্শ দিলেন এবং বললেন আল্লাহর নেক বান্দাগণের প্রতি এ রকম মসিবত আগেও এসেছে, বর্তমানেও আসছে এবং ভবিষ্যতেও আসবে। আপনাদেরকে ধৈর্য ও সহনশীলতার পরাকাষ্ঠা দেখাতে হবে। আল্লাহ তাআলা আপনাদের নাম কিয়ামত পর্যন্ত চির জাগরুক রাখবে।

এরপর পাদ্রী ইয়াজিদ বাহিনীকে আশি হাজার দেরহাম দিয়ে হযরত ইমাম হুসাইন (রাঃ) এর মস্তক মুবারক নিয়ে নিলেন। মস্তক মুবারক নিয়ে তিনি তাদের উপাসনাগারে চলে গেলেন। চেহারা মুবারকে যে সব রক্তের দাগ ছিল, তিনি সব পরিষ্কার করলেন এবং নিজের কাছে যা সুগন্ধী ছিল সব হযরত ইমাম হুসাইন (রাঃ) এর চুল ও দাড়ী মুবারকে ঢেলে দিলেন এবং একটি রেশমী কাপড়ে জড়িয়ে উঁচু জায়গায় রাখলেন আর সারারাত তিনি দাঁড়িয়ে রইলেন ও কান্নাকাটি করলেন। তিনি হযরত ইমাম হুসাইন (রাঃ) এর মস্তক মুবারকের যত্ন নিলেন এবং সম্মান করলেন। ফলে, আল্লাহর রহমতের শান দেখুন, সকাল বেলা ওনার মুখ থেকে কলেমা তৈয়্যাবা জারী হয়ে গেল। মস্তক মুবারকের তাজিম করার ফলে আল্লাহ তাআলা ওনাকে ঈমানী দৌলত দ্বারা পরিতুষ্ট করলেন এবং তিনি মুসলমান হয়ে গেলেন। তিনি দুনিয়াবী দৌলত ত্যাগ করলেন, আল্লাহ তাআলা তাকে ঈমানী দৌলত দান করলেন। তিনি অস্থায়ী দৌলত (আশি হাজার দেরহাম) প্রদান করলেন, আল্লাহ তাআলা এর বিনিময়ে তাঁকে স্থায়ী দৌলত (ঈমান) দান করলেন।

সকালে ইয়াজিদী বাহিনী মস্তক সমূহ ও শহীদ পরিবারের অবশিষ্ট সদস্যদেরকে নিয়ে পুনরায় যাত্রা দিল। কিছুদূর যাওয়ার পর ইয়াজিদী বাহিনী পরস্পর পরামর্শ করে পাদ্রী প্রদত্ত আশি হাজার দেরহাম তাদের মধ্যে বন্টন করে নেয়ার সিদ্ধান্ত নিল। কারণ, ইয়াজিদ জানতে পারলে সব দেরহাম নিয়ে নিতে পারে। সিদ্ধান্ত মোতাবেক বন্টন করার জন্য যেই মাত্র দেরহামের পুটলি খুললো, তখন দেখতে পেল সব মাটির পাত্রের ভাঙ্গা টুকরা এবং প্রতিটি টুকরার দুই পিঠে পবিত্র কুরআনের আয়াত

লিখা। এক পিঠে লিখা ছিল-

وَسَيُعْلَمُ الَّذِينَ ظَلَمُوا أَيُّ مُنْقَلَبٍ يَنْقَلِبُونَ

অর্থাৎ জুলুমকারী অতি সহসা জানতে পারবে, সে কোন দিক হয়ে বসে আছে। অপর পিঠে লিখা ছিল-

وَلَا تَحْسَبَنَّ اللَّهَ غَافِلًا عَمَّا يَعْمَلُ الظَّالِمُونَ-

অর্থাৎ আল্লাহ তাআলাকে জালিমের কাজ কর্মের প্রতি উদাসীন মনে করো না। জালিমরা যা কিছু করছে, আল্লাহ তাআলা সব জানেন। এ ব্যাপারে আল্লাহকে অজ্ঞ মনে করো না। দেখুন, আশি হাজার দেরহাম ওরা নিয়েছিল কিন্তু তা মাটির পাত্রের ভাঙ্গা টুকরা হয়ে গেল- خَسِرَ الدُّنْيَا وَالْآخِرَةَ তারাতো দীনের পরিবর্তে দুনিয়াকে অগ্রাধিকার দিয়েছিল, সেটাতেও বিফল হল। কিন্তু যারা দুনিয়াকে অবজ্ঞা করে দীনকে আঁকড়ে ধরে, দুনিয়াবাসী ওদের পিছনে ঝুঁকে পড়ে, সম্পদ ওদের পদতলে গড়াগড়ি খায়।

ইয়াজিদের দরবারে শহীদ পরিবার ও ইয়াজিদের ভন্ডামী

যাক, আশি হাজার দেরহামের অনুশোচনা করতে করতে তারা দামেস্কে পৌঁছল এবং ইয়াজিদের দরবারে গিয়ে সমস্ত ঘটনার বিবরণ দিল। ইয়াজিদ সমস্ত ঘটনা শুনে, বলল, ইবনে জিয়াদ খুবই বাড়াবাড়ি করেছে। আমি ওকে এতটুকু করতে বলিনি। এমনকি অনেক কিতাবে লিখা হয়েছে যে, ইয়াজিদ ইবনে জিয়াদের প্রতি লানত দিয়েছিল। অর্থাৎ সে বলেছিল, 'আল্লাহ ইবনে জিয়াদের উপর লানত করুক, আল্লাহ হুসাইন (রাঃ) এর প্রতি রহম করুক। ইবনে জিয়াদ খুবই অত্যাচার করেছে, আমার উদ্দেশ্য তা ছিল না। আমার উদ্দেশ্য ছিল ওনাকে (রাঃ) যেন নজরবন্দী করা হয়, যাতে লোকেরা আমার বিরুদ্ধে বিদ্রোহ না করে।' কিন্তু এ ধরনের কথা ইয়াজিদকে রক্ষা করতে পারে না, এ ধরনের কথার দ্বারা ইয়াজিদ রেহাই পেতে পারে না। যা কিছু হয়েছে ইয়াজিদের ইঙ্গিতেই হয়েছে। ইয়াজিদ ইবনে জিয়াদকে সর্বময় ক্ষমতা প্রদান করেছিল যেন সে যা প্রয়োজন হয়, তা করে, যাতে ওর বিরুদ্ধে গড়ে ওঠা বিদ্রোহ দমন হয়ে যায়। সে এ ধরনের দরদমাখা কথা এ জন্যে বলেছিল, যাতে লোক ওর বিরুদ্ধে চলে না যায় এবং লোকেরা যেন মনে

করে- সে এ ধরনের আচরণ করার পক্ষপাতি ছিল না। এ সব কথার দ্বারা অনেক লোক ইয়াজিদকে ভাল মানুষ বলে আখ্যায়িত করেছিল এবং তাদের বিভিন্ন কিতাবে লিখেছে যে, ইয়াজিদ এ শাহাদাতে রাজি ছিল না। সুতরাং ইয়াজিদ নয়, ইবনে জিয়াদই এ ঘটনার জন্য দায়ী ছিল।

ইয়াজিদই মূলত: দায়ী

আহলে সুন্নাত ওয়াল জামাতের নির্ভরযোগ্য কিতাব 'কিতাবুল আকায়েদ' এ লিখা হয়েছে, 'ইয়াজিদের উপর, ইবনে জিয়াদের উপর ও আহলে বায়তের সদস্যদের হত্যাকারীদের উপর লানত বর্ষিত হোক'। যদি ইয়াজিদ নিষ্পাপ হত, তা হলে ইমাম নসফী তাঁর কিতাবুল আকায়েদে এ ধরনের কথা কক্ষনো লিখতেন না। আর ইয়াজিদের পরবর্তী আচরণে তার আসল রূপ ধরা পড়ে। এত কিছু বলার পরও সে মস্তুকগুলোকে রাতে রাষ্ট্রীয় ভবনের শাহী দরজায় টাঙ্গানোর জন্য এবং দিনে দামেক্কের অলি-গলিতে ঘুরানোর নির্দেশ দিয়েছিল। নির্দেশমত মস্তুকসমূহ দামেক্কের অলি-গলিতে ঘুরানো হয়েছিল। হুযুর (সাল্লাল্লাহু তাআলা আলাইহে ওয়াআলিহি ওয়াসাল্লাম) এর বিশিষ্ট তাবেঈ হযরত মিনহাল বিন আমর ফরমায়েছেন, খোদার কসম, 'আমি স্বচক্ষে দেখেছি যে, যখন হযরত ইমাম হুসাইন (রাঃ) এর মস্তুক মূবারক বর্ষার অগ্রভাগে উঠিয়ে দামেক্কের গলিতে এবং বাজারসমূহে ঘুরানো হচ্ছিল, তখন মিছিলের আগে আগে এক ব্যক্তি কুরআন শরীফের সূরা কাহাফ তিলওয়াত করছিল। যখন সে-

أَمْ حَسِبْتُمْ أَنَّ أَصْحَابَ الْكَهْفِ وَالرَّقِيمِ كَانُوا مِنْ آيَاتِنَا عَجَبًا

(নিশ্চয় আসহাবে কাহাফ ও রকিম আমার নিদর্শন সমূহের মধ্যে এক আজব নিদর্শন ছিল।) পড়ছিল, তখন হযরত ইমাম হুসাইন (রাঃ) এর বিচ্ছিন্ন মস্তুক মূবারক থেকে আওয়াজ বের হলো-

أَعْجَبُ مِنْ أَصْحَابِ الْكَهْفِ قَتْلِي وَحَمَلِي

অর্থাৎ আসহাবে কাহাফের ঘটনা থেকে আমার হত্যা এবং আমার মস্তুক নিয়ে ঘুরাফেরা আরও অধিক আশ্চর্যজনক। আল্লাহ তাআলা ফরমান, যারা শহীদ হয়েছে,

তাদেরকে মৃত বলনা। হযরত ইমাম হুসাইন (রাঃ) এর বিচ্ছিন্ন মস্তক মুবারক তা প্রমাণ করে গেল।

শহীদ পরিবারের মদীনা প্রত্যাবর্তন

ইয়াজিদ নোমান বিন বশীরকে তলব করল, যিনি একজন বিশিষ্ট তাবেঈ ছিলেন। ওনাকে ডেকে বলল, আপনার সাথে আরও ত্রিশজন লোক নিয়ে শহীদ পরিবারের অবশিষ্ট সদস্যদেরকে বাহন যোগে মদীনায় পৌঁছিয়ে দিয়ে আসুন। হযরত নোমান বিন বশীর' এ প্রস্তাবকে সানন্দে গ্রহণ করলেন এবং নিজের জন্য সৌভাগ্যের বিষয় মনে করলেন। অতঃপর ত্রিশজন সহকর্মীসহ হুসাইন (রাঃ) এর পরিবারের সদস্যদের নিয়ে মদীনার উদ্দেশ্যে রওয়ানা হলেন। হযরত সৈয়দা জয়নাব (রাঃ) নোমান বিন বশীরকে বললেন, আমাদেরকে কারবালার পথ দিয়ে নিয়ে যান। আমরা দেখে যেতে চাই, আমাদের শহীদদের লাশ কি সেই ভাবে পড়ে আছে, না কি কেউ দাফন করেছে। যদি দাফন বিহীন অবস্থায় পড়ে থাকে, প্রথমে আমরা ওদেরকে দাফন করব, এরপর ওখান থেকে রওয়ানা হব। আর যদি কেউ দাফন করে থাকে, তাহলে তা দেখে অন্ততঃ কিছুটা সান্ত্বনা পাব। হযরত নোমান বিন বশীর হযরত সৈয়দা জয়নাব (রাঃ) এর কথার প্রতি সম্মতি জ্ঞাপন করলেন এবং 'কারবালার' পথ ধরলেন। 'কারবালায়' গিয়ে সেই প্রান্তর যখন দেখলেন, যেই প্রান্তরে তাঁদের আপনজনদেরকে নির্মমভাবে শহীদ করা হয়েছিল, হঠাৎ তিনি (রাঃ) অপ্রত্যাশিতভাবে চিৎকার দিয়ে উঠলেন এবং অবোরে কাঁদতে শুরু করলেন এবং কাঁদতে কাঁদতে বলছিলেন এখানে আলী আসগরের লাশ পড়ে রয়েছেছিল, ওখানে আলী আকবরের লাশ পড়েছিল, এখানে আমার ভাই হুসাইনের লাশ পড়ে ছিল। তিনি এ ভাবে যখন হাতের আঙ্গুল দ্বারা দেখিয়ে দেখিয়ে লাশ ওদের অবস্থানের কথা বলছিলেন, তখন সবাইর মুখ থেকে ক্রন্দনের কক্ষণ সুরা বের হচ্ছিল। 'কারবালার' নিকটবর্তী একটি গ্রাম ছিল, যার নাম ছিল 'আমরিয়া'। এই গ্রামের লোকেরা ইয়াজিদ বাহিনী চলে যাওয়ার পর এসে শহীদদের লাশ সমুদ্র দাফন করেছিল। মদীনা শরীফ থেকেও একটি দল হযরত জাবের বিন আবদুল্লাহের নেতৃত্বে কারবালায় এসে পৌঁছে ছিল।

এই কাফেলা যখন কারবালার প্রান্তরে পৌঁছেছিল, সেই সময় মদীনা থেকে আগত দল ও 'আমরিয়া' গ্রামের অধিবাসীরা উপস্থিত ছিল এবং এ মজলুম কাফেলাকে দেখে আর এক হৃদয় বিদারক দৃশ্যের অবতারণা হয়েছিল। ঘটনাক্রমে সে দিন ছিল ২০শে সফর অর্থাৎ শহীদদের 'চেহলামের' দিন। কাফেলা সেই রাত

সেখানেই অতিবাহিত করেন। সারা রাত তাঁরা কুরআন শরীফ তেলওয়াত করেন, দুআ দরুদ পাঠ করেন এবং খাবারের জন্য খিচুড়ি পাকান। আজকাল সুন্নি মুসলমানদের ঘরে মোহররম মাসে যেই খিচুড়ি পাকানো হয় সেটা তাঁদের স্মৃতিচারণ। এক দিন এক রাত সেখানে অবস্থানের পর তাঁরা মদীনার পথে যাত্রা দিলেন।

কাফেলা যখন মদীনা মনোয়ারার সন্নিহিত পৌছল এবং চোখের সামনে মদীনা শরীফের দৃশ্য দেখা যাচ্ছিল, তখন সবাইর চোখ আবার অশ্রু সজল হয়ে উঠল। এ দিকে তাঁদের আগমনের খবর বিদ্যুৎ গতিতে সমগ্র মদীনায় ছড়িয়ে পড়ল। সেই সময় হযরত ইমাম হুসাইন (রাঃ) এর বড় মেয়ে হযরত ফাতেমা (রাঃ) মদীনায় ছিলেন, যার সাথে হযরত ইমাম হাসান (রাঃ) এর বড় ছেলের বিয়ে হয়েছিল। হযরত হুসাইন (রাঃ) এর ভাই হযরত মুহাম্মদ বিন হানাফিয়া (রাঃ) মদীনায় ছিলেন, হযরত মুসলিম বিন আকিল (রাঃ) এর মেয়ে ও বোনেরাও তখন মদীনায় ছিলেন। হুযুর (সাল্লাল্লাহু তাআলা আলাইহে ওয়াআলিহি ওয়াসাল্লাম) এর বিধি উম্মুল মুমেনিন হযরত উম্মে সালমা (রাঃ)ও মদীনায় ছিলেন। ওনারা সবাই এবং মদীনার প্রতিটি ঘরের আবাল-বৃদ্ধ-বণিতা মজলুম কাফেলাকে এক নজর দেখার জন্য ঘর থেকে বের হয়ে আসলেন। হযরত ইমাম হুসাইন (রাঃ) এর মেয়ে ফাতেমা (রাঃ) যখন মজলুম কাফেলাকে এগুতে দেখলেন, তখন সে একান্ত সবর ও ধৈর্যশীলা হওয়া সত্ত্বেও অজান্তে হু হু করে কেঁদে উঠলেন এবং হযরত জয়নাব (রাঃ) কে জড়িয়ে ধরে বলতে লাগলেন, ফুফি! আমার আব্বাজানকে কোথায় রেখে এসেছ? আমার ভাই আলী আসগর ও আলী আকবর কোথায়? আমার চাচাত ভাই কাসেমকে কোথায় ফেলে এসেছ? আমার আব্বাস চাচ্চু কোথায়? আমাদের ভরপুর ঘর কোথায় লুণ্ঠিত হল? হযরত ফাতেমাতুয যুহরা (রাঃ) এর সুশোভিত বাগানকে ছিন্ন ভিন্ন কারা করল? এ ভাবে একে অপরকে জড়িয়ে ধরে কান্নাকাটি করতে লাগলেন এবং এমন এক হৃদয় বিদারক দৃশ্যের অবতারণা হয়েছিল, তখন চারিদিকে শুধু কান্না আর কান্নার রোল শুনা যাচ্ছিল। মহিলাদের এমন অবস্থা হয়েছিল যে একে অপরকে জড়িয়ে ধরে কাঁদতে কাঁদতে অনেকে বেহুস হয়ে গিয়েছিল। লোকেরা অনেক বুঝিয়ে-সুঝিয়ে সবর ও ধৈর্যের পরামর্শ দিয়ে কাফেলাকে মদীনা শরীফে নিয়ে আসলেন।

রওজা পাকে ইমাম জয়নুল আবেদীন (রাঃ) এর হাজেরী

মজলুম কাফেলার একমাত্র জীবিত পুরুষ সদস্য হযরত ইমাম জয়নুল আবেদীন (রাঃ) শোকে পাথর হয়ে এক কিনারে দাঁড়িয়েছিলেন। সবাই যখন তাঁকে ঘরে যাওয়ার জন্য জোর করলেন, তিনি বললেন, আমার আব্বাজান ওসীয়ত করেছেন, মদীনা শরীফ পৌঁছে যেন সবার আগে তাঁর নানা জান (সাল্লাল্লাহু তাআলা আলাইহে ওয়াআলিহি ওয়াসাল্লাম) এর রওজা পাকে হাজিরা দিই। তাই আমি রওজা পাকে যাওয়ার আগে কোথাও যাবনা। অতঃপর তিনি (রাঃ) রওজা পাকে পৌঁছলেন। হযরত জয়নুল আবেদীন (রাঃ) যিনি এতক্ষণ সবার ও ধৈর্যের পরাকাষ্ঠা দেখিয়ে নিশ্চুপ ছিলেন, কিন্তু রওজা পাকের সামনে গিয়ে কান্নায় ভেঙ্গে পড়লেন। শুধু এতটুকু বলতে পেরেছিলেন, 'ইয়া রসুল্লাহ (সাল্লাল্লাহু তাআলা আলাইহে ওয়াআলিহি ওয়াসাল্লাম) আপনার দৌহিত্র হুসাইন (রাঃ) এর সালাম গ্রহণ করুন'। এরপর তাঁর ধৈর্যের বাঁধ ছুটে গেল এবং অঝোরে কাঁদতে কাঁদতে তার চোখের দেখা কারবালার সমস্ত ঘটনা বর্ণনা করতে লাগলেন। আর তাঁর কাঁদার সাথে সাথে মদীনা শরীফের সমস্ত দেয়াল থেকে কান্নার রোল বের হলো এবং রওজা মুবারকও থরথর করে কাঁপতে লাগলো এবং এর থেকে আওয়াজ বের হলো, 'জয়নুল আবেদীন! তুমি আমাকে কী শুনাচ্ছ? আমি তো সব কিছু স্বচক্ষে দেখেছি।

মদীনাবাসীরা হযরত ইমাম জয়নুল আবেদীন (রাঃ) কে ধৈর্য ধারণের পরামর্শ দিয়ে বললেন, আল্লাহর যা হুকুম ছিল, তা হয়েছে। হযুর (সাল্লাল্লাহু তাআলা আলাইহে ওয়াআলিহি ওয়াসাল্লাম) এর সম্মানিতা বিবি হযরত উম্মে সালমা (রাঃ) ফরমান, মদীনা শরীফে একবার সেই দিনেই কিয়ামত প্রতিষ্ঠিত হয়েছিল, যেই দিন হযুর (সাল্লাল্লাহু তাআলা আলাইহে ওয়াআলিহি ওয়াসাল্লাম) আল্লাহর সান্নিধ্যে গমন করেন, আর একদিন কিয়ামত কায়েম হল, যে দিন হযরত ইমাম জয়নুল আবেদীন (রাঃ) কারবালা থেকে ফিরে এল। হযরত উম্মে সালমা (রাঃ) আরও বলেন, হযুর (সাল্লাল্লাহু তাআলা আলাইহে ওয়াআলিহি ওয়াসাল্লাম) এর ওফাতের দিন অদৃশ্য থেকে যে ভাবে ক্রন্দনের আওয়াজ শুনা গিয়েছিল, সে ভাবে হযরত ইমাম হুসাইন (রাঃ) এর শাহাদাতের সময় একই ভাবে অদৃশ্য থেকে কান্নার আওয়াজ শুনা গিয়েছিল।

যা হোক, রওজা পাকে হাজিরা দিয়ে সমস্ত ঘটনা বর্ণনা করার পর তিনি ঘরে

গেলেন এবং একান্ত সবার ও ধৈর্য সহকারে মদীনা শরীফে অবস্থান করতে লাগলেন। হযরত ইমাম জয়নুল আবেদীন (রাঃ) এর এমন অবস্থা হয়েছিল যে, যখন তিনি পানি দেখতেন সীমাহীন কান্নাকাটি করতেন এবং বলতেন এই সেই পানি, যা আলী আসগরের ভাগ্যে জোটেনি, আলী আকবরের ভাগ্যে জোটেনি, আহলে বায়তের সদস্যদের জন্য বন্ধ করে দেয়া হয়েছিল। তাঁর সামনে খাবার আনা হলে দু'এক গ্রাস মুখে দিয়ে বাদ-বাকীগুলো সামনে থেকে নিয়ে যেতে বলতেন। সব সময় একাকী থাকতে পছন্দ করতেন। সাধারণ লোকদের সাথে মেলা-মেশা করতেন না এবং যতদিন পর্যন্ত জীবিত ছিলেন, কোন দিন হাসেননি। ওনার ছেলে, ইমাম মুহাম্মদ বাকের (রাঃ) একদিন ওনাকে জিজ্ঞাসা করলেন, আব্বাজান! কী ব্যাপার? আমি আপনাকে কোন দিন হাসতে দেখিনি। তিনি ফরমালেন, বেটা! আমার চোখের সামনে কারবালার যে দৃশ্য ফুটে রয়েছে, তা দেখলে তোমার মুখ থেকেও চিরদিনের জন্য হাসি বন্ধ হয়ে যেত। তুমিও সারা জীবন কোন দিন হাসতে না। বেটা! আমি পুঁত-পবিত্র শরীরকে মাটিতে গড়াগড়ি খেতে দেখেছি, প্রিয় নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর প্রতিচ্ছবিকে দাফন-কাফন বিহীন অবস্থায় কারবালার প্রান্তরে পড়ে থাকতে দেখেছি। আমি নবী করিম (সাল্লাল্লাহু তাআলা আলাইহে ওয়াআলিহি ওয়াসাল্লাম) এর প্রিয় দৌহিত্রকে আঘাতে আঘাতে জর্জরিত হয়ে কারবালার তপ্ত বালি-রাশির উপর দাফন-কাফনহীন অবস্থায় পড়ে থাকতে দেখেছি। উলামায়ে কিরামগণ লিখেছেন, এই পৃথিবীতে পাঁচজন ব্যক্তি খুব বেশী কান্নাকাটি করেছেন, এরা হলেন, (এক) হযরত আদম (আঃ) জান্নাত থেকে বের হয়ে আসার পর খুবই কান্নাকাটি করেছেন। (দুই) হযরত ইয়াহিয়া (আঃ) আল্লাহর ভয়ে খুবই কেঁদেছিলেন, তিনি এত বেশী কান্নাকাটি করেছিলেন যে, তার দুগুড বেয়ে চোখের পানি পড়তে পড়তে চেহারায় দাগ পড়ে গিয়েছিল। (তিন) হযরত ইয়াকুব (আঃ) হযরত ইউসুফ (আঃ) এর বিচ্ছেদের কারণে খুবই কেঁদেছিলেন এবং অনেক চোখের পানি ফেলেছিলেন। (চার) হযরত সৈয়দা ফাতেমাতুয যুহরা (রাঃ) হযুর (সাল্লাল্লাহু তাআলা আলাইহে ওয়াআলিহি ওয়াসাল্লাম) এর ওফাতের পর খুবই কেঁদেছিলেন। (পাঁচ) হযরত জয়নুল আবেদীন (রাঃ) কারবালার ঘটনার পর অনেক কেঁদেছিলেন।

ইয়াজিদের বিরুদ্ধে বিদ্রোহের দাবানল

হঠাৎ এমন একটি লোমহর্ষক ঘটনা ঘটে যাওয়ায় এবং ইয়াজিদের জুলুম অত্যাচারে অতিষ্ঠ হয়ে চারিদিক থেকে বিদ্রোহের দাবানল দাউ দাউ করে জ্বলে উঠলো। বিশেষ করে মক্কা-মদীনার অধিবাসীগণ ইয়াজিদের প্রতি খুবই ক্ষ্যাপা ছিল এবং ইয়াজিদের বিরুদ্ধে সমালোচনামুখর ছিল। এই খবর ইয়াজিদের কানে পৌঁছলে সে কয়েকজন প্রতিনিধিকে মক্কা-মদীনায় পাঠালো এবং ওদেরকে বললো, মক্কা-মদীনাবাসীকে গিয়ে বুঝাও, যেন আমার বিরুদ্ধে সমালোচনা না করে, আর আমার প্রতি যেন অসন্তুষ্টি প্রকাশ না করে। মদীনাবাসীরা বললেন, সে জালিম, ফাসিক, অত্যাচারী, সে অমানবিক জুলুম করেছে। আমরা কি করে ওকে ঘৃণা না করে থাকতে পারি? এরপর মদীনাবাসীরাও একটি প্রতিনিধিদল দামেস্কে প্রেরণ করেছিলেন, ইয়াজিদের হাল-অবস্থা দেখার জন্য। ওনারা ফিরে এসে যা বিবরণ দিলেন, তা হলো “ইয়াজিদের আমলে যা হচ্ছে, ইতিপূর্বে আর কারো আমলে এরকম হয়নি। ইয়াজিদের রাজ্যে হারাম বলতে কিছু নেই। মদ, জুয়া, ঘুষ, দুর্নীতি, জেনা, ব্যভিচার, ভাইবোনের মধ্যে বিয়ে ইত্যাদি সব কিছু জায়েয। এ সবার বিরুদ্ধে ইয়াজিদের কোন উচ্চ বাচ্য নেই বরং প্রত্যক্ষ ও পরোক্ষভাবে উৎসাহ দিচ্ছে। ফলে ইয়াজিদের বিরুদ্ধে বিদ্রোহ আরো ব্যাপক আকার ধারণ করলো। মক্কা-মদীনাবাসীরা অহরহ ওর উপর খোদার লানত দিচ্ছিল এবং প্রকাশ্যভাবে ওর রাজত্বকে অবৈধ ঘোষণা করল।

ইয়াজিদ বাহিনীর মক্কা-মদীনা আক্রমণ

ইয়াজিদ একটি জল্লাদ বাহিনী মদীনা আক্রমণ করার জন্য পাঠাল এবং নির্দেশ দিল, ‘প্রথমে ওদেরকে বুঝাও, বুঝে আসলেতো ভালো, অন্যথায় তাদেরকে কঠোরভাবে দমন কর।’ নির্দেশমত ইয়াজিদের ‘জল্লাদ বাহিনী’ মদীনা শরীফ আক্রমণ করল। মদীনা শরীফের নওজোয়ানরা ওদেরকে প্রতিরোধ করার জন্য এগিয়ে আসলেন। কিন্তু ইতিপূর্বে জল্লাদ বাহিনীর আগমনের খবর পেয়ে অনেক লোক এদিক ওদিক সরে গিয়েছিল। তাই সবাইকে একত্রিত করার সুযোগ পেলেন না। তবুও ওনারা বীর বিক্রমে ইয়াজিদের জল্লাদ-বাহিনীকে রুখে দিয়ে ছিলেন। কিন্তু শেষ পর্যন্ত এ মুষ্টিমেয় যুবক ইয়াজিদের দুর্ধর্ষ জল্লাদ বাহিনীর হাতে শাহাদাত

বরণ করেন। এ যুবকগণ শহীদ হওয়ার পর ইয়াজিদ বাহিনী শহরে প্রবেশ করে পবিত্র মদীনা শরীফে এমন জঘন্য কাণ্ড-কীর্তন করেছিল, যা কল্পনা করলেও লোম শিউরে ওঠে। তারা দশ হাজার লোককে হত্যা করেছিল, মসজিদে নব্বীতে ঘোড়া বেঁধেছিল মোটকথা হযুর (সাল্লাল্লাহু তাআলা আলাইহে ওয়াআলিহি ওয়াসাল্লাম) এর ইজ্জতের প্রতি আদৌ ক্রক্ষেপ করেনি। বাচ্চাদের হত্যাকরে বর্ষার অগ্রভাগে নিয়ে ঘুরিয়েছিল। মদীনা শরীফে অবস্থানরত পবিত্র মহিলাদের ইজ্জত হরণ করেছিল।

বিশিষ্ট তাবেঈ হযরত সায়েদ বিন মসীয়ব (রাঃ) বর্ণনা করেন যে, মদীনা শরীফের কোন লোককে ওরা জীবিত ছাড়েনি। রাস্তা-ঘাটে, হাটে-বাজারে লাশ আর লাশ পড়ে ছিল। এমন কোন ঘর দেখা যায়নি, যে ঘর লুণ্ঠিত হয়নি। হযরত সায়েদ (রাঃ) আরও বলেন, আমি পাগলের ছদ্মবেশ ধারণ করে মসজিদে নব্বীতে প্রবেশ করেছিলাম। যখন ওরা চারিদিকে রক্তপাত করে মসজিদে নব্বীতে ঘোড়া বাঁধতে আসলো, আমাকে দেখে বলল, 'একেও ধর এবং মার। তখন আমি পাগলের মত আচরণ করতে লাগলাম। তা দেখে এদের সরদার বললো, ওকে ছেড়ে দাও, এ পাগল মনে হয়, হয়তো মসজিদে থাকে। অতঃপর আমাকে ছেড়ে দিয়ে ওরা চলে গেল। তিনি আরও বলেন, তিন দিন পর্যন্ত মসজিদে নব্বীতে কোন আযান, ইকামত ও কোন জামাত হয়নি। কিন্তু যখন আযানের সময় হতো, তখন যথারীতি আযানের শব্দ শোনা যেতো। আমি আশ্চর্য হয়ে যেতাম। কোন লোকজন নেই, এ আযানের ধ্বনি কোথেকে আসতো। শেষ পর্যন্ত আযানের ধ্বনির রেশ ধরে অগ্রসর হয়ে দেখলাম স্বয়ং রওজা পাক থেকে আযানের ধ্বনি ভেসে আসছে। এ ভাবে আমি তিন দিন সেই আযানের ধ্বনি শুনে পনের ওয়াক্ত নামায আদায় করি। প্রতিদিন পাঁচ ওয়াক্ত রওজা পাক থেকে আযান, ইকামত ও জামাতের আওয়াজ আসতো।

তিন দিন পর ইয়াজিদ বাহিনী যখন মদীনা-মনোয়ারা থেকে চলে গেল, তখন চারিদিক থেকে লোক ফিরে আসেন এবং এসে লাশ সমূহ দাফন করেন। এরপর তাঁরা পুনরায় মদীনা-মনোয়ারাতে বসবাস করতে লাগলেন। ইয়াজিদী বাহিনী মদীনা শরীফে যা করেছে এর পরিণাম সম্পর্কে আমাদের প্রিয় নবী (সাল্লাল্লাহু তাআলা আলাইহে ওয়াআলিহি ওয়াসাল্লাম) কি বলেছেন, তা শুনুন— “যে মদীনাবাসীকে অত্যাচার করে, ভয় দেখায়, আল্লাহু তাআলা ওকে ভীতু করবেন। ওর প্রতি আল্লাহ, ফেরেস্টাগণ ও সমস্ত মানুষগণের লানত”। এ বার অনুমান করুন, যারা

মদীনাবাসীকে ভয় দেখায়, ওদের প্রতি আল্লাহর লানত পতিত হয়, কিন্তু যারা হত্যাযজ্ঞ চালিয়েছে, তাদের কি পরিণতি হবে?

ইয়াজিদী বাহিনী মদীনা শরীফে ধ্বংসযজ্ঞ চালানোর পর মক্কা শরীফের দিকে ধাবিত হল। সেই সময় মক্কার সমস্ত লোকেরা হযরত আবদুল্লাহ বিন জোবাইয়ের (রাঃ) এর সাথে ছিল। তা ছাড়া সে সময় অনেক সাহাবীও সেখানে ছিলেন। তারা সবাই ইয়াজিদী বাহিনীকে প্রতিরোধ করার জন্য পূর্ণ প্রস্তুতি নিয়েছিলেন। কারণ ইতিপূর্বে তাদের কাছে মদীনা শরীফের খবর পৌঁছেছিল। যখন ইয়াজিদী বাহিনী মক্কা গিয়ে আক্রমণ করল, হযরত আবদুল্লাহ বিন জোবাইর তাঁর সমর্থকদের নিয়ে পাল্টা আক্রমণ চালালেন। ফলে, ইয়াজিদী বাহিনী সেখানে কৃতকার্য হতে পারল না। তবে, মক্কা শরীফকে ঘিরে ফেলল। সে সময় হযরত আবদুল্লাহ বিন জোবাইর তাঁর সকল সমর্থকসহ হেরেম শরীফের অভ্যন্তরে ছিলেন। ইয়াজিদী বাহিনী দূর থেকে পাথর নিক্ষেপণ হাতিয়ার দ্বারা এমনভাবে পাথর নিক্ষেপ করেছিল যে, পবিত্র কাবা শরীফের আঙ্গিনা পাথরে ভরে গিয়েছিল। মানুষ যেখানে তওয়াফ করতো সেখানেও পাথরের স্তুপ পড়ে গিয়েছিল।

যে সব পাথর খুব জোরে এসে দেয়ালের সাথে লেগেছিল, এর থেকে আগুনের উৎপত্তি হয়ে কাবা শরীফের গিলাফ জ্বলে গিয়েছিল। তখন বায়তুল্লাহ শরীফের ছাদ কাঠের ছিল, সেখানেও আগুন লেগে যায়। সেই ছাদের উপর সেই দুব্বার শিং তাবরুক হিসেবে হিফাজত করে রাখা হয়েছিল, যেটা হযরত ইসমাইল (আঃ) এর কুরবানীর পরিবর্তে বেহেস্ত থেকে অবতীর্ণ হয়েছিল, সেটাও জ্বলে গিয়েছিল।

ইয়াজিদের উপর খোদার লানত

আল্লাহর কুদরাত দেখুন, যে দিন কাবা শরীফে আগুন লেগেছিল, সে দিন ইয়াজিদ এক মারাত্মক রোগে আক্রান্ত হয়ে দামেস্কে মারা যায়। ইয়াজিদের সৈন্য বাহিনীরা ওর মৃত্যুর খবর শুনে হতাশ হয়ে পড়ে। কিন্তু হযরত আবদুল্লাহ বিন জোবাইর ও তাঁর সাথীদের মধ্যে নূতন উদ্দীপনা সৃষ্টি হয় এবং তাঁরা বীরদর্পে ইয়াজিদী বাহিনীর উপর আক্রমণ করে বসেন এবং অনেক ইয়াজিদী সেনাকে খতম করেন। অবশিষ্ট সৈন্যরা যে যে দিকে পারলো পালিয়ে গেল এবং মক্কাবাসী ওদের অত্যাচার থেকে রক্ষা পেল। ইয়াজিদী বাহিনী চলে যাওয়ার পর মক্কা মদীনার

অধিবাসীগণ হযরত আবদুল্লাহ বিন জোবাইরের হাতে বায়াত করলেন।

ঐদিকে দামেস্কে ইয়াজিদের মৃত্যুর পর তার ছেলে 'মাবিয়া আসগরের হাতে লোকেরা বায়াত হওয়ার ইচ্ছা পোষণ করল। এ ছেলে খুবই নরম মেজাজ ও পরহেজগার ছিল। সে লোকদের ইচ্ছের প্রত্যুত্তরে বলল, আমি রাজত্ব পরিচালনা করতে সম্পূর্ণ অনুপযুক্ত। আমার বাপও অনুপযুক্ত ছিল। সত্যিকার খলিফা হওয়ার হকদার ছিল হযরত ইমাম হুসাইন (রাঃ)। কিন্তু আমার পিতা, হযরত ইমাম হুসাইন (রাঃ) এর হক আত্মসাত করেছে এবং জুলুম করে তাঁকে (রাঃ) হত্যা করেছে। আমি আমার আক্বার পরিণতি সম্পর্কে খুবই উদ্ভিগ্ন। তাই আপনারা আমার হাতে বায়াত করার ইচ্ছা পোষণ করলেও আমি তাতে রাজি নই। আপনারা হযরত ইমাম জয়নুল আবেদীন (রাঃ) এর হাতে বায়াত করুন। এরপর সে অসুস্থ হয়ে পড়ে এবং চল্লিশ দিন পর ইন্তিকাল করে। আল্লাহ তাআলা নেককারের ঘরে বদকার, বদকারের ঘরে নেককার সৃষ্টি করেন।

যখন ইয়াজিদের ছেলেও মারা গেল, তখন দামেস্ক ও সিরিয়ার অবস্থা এমন শোচনীয় হয়ে পড়েছিল যে, শেষ পর্যন্ত 'মারোয়ান' নিজেকে আমীর ঘোষণা করল। ঐ দিকে কুফার গভর্নর ইবনে জিয়াদও কুফা থেকে পালিয়ে ওর সাথে হাত মিলালো। লোকেরা বাধ্য হয়ে ওকে আমীর মেনে নিল এবং ইবনে জিয়াদ ওর প্রধানমন্ত্রী হয়ে গেল। আর ঐ দিকে মক্কা-মদীনায় আবদুল্লাহ বিন জোবাইরের হুকুমত কায়েম রইল। তবে সমগ্র আরব দেশে একটা মারাত্মক বিশৃঙ্খলা সৃষ্টি হয়ে গেল।

ইয়াজিদ বাহিনীর যমদূত মুখতার সক্ষীর আবির্ভাব

মরোয়ান ক্ষমতা দখল করে বিশেষ সুবিধা করতে পারলো না। চারিদিক থেকে বিদ্রোহের আগুন দাউ দাউ করে জ্বলে উঠলো। কুফার মধ্যে বিদ্রোহটা চরম আকার ধারণ করলো। কারণ, কুফাবাসীরা হযরত ইমাম হুসাইন (রাঃ) কে অগণিত চিঠি লিখে কুফায় আসার আহ্বান জানিয়েছিল এবং জান মাল দিয়ে সার্বিক সাহায্যের নিশ্চয়তা দিয়েছিল। কিন্তু পরে বিশ্বাসঘাতকতা করেছিল, যার ফলে সেই হৃদয়বিদারক ঘটনা ঘটে গেল। এই বিশ্বাসঘাতকতার জন্য অধিকাংশ কুফাবাসী খুবই অনুতপ্ত ছিল এবং তারা এই কলঙ্কে কি ভাবে মুছা যায়, কি ভাবে এর প্রায়শ্চিত্ত করা যায়, সেই চিন্তায় মগ্ন ছিল। ধূরন্ধর 'মুখতার বিন ওবায়দা সক্ষী'

কুফাবাসীর মনোভাব উপলব্ধি করে হযরত ইমাম হুসাইন (রাঃ) এর রক্তের বদলা নেয়ার শ্লোগান তুললো, সবাইকে তাঁর সাথে যোগ দেয়ার জন্য আহ্বান জানাল এবং সে দীপ্ত কণ্ঠে ঘোষণা করল, 'আমি হযরত ইমাম হুসাইন (রাঃ) এর হত্যাকারীদের একজনকেও দুনিয়াতে বেঁচে থাকতে দেবনা। আমি যদি এরকম না করি, আমার উপর খোদার লানত হোক'। তাঁর এ ধরনের জ্বালাময়ী বক্তৃতা শুনে কুফার অধিকাংশ লোক তার দলে ভিড়ে গেল এবং কুফার সর্বময় কর্তৃত্ব তার হাতে এসে গেল। এরপর সে প্রতিশোধ নিতে শুরু করলো।

যথার্থ প্রতিশোধ

মুখতার সক্ষী সর্ব প্রথম ঐ সব জালিমদের একটা তালিকা প্রণয়ন করল, যারা কারবালার লোমহর্ষক ঘটনা সংঘটিত করেছিল। এরপর এক এক জনের প্রতিশোধ নিতে শুরু করল।

আমর বিন সা'আদ ও তার ছেলে

সর্বপ্রথম সেই পাপিষ্ঠ আমর বিন সা'আদ কে তলব করলো, যে ইয়াজিদী বর্বর বাহিনীর সেনাপতি ছিল এবং তারই পরিচালনায় কারবালার যুদ্ধটা সংঘটিত হয়েছিল। তার ছেলে এসে বললো, আমার পিতা এখন সবকিছু ত্যাগ করে ভাল মানুষ হয়ে গেছে এবং নিঃসঙ্গ জীবন যাপন করছে। কারও সংগে কোন সংস্রব নেই। ঘর থেকে বের হয় না। সক্ষী হুংকার দিয়ে বললো, কোন অজুহাত শুনতে চাইনা, আমি ওকে চাই'। অতঃপর ওকে ধরে এনে পিতাপুত্র উভয়ের মাথা কেটে মদীনা শরীফে হযরত মুহাম্মদ বিন হানফিয়া (রাঃ) এর কাছে পাঠিয়ে দিল।

হাওলা বিন ইয়াজিদ

হাওলা বিন ইয়াজিদ, যে হযরত ইমাম হুসাইন (রাঃ) এর পবিত্র মস্তক মুবারককে শরীর থেকে বিচ্ছিন্ন করে ফেলেছিল, ওকে ধরে এনে মুখতার সক্ষীর নির্দেশে হাত পা কেটে শূলে চড়ানো হলো। অতঃপর ওর লাশ জ্বালিয়ে দেয়া হয়েছিল। ওকে ধরার ব্যাপারে ওর স্ত্রী উল্লেখযোগ্য ভূমিকা পালন করেছিল। কারণ সে আহলে বায়তের অনুরক্ত ছিল। হাওলা হযরত হুসাইন (রাঃ) এর মস্তক নিয়ে ঘরে আসায় সে খুবই মর্মান্বিত হয়েছিল।

পাপিষ্ঠ সীমারের পরিণতি

মুখতার সকফী যখন হযরত হুসাইন (রাঃ) এর বিরুদ্ধে অস্ত্রধারী এক এক জনকে নির্মমভাবে হত্যা করছিল, তখন পাপিষ্ঠ সীমার কুফা থেকে পালিয়ে যেতে চেয়েছিল। কিন্তু শেষ পর্যন্ত এ পাপিষ্ঠ রক্ষা পায়নি। মুখতার সকফীর অনুসারীদের হাতে ধরা পড়েছিল। ওকে দু টুকরা করে মাথা মুখতার সকফীর কাছে পাঠিয়ে দিয়েছিল এবং লাশ কুকুরকে সোপর্দ করেছিল।

হাকিম বিন তোফায়েলের পরিণতি

হাকিম বিন তোফায়েল, যে হযরত আব্বাস (রাঃ) এর শরীর থেকে পোশাক খুলে নিয়েছিল এবং হযরত ইমাম হুসাইন (রাঃ) এর প্রতি তীর নিক্ষেপ করেছিল, ওকেও ধরে হত্যা করা হয়েছিল এবং ওর মাথা বর্শার অগ্রভাগে উঠিয়ে মুখতার সকফীর সামনে নিয়ে আসা হয়েছিল।

জায়েদ বিন রেকাত

জায়েদ বিন রেকাত, যে জালিম, হযরত আবদুল্লাহ ইবনে মুসলিম ইবনে আকিল (রাঃ) এর কপালে তীর নিক্ষেপ করে রক্ত রঞ্জিত করেছিল, ওকে ধরে জীবিত জ্বালিয়ে দেওয়া হয়েছিল।

উমর বিন সবী

উমর বিন সবী, যে হযরত ইমাম হুসাইন (রাঃ) এর সাথীদেরকে তীর নিক্ষেপ করে আহত করেছিল, ওকেও ধরে তীরের আঘাতে ঝাঁঝরা করে হত্যা করা হয়েছিল।

আমর বিন ছবির পরিণতি

আমর বিন ছবি, যে গর্ব করে বলে বেড়াতো যে 'আমি হুসাইনের কোন সাথীকে হত্যা করার সুযোগ পাইনি বটে, কিন্তু তীর নিক্ষেপ করে অনেককে যখম করতে সক্ষম হয়েছিলাম। মুখতার সকফীর কাছে ওকে ধরে নিয়ে আনা হয়েছিল এবং ওকে বর্শার আঘাতে ঘায়েল করে হত্যা করা হয়েছিল।

এ ভাবে মুখতার সকফী কঠোর হাতে ইমাম হুসাইন (রাঃ) এর রক্তের বদলা নেয়ার কারণে অধিকাংশ সাধারণ ও বিশিষ্ট লোক তার সমর্থক হয়ে গিয়েছিল। সেও যথেষ্ট অনুপ্রেরণা লাভ করে একে একে সবাইকে হত্যা করতে লাগল।

নরাধম ইবনে জিয়াদের পরিণতি

মুখতার সকফী আমর ইবনে সা'আদ, সীমার, হাওলা বিন ইয়াজিদ প্রমুখ জালিমদের হত্যা করার পর নরাধম ইবনে জিয়াদকে হত্যা করার চিন্তা ভাবনা করতে লাগল। কারণ, ইয়াজিদের পর সবচেয়ে মারাত্মক ও জঘন্যতম অপরাধী ব্যক্তি ছিল ইবনে জিয়াদ। তাই ইবনে জিয়াদকে খতম না করা পর্যন্ত মুখতার সকফী কিছুতেই স্বস্থির নিঃশ্বাস ফেলতে পারল না। সে ইব্রাহিম বিন মালেক আশতরকে এক বিরাট সৈন্যবাহিনীর কর্তৃত্ব প্রদান করে ইবনে জিয়াদকে পরাস্ত করার জন্য প্রেরণ করল। এদিকে ইবনে জিয়াদ যখন এ খবর জানতে পারল, সেও মুখতার সকফীর সৈন্যদেরকে দমনের জন্য এক বিরাট সৈন্যবাহিনী নিয়ে অগ্রসর হল। 'মুসল' শহরের অনতিদূরে 'ফোরাত নদীর তীরে উভয় সৈন্য বাহিনীর মধ্যে তুমুল যুদ্ধ হল। সকাল থেকে সন্ধ্যা পর্যন্ত রক্তক্ষয়ী যুদ্ধ চলেছিল। কিন্তু শেষ পর্যন্ত সে ইব্রাহিম বিন মালেকের হাতে পরাজিত হয়ে পালিয়ে যেতে চেয়েছিল কিন্তু রক্ষা পেলনা। ইব্রাহিম বিন আশতরের সৈন্যরা তলোয়ারের আঘাতে শরীর থেকে ওর মাথা বিচ্ছিন্ন করে ফেলল এবং দেহকে জ্বালিয়ে ফেলে মাথা বর্শার অগ্রভাগে উঠিয়ে কুফায় নিয়ে আসল। যে দিন ইবনে জিয়াদের মাথা কুফায় আনা হয়েছিল এবং মুখতার সকফীর সামনে রাখা হয়েছিল, ঘটনাক্রমে সে দিন ছিল মোহররমের দশ তারিখ। মুখতার সকফী উপস্থিত কুফাবাসীদেরকে লক্ষ্য করে বলল— 'দেখ আজ থেকে ছয় বছর আগে এই দিনেই, এই জায়গায় এই জালিমের সামনে হযরত ইমাম হুসাইন (রাঃ) এর মস্তক মুবারক রাখা হয়েছিল। আজ আমার সামনে সেই জালিমের মাথা রাখা হয়েছে।' মুখতার সকফী, ইবনে জিয়াদ ও অন্যান্য জালিমদের মাথা সমূহ জনগণকে প্রদর্শনের জন্য এক প্রকাশ্য জায়গায় রেখে দিল, যে ভাবে ইবনে জিয়াদ, হযরত ইমাম হুসাইন (রাঃ) ও অন্যান্য আহলে বায়তের মস্তক রেখেছিল।

তিরমিযী শরীফের সহীহ হাদীছে বর্ণিত আছে, যে সময় ইবনে জিয়াদ ও ওর বিশিষ্ট অনুসারীদের মাথাসমূহ মুখতার সকফীর সামনে রাখা হয়েছিল, তখন এক ভয়াল সাপের আবির্ভাব হয়েছিল এবং ওটার ভয়াল আকৃতি দেখে লোকেরা ঘাবড়িয়ে গিয়েছিল। সাপটি সকল মাথাসমূহের উপর চক্কর দিয়ে যখন ইবনে জিয়াদের মাথার কাছে পৌঁছলো, তখন ওর নাকের ছিদ্র দিয়ে প্রবেশ করে কিছুক্ষণ অবস্থান করার পর ওর মুখ দিয়ে বের হয়ে আসলো। এ ভাবে তিন বার সাপটি ওর মাথায় প্রবেশ করেছিল, অতঃপর অদৃশ্য হয়ে গিয়েছিল।

উপসংহার

মোট কথা, মুখতার সকফী কারবালার শহীদদের পবিত্র রক্তের যথাযথ বদলা নিয়েছিল। সে প্রায় ষাট হাজার ইয়াজিদ সমর্থক কুফাবাসীদেরকে হত্যা করেছিল। কারো প্রতি কোন প্রকার সহানুভূতি দেখায়নি। এমন কি এক বর্ণনা মতে সীমার ছিল তার ভগ্নিপতি এবং সীমারের ছেলে ছিল তার ভাগিনা। সে এক সাথে ওদের দুজনকে হত্যার নির্দেশ দিয়েছিল। ভাগিনা যখন আপত্তি করে বলেছিল, 'আমার কি অপরাধ? আমি তো কারবালার যুদ্ধে শরীক হইনি, তখন মুখতার সকফী বলেছিল, তা ঠিক কিন্তু তুমি গর্ব করে বলে বেড়াতে 'আমার পিতা হযরত ইমাম হুসাইন (রাঃ) কে হত্যা করেছে।'

মুখতার সকফী হযরত ইমাম হুসাইন (রাঃ) এর হত্যাকারীদের ব্যাপারে যথাযথ প্রতিশোধ নিয়ে অতি প্রশংসনীয় কাজ আঞ্জাম দিয়েছিল। কিন্তু দুর্ভাগ্য, শেষকালে সে নিজেকে নবী বলে দাবী করে মুরতেদ হয়ে গেল। নতুবা, সে মুসলিম জাহানে এক অনন্য বীর পুরুষ হিসেবে চির স্মরণীয় হয়ে থাকতো। অন্যান্য মুসলিম বীর পুরুষদের নামের সাথে ওর নামও স্বর্ণাক্ষরে লিখা থাকত। হযরত আবদুল্লাহ বিন জোবাইর যখন ওর নবুয়ত দাবীর খবর পেলেন, তখন তিনি এক বিরাট সৈন্য বাহিনী প্রেরণ করেন এবং ওকে পরাভূত করে সাতষটি হিজরীর রমজান মাসে এ ফিতনার অবসান ঘটান।